

分石<sup>尚</sup>不知所在頃之雲忽澄明瞥然閃影高峰頂與江山縣江

郎山相似一為浙源一為瀟源但江郎高龜山半此懸萬峰絕

頂為異耳半邊鰲頭兩山東北與紫金夾牛頭江西南與空寮

香爐夾為瀟源江乃兩水中脊二水合於玉瑤東南西下魯觀

與蒲江合始勝如葉舟出大洋焉沿鰲頭東嶺半行二里始下

三里下至爛泥河始得水野炊已下午爛泥河東五里踰嶺下

三里為高粱原隸藍山西境嶺乃藍山寧遠分界處折而西南行又上一嶺山

花紅紫鬪色余於鰲頭山始見山鵲蘭花至是又有紫花二種

一種大花如山茶小者與山鵲等艷色可愛枯樹蒸菌黃白厚

大如盤予袖摘夜至三分石穿箐烘之香正如香菌又山木干

霄有獨木最貴楠次之又有壽杉葉扁同側栢栢儔也鉅者圍

可五人高數十丈瀟源水畔渡河處倒橫一楠修可齊眉長可三

四十步凡上下嶺共五里抵瀟源水可絕流南渡即上三分石

東南從三分石來經香爐山東北出魯觀者乃

嶺麓嶺峻削不容足細徑伏深箐中俯首穿箐上即兩手挽之

以移足時箐猶夙霧淋漓首不得舒又不能平行其上下惟為垂

空縞練資如是八里路漸平又南行嶺上二里濃雲仍翳望頂

莫辨而晚色漸合遂除箐依松得掌大地山高無水有火不成

炊命導搖砍大木積焚之菌箐圍火為度宵計既暝吼風大作

飛火星舞空中火焰流徙倏忽奔突數丈初謂奇觀既而雨次

盛風傘被浣濕幸火威猛烈足以敵之五鼓雨盛火亦奪魄矣



二十九天明漸霽仰見三分石露影在咫尺間輒憑飢冲濕而南又下山二里始知尚隔一峯也度坳中小脊復南上三里始有巨石盤崖昨陟降處皆峻土無塊石爲導搖悞出其南南一里東眺真巖頂已可周摩之爲霧所埋對面無所睹道窮磴絕忽山雨大傾頂踵莫不沾濡乃返過巨石嵯始見有綠道俱伏箐中雨巨不可上遂返至夜來依火處擬從直北舊路下就溪炊米又悞出其西竟失道久之得微礮炊礮中已當午躑躅莽箐中下抵礮則五礮縱橫交會一處蓋皆三分石西南北三面水也向所渡東來一溪尚在最北溯流東一里至來時所渡處始涉而北夫三分石下水俱稱一出廣東一出廣西一下九疑爲

瀟水出湖廣予至此乃知爲石分三歧耳其東北合北與西諸水卽五澗交會處出大洋爲瀟江源直東者自高粱原爲白田江東十五里經臨江所又東二十里至藍山縣治爲歸山源東南者自高粱原東南十五里之大橋下錦田西至江華爲沱水原而三分石水初不出兩粵也且其南有錦田水橫流爲楚粵界聞錦田東有石魚嶺屬廣東連州水至此始東南流入東粵耳乃從舊道下至牛頭江日已暮命導搖從間道趨菜原以自此而南絕無一寮而此原有高山搖居也初升猶土山旣東下聞水聲出深壑中暗捫危級下又一里過兩獨木橋見火光熒熒伏畦旁乃搖人捕蛙者已而茅寮在前呼之一人秉炬出迎



歸託宿焉。

三十平明行始見所謂韭菜原在高山底若釜西越一山二里  
即出清水潭遂循故道返斜岩飯仍出宿路亭是夕始睹落照。

四月初一從路亭東北歧隨蕭韶水西岸行三里西望掩口東  
兩山峽已出其下平疇矣於是東山漸豁路因溪東轉溪兩旁  
石盤錯競敵水奔東其中隘處如門即架木其上以渡渡而循  
溪南岸行共七里抵下觀下觀西有溪自南遶下觀而東石梁  
鎖其下流水出橋下東合蕭韶水其南一溪又自應龍橋來會  
三水合勝舟北可行二十里至寧遠過下觀始與蕭韶水別路  
轉東南向南望下觀後千峰萬巘亭亭若竹竿玉立中有最高

銳者名吳尖山下有岩窈窕當不減斜岩內有尤村洞外有東  
角潭俱此中盛奇處恨未滯杖履其中搜剔奇閎也東南大里  
大溪南自尤村洞來橋跨其上即應龍橋也亦稱通濟橋已渡  
橋遂南入亂峯中乃吳尖東派二里上地寶坪坳於是四際皆  
奇峰曲折獅象龍蛇之石夾路起與人爭道共六里飯山口峒  
名雖山口實瑤房錦帳桃源鹿門那辨此幽琦遂詭也南出山  
口踰嶺共三里忽兩峯夾道競險爭高刻摹詭態極其變幻峰  
下小溪南向憩換橋遇儒冠者王璇峯家尤村內欲挽予還其  
處爲吳尖主人予期以異日過峽南始有客容土負塊山又五里  
踰嶺抵大吉墅石峰復夾道起路東一峰下嵌空玲瓏逆懸敲



裂屋雲不足喻其巧。予望之神怦怦動，亟分荆入，皆竇空通漏。上盤腋轉，莫可窮詰。西峰懸削不少，雌遜路出兩峰中，透隘南始豁。然山開口路園，下石峰至是始盡。東西俱盤坂，崇巒南二里出<sup>始</sup>天道。又南五里宿界頭，鋪爲寧遠藍山界。其西大山曰滿雲山，當是紫金原之背。其支東北行，界遂因之。

初二，東南行，問所謂石柱山，俱莫知所在。共五里過嶺，至總管廟，遙望正東有聳尖卓立者，不辨爲樹爲石。又東南五里至顏家橋，始辨爲石峰也。橋下水東北流去，過橋東南<sup>大</sup>一小嶺，大道南十五里至藍山。余東折取臨武道，五里過寶林寺，讀寺前護龍橋牌云：寶林山脉由北柱來，乃悟向所望疑樹峰，卽志稱

石柱碑所指北柱也。東過護龍橋，橋下水南流洶湧，卽顏家橋溪委曲至者。隨溪東走，北瞻石柱峰，倩削如碧玉簪。兩旁石崖兀突露奇，而較之尤溪山口峰，此裁得其一體耳。又二里至下灣田，大樹峙路隅，上枝分聳，下盤曲偃蹇，大七圍，旋窩錯節間，俱受水若洗頭盆，亦樹妖也。又東路出臥石中溪，始折南向藍山路，乃東二里一橫道，自西南貫東北，卽藍山趨桂陽道。又東沿白帝山南十里，抵雷家嶺。

初三，大溪自藍山曲而東，至循溪東行，已而溪南折路捨溪東踰嶺共五里，大溪復自南來，曰許家渡，渡而東一里，溪北向入峽路南入山，十五里至田心鋪，鋪南徑道開闢，小溪來自朱禾



舖北向去。自此路西大山由藍山南南向排列。澄溪帶之。路東石峰聳秀。

亦南向排列。喬松蔭其上。置道於中。三里一亭。供倦旅憩臥。二十里飯朱禾舖。爲藍山臨武界。一里度永濟橋。水東流。沿東山麓折而北。入歸水。又南四里爲江山嶺。則南龍大脊。水遂分楚粵云。嶺西十五里曰水頭。志謂武水出西山。鷓鴣石當卽其處。過脊卽東南循水行。四里至東村。東南一里踰嶺下。行塢中路。旁喬松合抱夾立。三里出兩石山口。又四里達墊江舖。南去臨武尚十里。

初四。聞墊江東北十里有龍洞甚奇。遂由小徑行。四里出臨武北。向桂陽州大道。一里卽渡溪。越捭岡嶺。復從小徑西北入山。共五里抵石門。蔣氏居後洞。在山半翠微間。洞門東南向。一入卽見石柱千門懸列。其中俯窪以下則洞外層也。從東上。穿入列柱。衆柱復迴環成洞。如委房深閣。無不徹明。達聽八窓。掩映從所歷洞。無此開望朗宏麗。屈折彈工者。時蔣道遠取火炬。予貪奇獨先至。意炬入處當在下洞外層後。及炬至。導者從左洞後穿隙西入。連入石門數重。已轉出外洞之後。下層之上。乃北踰石限。穿隘進。卽下石池中。水澄明不流。兩岸俱穹壁列柱。池水深三四尺。中有石梗臥水底。水浮其上。僅尺許。踐梗行。褰裳可涉。十步之外。臥梗又橫石限。限外池益大。水益深。水底白石龍首頂橫脊尾拖池中。逼崖側。又前兩三步。圓石大如斗。壘插



水中不出水者亦尺許密依龍側真領下物也珠旁又一石大  
倍珠中凹如臼面平水曰珠盤然與珠並列未嘗盛珠也由此  
而前水深五六尺無梗絕涉西望水洞宏廣若五畝池四旁石  
崖攢突參錯而下泥水不得去洵異境也其西北似有隙更深  
恨無槎可航還從舊路出經左洞下迴望窪洞外層紛綸窈窕  
乃獨下洞底環洞四旁轉出列柱後洞雖不深通而芝田蓮帷  
上下重布即無內二洞亦自成一奇也此洞品第固當在月岩  
上下山返墊江南十里抵臨武

初五出臨武南三里過臨<sub>迎</sub>榜橋橋南即挂榜山予初過不之覺  
從其南東上嶺共七里過深井坪又南二里從路右下是謂鳳

頭岩即宋王淮錫稱秀岩者洞門東北向渡橋以入出洞下抵  
石溪溪流自橋伏流石間復透隙灤崖破洞東入此洞即王記  
所云下渡溪水其入無窮處也第王從上洞而下此則水更由  
外崖入予抵水洞口深不能渡聞隨水入洞二丈即見天光五  
丈即透壁出山之東是山如天生橋水達其下僅三五丈往連  
州大道正度其上但高廣度者不覺耳予登巔東瞰深壑下環  
峽流東注近俱峭石森立灌莽翳之不特不能下亦不能窺王  
記所云其入無窮者臆說也還渡迎榜橋迴瞻挂榜處石壁一  
幃色黃白威章剖峰平列但少方整耳遂宿臨武生祠中  
初六出東門東南四十里至鳳集舖為臨武宜章東西界又二



十里抵梅田白沙巡司。

初七，司東渡武溪東北三十里，爲芹菜坪。南有石峰分突，下層  
嵯承之，色班赭雜黑，極似武陵一體。此處四山俱青萼巉岿，獨  
此有異。又五里過隘口，循塔山北垂，覓小徑轉入山坳，曰良岩。  
寺向西南，岩向西北，岩口有池一方。僧鳳岩爲煮金剛笋供粥。  
下午，至宜章城南三星橋，過橋則市肆夾道，商旅雜遝，爲南下  
廣東之大道。路循城而東，已乃北十里過牛勛洞，在青岑山東  
北麓。更北一里至野石鋪，其北石峰嵌空，躡踞路左，卽爲野石  
岩。投宿岩下村家，欲從舍後上岩，須自其中舍後門出，予乃從  
南畔亂石中攀嵯踰石入，先登一岩，其門岬然，內有透頂隙，不  
甚深，仰視門左，有磴埋草間，亟披棘上。西南行，石逕中復得石  
門，如合掌，內雖隘，稍深，右裂旁竅，上亦透天光，而東壁半一圓  
竅，透光如鏡，出峽門西北，隨磴上，則穹嵯削立，上有疊石分霄，  
下成展嶂，以薄暮乃下，聞中室牖內有呼客聲，謂客探岩曾見  
仙詩否，予以所歷對曰：未也。穹嵯之東，峽門之上，尚有路可登，  
明日當再窮之。且爲予言高雲山乃衆山頂，路由黃岑嶺而上，  
宜章八景有黃岑滴翠，白水流虹，二勝在其下，不可失也。  
初八，復登岩上，由穹崖東叢鬱之下，果得路上，數步亂石縱橫，  
路復莫辨，乃扳踰石萼，上俱嵌空決裂，有大石高聳於外，夾成  
石坪，掩映愈勝。還至失道處，見一石穴，卽在所踰石下，匍匐入



其內。哈岬起裂。列穴旁通。宛轉穿石坪下。皆明朗可穿。前越其上。茲又達其底。然終不得洞中。詩下岩南從舊路抵牛勛洞北。西越山峽。出峽共五里。循青岑南麓行。西三里轉一岡。始與南來大道合。北上曲折嶺二里。直躋嶺坳。西卽白水流虹。章水上源也。水自高雲山南經黃岑洞。由此出峽。布流懸石下。土人卽稱此嶺曰黃岑。然黃岑山尚北峙。此其南下支。踰嶺西北半里。卽溯白水上流行。黃岑山危峙東北。陽環成洞。大溪橫貫之。溯溪西行三里。仍北轉。溯溪一里。乃捨溪登嶺。溪在嶺南。聞溯行三十里可抵黃茅嶺。乃北上一里。西下塢中。是爲藏經樓。高山四遶。小澗灤門。寺甚整潔。昔爲貯藏所。近被賊焚劫。移營高雲矣。由寺左登坪頭嶺。直上二里。逾嶺塢甚幽。山幃疊翠。衆壑爭流。修篁一丘。叢木交映。中一靜室出焉。半里塢窮。復溯湖北上嶺里許。嶺已巔。水復不絕。此坪頭而上第二嶺也。水自上塢透峽下。路循峽入。平行半里。渡澗。東北上嶺。澗東自黃岑山後來。平流塢中。石坪殷紅。清泉素潤。色伴濯錦。出峽下瀉。鳴珠玉韻。重木翳之。杳不可窺。於是遶靜室西南下注。出藏經嶺南。爲大章之源也。嶺不甚高。半里漸出盤黃岑北。山鵲鮮麗。光采耀人。此坪頭第三嶺也。過一坪。又東北上第四嶺。里許踰其脊。嶺西石峰突如踞獅。爲將軍山。踰嶺北下。行深樹中共二里。得高雲寺。寺倚翠微。猶踞萬山頂上也。以憊極。日未暮止焉。



初九東北叢木中下山五里抵山麓坦山村村側北上虎頭嶺  
嶺東坳中澗水瀉大石崖下懸簾曳布亦此中僅見踰坳溯流  
北行塢中踰嶺下共四里有溪自西而東渡溪又一溪自北來  
入溯溪北行峽中二里為大竹峒水自西來想為黃茅嶺餘波也東踰大竹嶺嶺為大竹山南  
下脊上少下多東向直下二里是為吳溪東一里渡橋北上小  
分嶺亦上少下多二里下至仙人場有水頗大北自山峒透峽  
而東一峰當關扼之水激石南折峰剖其西巖巖轟震以為下  
必有洞壑可憩絕流以渡竟無人居東北十二里出良田又北  
十里至萬歲橋

初十二十里抵郴州州東百餘里山下有泉方圓十餘里其旁  
石壁峭立泉深莫測是為<sup>真</sup>鈷鉬潭永州鈷鉬潭不稱大觀柳子  
厚有愛斯名移稱永郡耳

十一午後下小舟東北由蘇仙橋下順流西北去六十里達柳  
口則郴江自東南耒水自正東二水合流勢始大耒水出桂陽  
縣南耒山下西北至興寧縣勝舟又三十里至江東市勝大舟  
又五十里乃至此江口諸峰俱石崖盤立寸土絕麗志稱曹王  
寨山極險峻暮不及登舟人夜鼓棹三十里抵黃泥舖雨至而  
泊予從蓬底窺之外若橋門心異因起視則一大石室下也寬  
逾數間屋下匯為潭四舟俱泊其內岩外雨聲山色不意夢中  
睹此奇觀之境四鼓雨止乃行昧爽達程口



十二晨炊程口肆中程口者志所稱程鄉水也地屬興寧水發源茶陵鄱縣界舟溯流入皆興寧西境進有鐘源山土人誇爲名山又進則小舟尚可三日程踰高脚嶺則茶陵道矣程鄉水西入耒江時煤炭舟鱗次水淺不能發上午得小煤舡附之行程口西北重嵯若剖夾立江岸兩涯純石盤互錯突色間赭黑環轉一如武夷如此四十里又二十里過永興縣十五里爲觀音岩岩在江北岸西南下瞰江中石崖騰空上覆下裂如剖半瓜其足疊閣兩層閣前有洞臨流中容數人由閣西懸梯直上上接崖頂透隙上一龕嵌覆頂下中祠大士岩下一石獅橫臥江心下舟又五里至森口大溪自南來乃桂陽州龍渡以東諸水東北合白豹水至此入耒江又北五里泊柳州灘永興以北山始無迴崖突石觀

十三六十五里過上堡市地爲耒陽境北過江登直釣岩岩前有真武殿觀音閣東向迎江洞門瞰江南向當門石柱中垂界爲二若連環然其內空闊平整右隅裂一竅歷磴上別爲邃室左隅由大洞深入石竅忽盤空起東遊一竅敲納天光又盤空起透頂直上天光一圓下墮其中直是井底窺天也下午九十里抵耒陽縣江經城東直北去山至此盡開

十四順流北百二十里至新城市爲耒陽衡陽分界乘月隨流六十里泊相公灘



十五百二十里至前溪渡陸路抵府止三十里水倍之渡西岸  
遂登陸西行十二里已暮

十六二十里渡湘江已在衡郡南關外抵金寓靜聞宿花藥未  
歸及歸桂藩助金事尚未助就

十七已定廣右舟

十八舟人以同伴未至改期二十早發

十九靜聞同祥甫賈王所助遊資來

二十予冒雨下舟靜聞往謝桂藩追至南關外揮手別祥甫舟  
即解維三十里泊東陽渡江漲濁湘流又作一觀

二十一五十里將抵松柏忽衡友劉明宇使使追予晤別乃與

靜聞登涯逆之而劉不至宿山頂茅庵

二十二聞劉已舟往松柏匍匐雨中二十里別劉松柏肆中時  
所附廣右舟計竟日力當止於常寧河口乃遍覓漁舟爲夜抵  
白坊計二鼓雨止月出已抵白坊駟予念再夜行三十里可及  
舟適見有流二舟泊下流予漫呼顧行得應聲始知舟猶待予  
於此也乃刺舟過舫

二十三北行二十里過大魚塘見兩舟被劫哭甚哀於是同行  
兩舫人謝予曰昨不候君暮亦當至此始舟子以候予故大爲  
衆詬至是甚見德色共六十里泊河洲駟

二十四歸陽駟



二十五小河口

二十六觀音灘

二十七祁陽縣予乃同靜聞出祁陽東北一里憩甘泉寺泉一方當寺前坡下味極淡冽似惠泉殿前有吾郡宋鄒浩甘泉銘碑張南軒從郡中蔣氏得之跋而鐫此鄒大書張小楷可稱二絕寺前山第二層之東盤成一窩則九蓮庵也邑人陳尚書重建藏經閣中供高皇帝像唐包巾丹華窄衣眉如臥蠶中不斷疎鬚傑張陳氏得之內府供此者九蓮庵山南盡前有大池乃甘泉南下東遠注於湘入湘處爲瀟湘橋橋北一峰突起奇石靈幻湘江欲南至此東折去祁江從北至此南向入湘乃三水

交會中也峯頂曰瀟湘廟廟後萼裂瓣簇石態多奇

二十八水漲舟泊竟不成行

二十九昧爽放舟曉色蒸霞層巒開藻旣而火輪湧出金光騰耀中直從舟尾射予枕隙泰岳日觀不謂得之臥遊也過二十四磯泊黃楊舖

閏四月初一冷水灣

初二湘口關自冷水灣來山開天曠目界大騁江南岸瞰水之石出沒屢變但有所過靡不霽心綴目蓋入祁陽境石質奇石色潤過祁陽突岬之勢隨地湧立及入湘口則聳突盤互者變爲峭豎廻翔矣



初三放舟入湘口。於是別瀟，希向湘。瀟即予前入永州道與湘  
交會。此二水一東南一西南，界其中者為芝山。北盡兩流夾之，  
尖若龍尾下垂，因其脊無石中砥，故挫之必銳，而後已由湘  
口上多西北之曲，灘聲愈多，石崖愈奇。凡四十里，有駢立東岸  
者，與江左平剖之崖夾江對峙，如五老比肩，愈見奇峭。西轉五  
里，過軍家埠，又南轉一山中剖，平插江右，其下雲根倒浸重波，  
時落日正銜山外，舟過江東，忽峰開片穴，通明若鉤月，與日並  
懸，旋即隱蔽，乃去軍家埠五里泊。

初四東過挂榜岩，岩平削江北，下嵌水面，其上石若磨崖，色間  
黃白，遠逾臨武。南行三十里抵石溪，駟已屬東安境，有東江自  
南北注湘，石梁跨其口，水發源零陵南，舟由橋下南溯十五里  
為零陵境，又二十五里為東江橋，上有小河三支，通筏而已。按  
志，永水出永山，在永州西南九十里，北入湘，即此水無疑也。石  
溪之西有山突兀，石崖下插江中，一隙北向，如重門，懸峽之後，  
頂為獅子洞，洞門東南向，不甚高敞，穿石窟下一里，可透出臨  
江門峽，惜時方水溢，臨江處既沒浸中，洞復無炬入，遂返。又五  
里泊白沙洲，其對岸石壁臨江，黃白燦然，充壁崖北山巔，又起  
一崖西北向，有庵倚之，隔江不能往也。  
初五五里上磨盤灘，兩岫山始峻削，岸突北岸者，飛瀑挂其腋，  
間雖以雨壯觀，要為不斷之流。又五里為兵書峽，西均亦有瀑



如練又五里為沉香崖。崖斜疊成紋，高迴處疊紋忽裂，中吐兩枝，望之木形黝色。上有大樹一株，正當崖頂，更有上崖一重，內峙庵，嵌其間，層巖聳翠，下挈遙江，真異境也。過崖泊羅埠。

初六，江漲舟纔掛帆行五里。

初七，西六里兩山門立，遂分楚粵界。又南三十里上金華灘，灘東石崖當衝，轟流斬壁，高下兩絕，險勝一時。又西十里止廟頭。

初八，放舟南行二十里為黃沙鋪，粵舟可直抵桂林。予欲盡全州諸山，遂止。此從陸為粵遊始。

西南遊日記三 廣西

閏月初八，分顧僕舟抵桂林。予同靜聞從湘江南岸登匯匯為山角駟。

即黃沙也。西南行大松夾道，共五里黃沙鋪又二十七里，捨官道右入山，西向

大山行四里，止山下牛頭岡。

初九，西五里至礮岩，普潤寺洞前門東向如橋，出水約三十丈。

後門北向，入水約十五丈，泉自山後破石窟三級下，故曰礮。西

二里小石山，兀立路旁。又三里張家村，村後大山曰迴龍岩。南

五里上大衝，又西十三里宿獅子岩，南清泉庵。

衝西半里飯福壽菴西北上柳山

初十，南下二里至湘山寺。寺在全州西門外半里，登殿拜無量

壽佛塔。塔後有飛來石，由寺西沂羅江一里上捲雲閣。閣西為



盤石半落江中絕壁有蓮花一瓣凹入壁間白瓣黑岬又西一  
峒臨江泉由洞東裂石出口曰玉龍泉一石峯高豎其側共十五  
里度石岬岡差南為龍隱洞小山獨立江上門西向出洞而西  
抵度橋度橋水東自龍泉出口山聳秀夾江  
十一度橋西北行十里北入峽為山川口又十三里抵白竹江  
望西北鉤挂山甚岿突聞其上金寶頂甚奇遂自白竹橋溯江  
西北五里進峽口兩山壁立夾溪沿溪屈曲十里出峽為南峒  
聞南峒北五里峒盡可由四川嶺達寶頂但路已沒遂捨北道  
西度溪上嶺嶺左腋有瀑布又十里至打狗凹宿興隆庵庵北  
高嶺即金寶頂也

十二由庵西上沿崖北轉三下上又三度均曲共三里踰土地  
坳西望新寧江已在山麓下山五里為大竹坪坪北踰嶺共三  
里至大鼻山

十三從大鼻村後夾澗上一里飛瀑懸崖宛轉下西板嶺而上  
約行一里至南來大道乃南從大源上此者又四里至角庵基

修竹迴岩掩映即

伏身蛇行庵後叢竹中四里乃從右岬叢中上又二里行觀音  
竹叢中竹大如管多竹實如蓮肉大採笋置路隅識來徑竹中  
上二里至寶頂殿基日甫中四山俱出南峯近為鉤挂山石岬  
峭立東北向若削再南即打狗嶺再南為大帽再南為南寶頂  
頂最高與北相頡頏而基後絕頂更倍之復從竹叢中東北上



一里至頂其觀音竹更大笋腴美然叢密中無由四望登樹踐枝終不暢眺忽竹浪中出大石如臺梯躋其上羣山歷歷可縷數仍下山宿大鼻村。

十四隨溪西下四里爲大源則大鼻西峽水與村後東峽水會橋於上曰潮橋橋西乃大源村予往南頂則從橋東隨澗南行里許渡木橋澗忽東折入山路南出山隘澗復墜路東破峽出連搗三潭上方瀑長如布中凹瀑轉傾下圓整瀑勻成簾下二潭俱有圓石中立承水水墮潭作勢滌洄尤異又三里度橋爲桐初有水南自打狗嶺來會亦橋其上二水合而西南則又觀音橋跨之大道從觀音橋西踰嶺出予從橋下隨溪南一里水

從西峽去路踰一嶺下墜深壑中四里至陳墓源瀑自東南山峽中踴躍出與東嶺溪合亦橋跨其會處大道與水俱南予度橋東躋嶺卽湧南嶺也二里平行嶺脊北望北寶頂巋然峽中水近自打狗南崖直逼其下南望新寧江流遠從巾子嶺橫界南寶頂之西其西南有峰尖突正當陳墓水口已而路漸出其下五里南下嶺至蘇家大坪坪側大瀑破山西向出勢甚雄偉

行四里二里又踰小嶺里許

下爲大溪西北合陳墓源出口下午東南上一嶺悞東往大帽嶺道乃西南轉六里出南寶頂道桃子坪問上梁宿處四里而是踰嶺東至新開田所有路南下伏草中復悞出其東歷險陂三里不辨所向已忽得一龕地名挂幡去上梁五里矣其處五



里至快樂庵又十里乃至南頂以暮雨遂歇庵

十五雨不止滯龕中

十六下脫

十七從定心橋下過脊處覓蓮瓣隙痕削崖密附旁無餘徑乃從脊東隔峽望之痕雖岬然上垂下削非可託廬架道處也乃上定心石過聖水崖再由捨身岩登飛錫絕頂返白雲庵十八由東路下山一里餘路旁峭石分列石級出其間爲天門門外聳石立路石上大書白雲洞天從此歷磴下危峭較勝西路四里經顯龍庵庵北向又東下南望隔山飛瀑自那山擎山南腋下先從寶頂卽窺見至此始睹崇隆若九天也又東下五

里北渡一小溪深竹中有寺寂然則苦煉庵矣庵南向左右各一溪自後來繞而後溪較大橋橫其上水從西南山腋透壁下庵前東南渡橋南上嶺其地竹甚大路始分東西岐從西下始見那又瀑北掛層崖苦煉溪亦透空懸壑與那又大小高下勢相頡然苦煉近在對山路沿之同下朗朗見其搗壑勢其下山環成城瀑垂其中出西壁與那又東大溪合而東南去又見西峽中一瀑透山下連瀉九層雖練細然甚危長路乃東轉下共三里又一溪自西北來渡而隨之始僅涓細微漸大漸下遂成轟雷湧雪觀路循溪北東二里爲大坪右渡溪入一村家村西上流蓮花庵竹色叢鬱遂西南渡那又大溪溪東北出白沙江



又西上嶺十三里抵望江。踰嶺溯溪，又十里為桐原山。下山五里，隨小車江南下，又四里，桐原大溪自西來，與江合而南去。渡小車江口橋，從水東上山，隨江東南路行，峽江山上極峻險。一小石山北面平削，江遶其南，路遶其北。東北又有小溪，破峽成瀑。凡東南四里，始下至江涯。稍上北峯，曰不住嶺。有溪自東北入其

十九，東南上嶺，隨江東四里，下涉跳石江，又上山三里，出兩山峽口，壩堰水甚巨，曰上官壩。壩外平疇，直南抵裡山，隈出峽水，東南入湘路，隨峽右西南下，一里抵白塘村，後石山特立，曰金鐘山，下俱青石峭削，西南渡溪橋，過棗雞嶺，共八里，出咸水，則官道山棗駟也。度橋西南行，長松合抱，夾道蔽天，極似道州永

明道十里，石脂舖，從小路東南折五里，抵界首，為全州興安界。二十，溯湘江西五里，出塔兒舖，古松時斷續，不及全州連雲接嶂也。三十里至興安縣，萬里橋，橋下水遶北城，西去，兩岸甃石，中流平而不廣，即靈渠已為漓江矣。湘漓分水處尚在東三里也。由橋北溯靈渠北岸東行，已復北折，渡大溪，則湘江本流也。上流堰不通舟，既渡，又東有小溪，疏流若帶，舟道從之。蓋堰湘分水，西注為漓，又東瀆湘支以達舟楫。稍下，復與江身合矣。支流上跨以接龍橋，橋南水灣為觀音閣，去城東二里。又東南三里，則湘水南來，直逼石崖下，崖突立南向，曰獅子寨，循寨腳溯溪東入，東北入里，踰羊牯嶺，抵狀元峰，下有迴龍庵。



二十一庵東踰小山南一里至長冲東逼狀元峰麓狀元峰南

又里許至草卷則

一峰片插曰小金峰峭削似過之二峯有路皆草翳予直東上

二里抵狀元峰翠微閣山削草合蛇路伏沉莽中漸東北轉三

里直上踰嶺均麻川遶其下麻川東大山橫立屬灌陽界乃老龍

脊也由嶺北下均即入九龍殿之峽予直躋峯頂峯甚峭窄凡七

從均南

起伏共南一里上狀元峯則亭亭獨立矣但北面九峯相連南

走與小金尚隔二峰峭若中斷不能飛渡故道必由麓更上小

金頂也頂北第三峰西北石臺如舡首飛突凌空坐峰頂久之

下返迴龍庵

二十二東行二里過九宮橋踰小嶺共二里至錦霄是為峽中

麻川江自南來北出界首截江以渡江深沒股麻川至此破山

出名七里峽下又破山出名五里峽錦霄在其中為陸行口過

江湖東夾之溪入三里登山脊至九龍廟南北東皆崇山逼夾

南麓即所溯溪之北麓溪聲甚厲遂下山返觀音閣支流分環

閣四面惟南面石堰僅通水東西北則舟上下俱繞之惜閣小

不稱閣東度石橋循分支西岸溯流一里至分水塘塘以巨石

橫絕中流南北連立以斷江身祇以小穴洩餘波由塘南分湘

入瀉塘之北即瀆湘為支以通湘舟於觀音閣前者也遂刺舟

南渡分瀉口入分水廟西二里抵興安南門出城西三里抵三

里橋橋跨靈渠上渠至此細流成涓石底嶙峋時巨舡鱗次以



箔阻水俟水稍厚則去箔放舟焉

二十三橋西有金鼎山山為老龍脊由此至興安南轉海陽雖為史祿鑿山分滴水而橋下有石底水不滿尺終不能損其大脊也上一里至頂頂大至丈許惟南面羣巒紛叢嵐霧中若聚米若流火俯瞰其出沒甚近下至三里橋西隨靈渠西南去已而渠漸直南路右石山叢立雨中迴眺共十里已透金鼎所望亂山堆壘中穿根盤壑多迴曲無升降又三里為蘇一坪東有岐可達乳洞予先西趨嚴關共二里而出隘口東西兩石山駢峙路出其下若門中闕旁裂穴如圭梯崖入其中不甚敞空合如蓮瓣坐觀雨中行李紛紛杳杳返由蘇子坪東南行一里溯

靈渠東北上溪東自乳洞夾注為清水乃東渡靈渠四里過

度堰東石橋

大岩堰東轉入山南小石山分歧立路口洞岬然南向遂西向隨溪入又二里至董田巨村洞即在其北日薄不及登乃趨東

山入隱山寺寺後有洞門南向高懸水由下出西合乳洞北流水破西北山腹出大岩堰縛炬從寺右入洞板石壁崖上石巉削圯側下墜淵壁若裂深覓暗中水石無可着足乃出

二十四西二里至乳岩下洞中洞上洞雨中返寺

二十五東一里出山口支峰兀立處有庵草翳無人從庵左先循其上崖崖危草沒予扳隙入轉崖之東則兩壁門裂內裁一線剖宛轉嵌漏上來參天離合殆十層起下夾直墮湖底俱凭



臨千尺夾半兩崖復有痕受足肩倚隔崖手扳石竅無墜隕懼

直進五六丈夾始東轉出由支峰均脊北望觀音岩在對崖亦幽削可

喜昨從其前山轉惜未一至今不能更北也下山東南十七里

至湘洲為湘西寺岸南十三里宿唐匯田東有大山巋然出東界

上者曰赤耳山

二十六南湖湘六里為太平堡東西山至是開成巨塢小石峰

一帶駢立湘水東南十里飯廟角雙泉寺南即靈川界南二里

東南歧入山又二里渡橋湘水有橋自此始循左山南四里一

石峯特立中曰海陽山有海龍庵在峰南石岨半庵為臨桂屬

抵庵日已西乃下山自東麓二洞門繞北西入一洞龍母廟已

圮即從流水中行轉南水遂成匯深沒股庵下石崖壁立下臨

深塘由塘南水中行東轉登山海陽山俱崆峒貯水水門二南

平西出急東旱門二下一二尺即水匯其中深者五六尺山南

水塘有細流東源季陵亦下此則此山尚在過脊北水俱北流

惟為湘源也漓源尚在海陽西西角嶺

二十七東望白面山南諸峭峯甚奇聞其下有讀書臺遂東北

四里渡雙溪橋又東一里尖峯在白面西望之欲趨及登嶺北

均望山下水反自北南去北皆山岡互絕無容流處由棘中循崖南轉捫

隙歷塊上峯腰一洞南向內西裂庵窟吐納日月以為即讀書

岩矣但平入三四丈漸隘其下路復翳塞頗疑之出洞望洞東



削崖萬丈插霄臨淵上一石飛突無所承極似巨鼠又有下躍  
然無路可捫乃歷級裂棘扳條梯登懸石直至巨鼠崖下仰望  
巨鼠又有二小鼠下垂崖腰一線痕可着足下仍峭壁又東有  
巨擘一雙作接引狀手背拇指分合都辨至其處山腰痕絕不  
可前乃從舊路南下至麓詢耕者已得讀書臺臺尚在嶺坳西  
當從嶺西下不當東上也乃從麓西溯澗而北則前所望溪從  
洞中出讀書臺在澗上登之洞西向高而不廣內垂柱擎蓋種  
種異觀三丈後即北轉下隘不可俯視出過下水洞水即從讀  
書岩下石穴湧出水與口平第見急湍湧流不見洞門也由海  
陽庵東南過季陵循過脊西行二里為海陽堡堡前又分一支  
南下山與西山夾為兩界水始淙淙南出隨水下一里則西谷  
中裂水破峽出又羅姑山與西嶺夾而成流者皆為瀉水源矣  
越之西南七里循大澗嶺上行忽有水自東南下搗成澗路隨  
之直墜澗底南越橋水自橋下復搗峽中路不能從乃踰嶺隙然  
直下共四里出山口又西南二里抵澗上西有銀燭山尖削突  
聳東南則石崖正扼水口也

二十八西南十里望西北五峯高突頂平若臺可奪五臺之名  
西五里直抵五峯南則亂峯尖疊什百為伍橫變側移殆難更  
僕數其陽即為榕村東南三十里有靈襟洞南二里有陽流岩  
西五里過上橋橋下水東北自叢尖山南西至此又西南穿石



山脈共三里過廖村西北有山危峙爲金山東叢角亭亭更覺  
層疊者龍山潭也又五里西穿石山峽則諸峯分峙疊出離立  
獻奇石峰下俱水匯不流深者尺許淺半之諸峯倒插於中眞  
青蓮出水各欲獨上初兩大峰夾道後又夾以兩銳峯道俱疊  
水中取徑峯隙令人賞無專接但石皆廉利作刃戟不免目慰  
足如耳峯有稱者曰雷劈曰萬歲其間逸名者甚多共二里始  
出水磴平疇十五里直抵兩山峽中南北成門北山東垂石峯  
分歧起如削岐峯尤亭亭作搔首態崖半裂透明隙惟南眺光  
列一線少轉步卽失之南山又有石突綴其首人行於下者左  
右流盼又西爲浮橋漓水北自皇澤灣至是極汪洋桂林省城  
東臨其上城之臨水者東北爲東鎮門又南過木龍洞爲就日  
門又南出伏波山下爲桂水門又南爲行春門極南爲浮橋門  
皆東面臨江自北隅南至浮橋共五門浮橋貫江而渡覓顧僕  
不得宿城中逆旅

二十五<sup>九</sup>東出就日門從城下北行城上一山當面起石腳下插

江中路忽穿山透跨下南北岬然殆天關關津也西則因山爲  
城城以內卽疊綵東隅穿洞出正下臨江潭盤山壁透腋入又  
爲木龍洞洞亦自南穿北東開窓隙屢引天光外瀕江有路行  
者或內自洞行或外由江岸俱可北達出洞片石夾峙上屈曲  
架穹石色錯青紅似非本山石質不知何處移架此洞北關成



崖綴以飛廊前臨大江後倚懸壁憩眺勝莫踰此循城溯江北  
一里過東鎮門又北過城東隅北為東江駟駟東向當皇澤灣南  
下衝出駟北望皇澤灣二舟舫泊山下疑顧僕或在此舟趨問  
之則泊舟之山在松陰中乃虞山也其下大殿為舜祠祠後卽  
韶音洞東臨江曰薰風亭余沿江登山上薰風亭由亭西下謁  
舜殿從殿左入韶音洞洞西向高二丈東透出約十丈洞東高  
崖巔絕小水匯其前幽潭嵌壁水自北塢南來石梁當洞架其  
上曰接龍橋坐橋上還眺洞門崖壁更盡崢嶸勢從此上躋宛  
轉石級閒將至山頂一淨室窻楞西向戶榻洒然室斗大而潔  
乃與靜聞解衣憑几指點西山甚適因急欲覓顧僕下山南循  
行春至浮橋門始遇之

五月初一北抵靖江王府循王城北行登疊綵山山踞省城東  
北隅山門當兩峰間亂石層疊錯立浪花萼騰簇眩目上為  
佛殿殿後一洞屈曲穿山背門南向高二丈深倍之北透小門  
忽轉而東關江水直下漱其足洞內石門轉透處風從洞前扇  
入寒吹凌人土人稱為風洞石門北向當東轉之上仰見石板  
平度上透圓竇若樓閣再架予與靜聞分道趨各會層樓之上  
其處東復開隙垂乳列於西乃從圓竇中墜空下出後洞北躋  
磴上南越洞頂遂登絕巘則越王檀也是為桂山上皆石萼轟

洞前下瞰城東



發石峯前支起謂之四望山西一石峰高與此峰並峯半有洞  
高懸望之岬然中空亟下仍從風洞出寺由寺西坳中復登西  
峰峰半洞東向透峰腹而西徑十餘丈高十之四由其中望東西  
洞然惜絕頂地少窄未能徹矚全勝耳是名千越山洞西墜壑  
下極嶮峻仍東下至寺有大道北透兩峰間抵麓西行里許又  
一洞倚山北向遂拾級以登其下先有一洞高可丈五寬廣盤  
曲多垂柱界竅分岐土人以為馬廄散臥馬匹令人氣阻由西  
南躋級更上從洞門入透隙而西外裂重門內駕層洞既下西  
行見峰頂洞門西墜處危峽孤懸下有長垣環之仰眺不得端  
曲委則藩府別圃也遂北轉至北門門在兩山聳夾中門外兩  
旁山俱峭拔卽為華景寶積衆勝云折而東南出桂水門抵慶  
真觀北渡江入玩珠岩卽伏波山東麓石壁下嵌重江裂隙兩  
層上縱下橫上者高盤入頂無級可階橫者下臥波上下石浮  
敞為臺覆以敲石石柱下垂覆簷外直抵下石不接者僅寸名  
伏波試劍石後壁紅白紋若縷圓石三暈恰當其首故曰玩珠  
雙紋後內復裂隙直抵豎峽下垂柱之西石臺中圻橫石以渡  
更北穿旁竇下臨淵碧無底南入山腹有光西轉北達前門是  
其奧境矣但石色波光俱不若外岩玲瓏映徹也登涯由浮橋  
返寓按圖志以索桂林諸可遊者

初二東出浮橋門渡浮橋又東渡花橋循山北轉山峙花橋東



北七星岩<sup>即</sup>倚焉。岩西向，下有壽佛寺。寺左登山，一亭翼然迎客。曰摘星。石崖橫騫，其上僅可置足。然俯瞰城堞，諸山甚暢。亭左佛龕當岩之口，入其內，不知其爲岩也。推龕後扉入，歷級上約三丈，忽轉而西北，豁然中開，上穹下平，多列筍懸柱，爽朗通漏。此上洞也，是爲七星岩。從其右歷級下，又入下洞，是爲棲霞洞。洞雄拓，門亦西北向，仰眺崇赫洞頂，橫裂一隙，鯉魚自隙中懸躍下向，首尾鱗鬣酷肖，傍盤結幡蓋，五色燦爛。西北層臺高壘，懸梯而上，曰老君臺。由臺北向洞，若兩界，西行高臺之上，東循深壑之中，由臺上入一門，直北至昏黑昏處，垂石上穹，無際下陷成潭，傾洞峭裂，忽變夷爲險。返下臺，仍至洞底，導者携松明前驅，循臺東壑中行，始見臺壁攢雲錯綺，備諸幻相。直北入一天門，石楹垂立，僅度單入，既入，穹然高遠，左橫列石欄，下深黑，杳不見底。云獺子潭，即老君臺北下墜處。至此高深易位，又成一境，內進兩天門，路漸東北轉，崖石詭變多所仿類，導者行急，予強留諦視，顧此失彼，然予所欲睹者，正不在種種規擬也。又踰崖上，東有潭淵，黑如獺子，宏廣更過之，是名龍江。下與獺子潭通，又北行東轉，過紅白羶，鳳凰戲水，穿一門出，忽見白光一圓，內映沉璧，遂東出後洞，水自洞北環流南入洞中，想下爲龍江者，小石梁跨其上，宋相曾布帥桂時所爲，易名曾公岩。蓋與棲霞一洞潛通，兩門各擅耳。予停立橋上，見淵中有浣汲者，予



訊水從西北來可溯入否其人謂水穴之上更西北可深入數里名勝較倍棲霞水穴則深淺莫揆惟寒辰肅月為可涉予即覓其人為導其人歸取松明予隨之出洞右得慶林觀期觀中炊以待遂同導者入仍過紅白羶始由歧北向則佳偉殊麗觀繁錫嘉稱最深入遇潭淵杳當橋湖上流導者阻進謂前炬數日鮮竟遊屐抵此從無入者况當夏漲襄陵可嘗不測乎乃返計自棲霞達曾公岩徑約二里復自岩口出入盤旋三里洞之觀止矣飯慶林觀望來時前所見搔首峰即立其東從閒道出其下則峰下西開一竅圓者廬之北復有岩洞種種遍曾公岩上下左右殆難數紀也循七星南麓北向草莽中連入三洞計省春

當在北可踰嶺達遂北循嶺均微徑里半至山頂石骨峻增不容着足石隙少開處棘刺沉翳愈窮扳躋然石片布奇峯瓣分異遠望掩映愈披愈出令人心目勞遷又里半踰頂下復得鑿石之級級盡即省春岩岩三洞排列俱東北向最西者竊雲上飛有倒石下垂如枯槎老龍西入南轉洞漸黑惜無居人莫索炬入洞右旁通一竅以達中洞甚深不能遠入洞前垂石亦作槎勢又透一門以達東洞東洞垂石愈繁洞亦旁裂中有清泉下注成潭寒碧由洞前循崖東行洞上聳石如人立獸蹲東則危崖互空仰望如劈其下拖劍水下滌之即癸水也源發堯山抵山北麓西出葛老橋入滴水時予轉至東山隅仰見崖半裂層竅者



三乃披莽隙梯懸累上。既達一竅。西通中竅。中竅卑伏。首不得伸。從外橫度。有同臺榭。不由中奧。竟達第三竅。穿隙入。後有一龕。窻闕其前。中懸玉柱。柱左又龕。一圓頂平座。前正對玉柱。予同靜聞分踞柱前窻隙。下臨危崖。行道者仰望。無不徘徊忘返。二村樵仰睇久之。亦躋登。謂中竅之上。尚有一洞。甚宏。欲爲予扳躋上。求予在下倚松陰。從二樵仰睇處反睇。二樵在上懸枝索級。終阻懸漢。莫能階升也。仍西入省春。出西洞。又得二洞門。北向。再西者高張五丈。內稍下西轉。雖漸昏黑。勢崇宏愈甚。以無炬中阻。左崖大書深刻五美章。乃張南軒筆。惜無知者。洞莫定其名。或以爲會仙岩。彈丸岩。岩壁采莆田陳黼題。則渚岩洞也。洞之西拖劍水。自東北直逼崖下。崖愈穹削。插霄凭淵。良極雄偉。石梁跨水西渡。已爲七星山西北隅。名彈丸山云。由其西南渡葛老橋。東望崖巔有洞高竒。上下都窮峭削。南有一崖架廬。亟東向登山。山下一刹。與壽佛寺七星觀南北鼎峙。南爲七星觀。東上卽七星洞。中爲壽佛寺。東上卽棲霞洞。北爲此刹。東上卽朝雲岩也。仰板磴數百級入岩。岩亦西向。在棲霞北。洞口高懸。內北轉。穹危愈峻。徽僧太虛駕閣洞口。絕壁下。瞰江城遠。揖西山甚暢。遂停宿。因問上岩道。太虛曰。此岩高聳。雖予近在崖右。曾無級可登。約洞之南壁。與此洞北底。隔祇丈許。洞內可鑿空以通。洞以外更無懸杙縹級處也。凭欄北眺。洞爲石掩。反



不能近矚。惟洒髮向西山。歷數諸峰耳。西山自北而南。極北為虞山。稍南為東振門山。再南為桂山之木龍風洞。最南為伏波山。此城東一支也。虞山之西。極北為華景山。稍南為馬留山。再南為隱山。最南為侯山。廣福山<sup>王</sup>。此城西一支也。伏波隱山中。為獨秀。其南對踞水口者。為漓山。穿山皆漓江以西。故曰西山焉。初三。追錄遊記於岩閣。薄暮乃返寓。

初四。北二里至靖江王禮懺壇。入藩城北門。門內池水一灣。南遠獨秀北麓。由池西南經獨秀西麓。至靖藩精舍。主僧為予言。君欲登獨秀。須先啓王期。以十二日可登。乃出藩城西穿榕樹門。門北向。大樹正跨其頂。巨本虬根盤鬱閭闔。昔為唐宋南門。

元時拓城於外。門久塞。嘉靖己卯。大將軍周于德舒壅閉而門之。門之前匯水為大池。後即門頂巨壘<sup>石</sup>。級分東西上。亦有兩大榕。南向東西夾之。上建關聖殿。南面臨池。甚為雄暢。殿西下即大將軍幕府<sup>吳蓋</sup>。循城南一里。西出武聖門。北溯西江。又一里達隱山。山北倚馬留。西接侯山。四面有六洞環列。東為朝陽洞。寺在其下。洞口東向。下層通水。上層北闢一門。就石刻老君像。今稱老君洞。山北麓下為北牖洞。洞東石池一方。水溢麓下。匯而不流。外竇卑伏。而內甚宏深。前有庵<sup>田</sup>。庵後披隙入洞。圓整危朗。後復上盤一龕。左有一窻。西闢石柱旁列。不通水竇。其北崖之上。為白雀洞。在朝陽後洞西。門北向。入甚隘。前有線隙橫列。上徹



天光漸南漸下，直通水。又西為嘉蓮洞，亦北向，與白雀並列。洞分東西兩隙，俱南向。下墜洞內，時開小穴，彼此相望，數丈輒合。內墜淵黑，亦抵水。又西過一石隙，西北有石平度，錯萼中絕勝。瓊臺乃南轉為夕陽洞，西向。洞口飛石，中門為兩，門左一側壑匯水，由水竇東通於內。右有曲穴北轉，甚萋暗。下墜深潭，蓋南北皆與水會焉。又南轉西南山麓，為南華洞，洞南向，勢漸下。匯水當門，可厲入。深入則六洞同流，五洞之底皆交連中絡。惟北牖側另闢一水竇，初不由洞中通。云聞昔唐宋西江東滌，榕樹門隱山，匯巨浸中，是名西湖。其時諸勝者，俱云乘舟載酒入。今則西江南下，繁厥桑田，甚損浩蕩觀。予初至朝陽寺，月印上人

導由殿後入東洞，穿老君側出山北。西過白雀嘉蓮，皆北隅洞也。南過西隅夕陽洞，又南盡東轉過南華，則南隅之洞也。予欲從此涉水入，月印謂秋冬水涸，蟲蟄窮幽，無所憚。今漲甚，深處莫測。蛇龍窟宅，其中老僧不敢導。請北遊北牖，乃東過西湖神廟，北轉過朝陽，踰隱山東北隅。其處石片分列，如張幙如裁雲，如透月，幻極紛紜，潤以采澤，不啻削芙蓉，綴蛺蝶也。又西入北牖，庵予與靜聞分踞北牖洞西窓，內外周攬久之。出飯庵前松蔭下，復抵南華，遇一田叟曰：此水竇，旁通雖深淺疑迷，予獨熟過其內。君欲入，明當炬導。佐前驅，予強之，即入。曰：松明未辦，乃以詰旦期。予遂南過武勝門，及寧遠門，渡橋而南，西江走其下。



東分兩支入瀉。予東南循西江南分派一里抵灘山。山之東卽瀉江也。從山西麓轉其北。則瀉水自北西。江水自西。俱直搗山下。山怒崖騰裂。扼其衝。由磴上盤山腰。得雉岩寺。寺後躋石峽。躡青蘿閣。昏黑。下宿岩寺。

初五。客座遷除。遂成午節。令顧僕入郭市蔬酒。出坐雉岩亭。以蒲酒雄黃自酬。節况散酒。青蘿閣時方禁。龍舟舟人各以小艇私擢山下。鼙鼓雷殷。迴波陷日。旣暮下山。西入一洞。洞在山足。門西向。高穹中平。上鐫樂勝洞三字。出洞東循雉岩。崖麓沿江東憩。其東隅一石。上自山巔下插江底。中剜穴透虛。深二丈。高三丈。若闢門然。江流自北匯其中。涉其南透崖以上。卽爲千手。

大士庵。予濯足弄江。抵暮上宿雉岩。雉岩者。統志以爲卽瀉山。在城南三里。陽水南支經其北。瀉水南下經其東。東有石門。嵌江西有穹洞。深入。南有千手大士庵。俱列其足。雉岩寺高懸山半。北迎兩江。頽浪飛檻。綴崖倒影。澄碧寺西爲雉山亭。南爲雉山洞。洞外卽飛崖。斗發裂隙。迸峽直自巔下徹。旁有懸龍矯變。石色都異。前大石平湧。爲蓮臺。臺右根與後峽相接處。下透小穴。入西向臺隙。摩崖登臺。則懸龍架峽。正出其上。昔有閣曰青蘿。今移置臺端。登之不知其爲臺也。然勝概屬集。不以閣掩。是山正對城南。爲城外第二重案。山北一里。象鼻山。水月洞。南三里。曰嵯頭淨瓶山。荷葉洞。俱東逼瀉江。而是山在中較高。志遂



以此爲瀉山。范成大又以象鼻爲瀉山。二山形象頗相似。但雉  
岩石門不若水月擴然巨觀。故遊者捨彼趨此。然以予權之。瀨  
江午向三山。不特此二山相匹。崖頭西北山脚石亦剝空嵌水。  
跨成小門。其離立江水衝合。中三山俱可名瀨。又不獨是二山  
也。

初六。下山二里。過南溪橋。南溪之山。高峙橋東。南溪來自西南。  
直逼西麓。繞山東北入瀉去。白龍洞在山椒。洞門高張。西向臨  
溪。下廣列崇殿。仰望不知爲洞。由殿左透級上。得璇室如層樓。  
內有龕。自然爲一洞。絕勝處。從此北向東轉。遂成昏黑。先是買  
炬。山僧謂洞內可竟達劉仙岩。不必更出。及篝火入中。頗寬。

敞多岐。先極其東隅。上躋一隙。予以爲劉仙岩也。竟途窮莫進。  
又南下一窪。支竇旁午。予以爲劉仙道。導僧謂此乃護珠岩道。  
嶮巖莫逾。躑躅杳冥中。不若出洞平行爲便。乃下山至橋。望白  
龍北。復有洞盤空。余渴赴劉岩。遂從橋東循山南東轉。南面一  
崖層突。彌聳將捨之。忽山雨至。奔憩岩下。躋隙坐飛石上。雨簾  
外窺。內映乳幙。飄飄有餐霞想。久之雨止。下岩轉其東。至劉仙  
岩。岩與白龍東西分向。有觀在岩下。從觀右登級。先穿一門。西  
入。即踰其上。復透門出。得一岩。東南向。又左由透門之上。再度  
而北。亦開一岩。岩前懸石甚壯。當洞門爲屏。若垂簾然。予至岩。  
即周覽各竇。詢與白龍潛通處。竟不可得。乃知白龍所通。即避



雨岩下竇導僧所云護珠岩是也

初七由觀左登穿雲岩岩在上岩東南絕壁下亦東南向後與左右分穿三竇而左竇旁透洞前洞東爲文昌祠由其前東過仙人足蹟蹟北更上卽爲仙蹟岩岩在穿雲東北上岩正東隅洞口亦東南向外甚危亮內乳柱倒垂界爲兩重若堂皇之後屏列窻櫺分內外室者洞後穿竇兩歧俱不甚深奇在玲瓏彈致返至觀南二里出十里鋪鋪在鬪雞西郡往平樂大道又東向岐路入一里北望穿山高懸隔江空濛雨色中再前望崖頭北隅梳粧臺下飛石嵌江剗成門闕遠望較水月似小與雉山石門形勢倫匹然急流湧其中蕩漾尤異共一里東至崖頭廟

崖頭在雉山南瀉江西合陽江於雉山又東會拖劍水及瀉江支水於穿山奔流南下此山當其衝山不甚高而屹立扼流有當熊勢北崖有臺曰梳妝下卽飛崖懸嵌中剗成門處崖突波傾不能下瞰但見迴瀾素波觸石奮出砉然送聲至坐坐久之返廟中由其後入一洞門西南向穿門歷級下岬然通望一石肺秉空色正綠是爲荷葉洞穿葉底透出東北卽通望口也瀉江復滌其下由葉前南下東望深昧中勢穹然不及索炬入山東北隅石崖插江山稱淨瓶稱以此須汎舟沿流觀之其上莫也窺仍出大道十里鋪經白龍洞北隨溪探前望白龍左洞則立岩也岩東向洞門高聳下峽由南腋東入上洞東登必由北奧



俱崇深幽邃無炬不能遐歷洞前乳柱繽紛不減白龍上鑄玄  
岩字甚古出洞入寧遠門乃返寓

初八北出安定門東轉北入支徑登劉岩山有庵在山麓後爲  
劉岩洞洞西向東下淵黑由洞右躋危級上至明月洞洞高級  
危崖半門亦西向東入岬然然昏黑莫辨出洞下崖半循崖少  
北復一洞西向門紛縷高懸僧伐木縱橫洞前無由上躋乃梯  
登以上一石當門樹屏由左透隙則宛轉玲瓏踰石脊東下穹  
然直透山腹關門東出外臨層崖內皆乳柱充隙徑竇迸裂北  
一徑高穹下墜東轉昏黑亦有門東出闇不復下此洞東西透  
豁然有脊有門中界之不若穿山疊彩中隱南峯諸洞擴然平

通下望明皎內無餘奧也下山西過北門門西峰當面起削山  
爲城循山北麓轉至城西北隅下下盤層石上削危城當卽志  
所稱始安嶠也而北門在兩山夾中東西峰各峭豎起因依爲  
門鎖鑰甚壯予少憩盤崖上旋入北門南一里至桂嶺碑側西  
向瀕城復得一山爲華景洞洞東向前對大池後所倚山則亦  
因爲西城者洞前岩平朗上覆外敞後穿穴爲門分爲三南入  
者窪暗而邃西透之穴昔穿城外因爲門今已甃石塞北轉者  
上出崖前遂西登城陴循而升已從石蔓叢錯中扳躋山頂頂  
卽寶積山志稱寶積與華景相連上多詭石怪木然今又名爲  
臥龍山想以武侯祠易名耳下山二里抵寓



初九出文昌門，乃東南門也。正對南溪山，南過石梁，梁下卽陽江北分派，東轉一里，抵石山南麓，三教庵，庵後爲古雲崖，其山亦稱灘山，粵人呼爲象鼻山。山東隅亦有洞，南向，循崖東北，抵漓江盤山。溯江從右崖危嵌中得一洞，北向，曰南極洞，出其前直至西北隅，爲象鼻岩。水月洞貫其下，飛崖自頂騰跨，北插中流，東西俱高，剜成門。陽江從城南西來，流其中而合之漓，上空明如月，下復內外滌波，而插江之崖，下跨於水，上屬於山，中垂外掀，作捲鼻勢。水洞之南，崖半又闢陸洞，其崖亦自山頂東跨江畔，中剝竅若長廊，直透水洞，上北踞竅口，下瞰水洞，適有漁舟泊洞中，崖石間，令棹予遠出洞外，復穿入洞內，水陸勝觀，一時兼盡。乃南行一里，渡漓江東岸，又二里，抵穿山下。山西與鬪雞山對，鬪雞在劉仙岩南，崖頭山北，漓江西岸，瀕江之山也。東西夾漓，怒冠鼓距，兩山當合，名鬪雞，特東山透明如懸鏡，故更以穿山名之。山之西，又一峯危立，初望竟爲一山，上有豎石，抵其下，始見豎石下剖，直抵山根，亭亭夾立，山故以脔薄靈舉見奇，土人名爲荷葉山，殊得之。穿山北麓，嘉熙拖劍水直漱崖腳，循山之西南，與漓合，予始至其北，隔不得渡，望崖壁危懸，洞門或明或暗，紛紛錯列，卽渡亦不得上，乃隨溪南行，隔水東眺，則穿岩已轉，不睹空明，山側成峯，尖石豎指矣。又以小舟東渡，出穿山南麓，北面而登，撥草尋磴，一南向，巖高倚山半，疑卽穿岩。



乃其中乳柱中懸有曲折致東入漸窪黑水匯於中知非穿岩  
乃出由其西上躋始得崇岩廓然平達山腹徑山十餘丈高闊  
俱五六丈真徹望澄明通無蔽眺板外崖東轉又開北向一洞  
列並穿岩而後不中通其東尚有三洞門下可望見至此則峭  
削絕徑而穿岩南口上復疊一洞後亦不透然內多重幃殆爲  
穿岩架閣也仍東下匯水岩岩東復有南向洞內亦支竅西入  
隘黑無奇遂西渡荷葉山下北過訾家洲渡浮橋而返

初十抵王城後門登懺臺訂主僧獨秀期更移十三

十一出浮橋門過花橋問龍隱岩道爲橋東之南岩乃來時所  
過夾道兩山北卽七星南卽龍隱至是始得其詳橋上南眺龍

隱與月牙並列東崖第月牙稍北度橋循山其路易通龍隱稍  
南須從橋下涉江上其大道則自山北端拱石南踰嶺均循隱  
真而西又從怡雲北轉始達予欲并眺端拱石人遂橋東直走  
嶺下南上平瞻石人又南下得一大塘塘北循山西轉崖石俱  
盤削飛突里餘抵山西南隅峰益嵯峨疊異中空外聳上若鵲  
橋度虛板隙登則怡雲亭廢址也由其上轉罅梯空穿石罅上  
躋石片片懸綴則爲透夾平爲架橋如上竿轉塔無不曲折匠  
意下至怡雲右卽龍隱岩洞門西向高穹廣衍頂石平覆洞右  
垂柱環爲層龕重洞接影深流此爲最勝土岩仍從怡雲返花  
橋南沿西麓隨流歷磴半里入月牙岩岩西向南卽龍隱第此



則級石成道彼則斷壁斗崖路殊通塞耳岩上環西缺其口內  
不甚深峻圓缺分明有同鉤月下照清冷亦幽境也出由街北過七星餐

朝雲岩北渡葛老橋覓屏風山或有以黃金岩告者謂去城東  
北五里乃貿貿東北趨三里遇問負擔者指村北之山曰此卽  
是至村問之仍不知也及抵崖東麓則削崖列嶂平展危懸已  
轉北麓得洞門如峽山頂高穹兩崖闊五丈高十餘丈初南向  
平八十丈之內少東南轉忽明穴上開自下望之殆蜃市重樓  
矣從此高躋又十餘丈抵明穴之口采嫩松拭兩崖開蘇別醫  
得程公岩三大字西有記文一則蓋鄱陽程公崇寧帥桂時所  
開志載屏風岩一名程公至此乃爽然自釋也遂西向歷級上

登穴口其內岩頂之石層層下垂極爲雄峻將至出穴處地少  
平北奧有大石幢盤壘至頂色碧形詭何設奇至此出穴而西  
山迴峽轉石骨森豎下卽盤峰成窩窩底一洞北向覓徑西南  
下抵窩入洞洞不甚深卽西踰窩出兩石峰駢枝並起一爲石  
工剝蝕殆盡一猶亭亭孤立從石峯東更西南三里已出葛老  
橋西於是循朝雲七星西麓度花橋紛傳流警薄永郡省城戒  
嚴門已鍵亟馳過浮橋門尚半啓得返寓

十二西出麗澤門門外巨塘匯水水自西北城角馬留過脊處  
南抵振武門北入陽江石梁跨之曰凉水洞橋橋南北塘中蓮  
花盛放坐蔭橋樹下殆不能去予欲覓中隱山乃南至振武門



西渡定西橋一里。忽路右一山有洞岬然。北趨其下。前有古寺。拭碑讀之。西山也。洞門南向。東又裂石自峰頂下跨成門。乃捨洞趨之。其門南北豁然。亦如雉。山象鼻。但彼急流中貫。異於此。之外遶澄潭耳。然外跨之石。鼓疊錯出。尤異。露穎異。遂先遶其東。抵山北。北向亦有洞。穿洞而南。橫透山腹。竟與南洞貫徹。中有夾門垂柱。不似他洞。徹望竟月也。出南洞。洞左疊磴嵯峨。中循之。北躋峯頂。石皆峯筍攢簇。中旋為平凹。長者溝洫。光滑特異。下至南洞前。始東入石門。門乃片石下攢。中門高闊。旁通衆竅。故以小巧見奇。望西峰。石亦聳列。從寺後西歷其上。歷級南下。鋒鏘中西。循大道三里。聞木陵村有岩曰佛子。遂從西北岐入。

一 二里石峰在侯山東麓。洞門高懸。北抵岩下。岩之東二洞南向。最東者敞而不深。稍西則洞門側裂。外垂列柱。中橫一屏。屏後深峽下險。屏東西俱有門可下。由峽中北入其竅。旁裂漸隘。乃復出西上。入大洞。洞南下北上。穹然高透。頗如程公以松枝拭右崖所題。則宋呂愿忠題中隱呂公洞詩也。後署云假守洛陽呂叔恭遊中隱山無名洞。客有言此洞因君題。題當以呂公名之。因書五十六字。鐫於壁。始知佛子岩即中隱山呂公洞也。於是北躋後穴內。雲翼倒翥。與洞俱上。不作逼隘觀。穴口高朗。大過程公後穴也。北出口石磴二道。一東北下山麓。予先從其下者。北向之麓。皆崆峒幔覆。外有倒石界而為門。為窻。內蜿蜒旁通。



繞若行廊復道。此下洞以幽奇勝。既復上。從西磴復得一洞。洞北入。南亨。擴然平朗。頗似穿岩。南一石聳立如臺。上有石佛。不知其自來。佛子洞所由名矣。前有巨石柱如屏。中峙東西界。爲兩門。西竅廣正。自下遠眺。此竅直透北山。東則偏隱無所睹。竅外循崖東轉。又闢一門。下臨中洞之上。則爲關帝座。仍由洞北東下。穿中洞南出。西循山。又開南向一洞。與中洞並列。由其西板磴上。又有洞南向。雨漬滑磴。捨之。下山東南半里。飯木陵。民家民謂西南侯山下有銅錢岩。可透出前山。北向趙家山。亦有洞可深入。又有陳搏岩。頗奇。予念諸岩不能遍歷。侯山爲衆峰冠。岩不可交臂。失。遂由中隱舊道西一里。抵侯山廟。廟後山麓漫衍。踏水披叢。茫不得洞。但見有級上躋。鼓興登絕頂。山前行者高呼日暮不可登。乃遙望大道南。削峯東轉。有洞東北竄。立望之。趨南去里許。抵其下。洞高倚山半。前有瀦水。匯潭。潭上拾級。扳荆。遂入洞。亂石堆洞門外。外高內深。歷石級西南下。直墜洞底。水涯淵漠。內望一石橫突出。下有仄崖。嵌水裂隙。受趾。予抵突石下。予畏仄崖。峭滑。乃出下山。轉出其東南山背。復有門。匯水。卒莫定其爲何洞也。其處西峰駢聳。無侯山之高。峭拔過之。暮歸。急姑留爲後遊。二里南出大道。路旁夾道之山。上有竅東西透空。與佛子穿岩正等。亦不及入。執途人問前所入北向洞何名。則架梯岩一名石鼓洞也。紛傳城門已閉。竭蹶東五里。



過木陵分歧處已昏黑又三里抵振武門將闔矣側身入始從容行街市中

十三入靜藩城過獨秀西庵主僧入內宮禮懺登峰約復移之他日乃出就日門過木龍南洞由其下渡江還望木龍下層復有洞濱江穿麓滌流可愛上江東涯溯流北半里入千佛閣前有大榕一株問所謂辰山者俱莫曉隨大路東北五里堯山在東屏風岩在南獨辰山茫然莫辨忽北望一山去不一里穹然有洞洞口一石當門赭色斑斕癩炳有異問負芻者曰老虎山也予謂靜聞何不先了此後覓辰山遂北一里抵山下望高先登由洞口穿入其內天光自頂四射由北北下透其腹再入重門支

峽後裂層度上懸俱莫可度南向重門內板崖上躋遂履層樓徘徊未下忽一人來候洞前下問之曰洞名獅子一曰黃鸝岩山前三洞下曰平地中曰道士共此岩為三出洞見山頂石叢參錯乃循路上躋石片片冰稜鐵色下嶺石稜就夷棘道俱除前候者復趨上引予左入道士岩岩亦南向在黃鸝東稍下洞前巖左右各鐫詩拂讀詩敘是山固即辰山也穿洞東側門出東向下山一里飯所候者家主人王姓慶字字且訂予宿此乃東炬肩梯前導趨辰山北麓為青珠洞遊洞北向裂峽上並山頂內界兩層始南入十丈許板崖上稍西乃豎梯向北崖上躋既登北入峽中五丈餘透出橫峽峽東西橫亘上高俱不見頂



東行四五丈漸闢生光一大石柱中懸繞出柱西峽又南北裂南入臨洞底北出臨洞門上洞門中列二柱界為一門兩窻延耀內射正當圓柱子詭為奇導者曰未也轉進橫峽口又西行四五丈有竅南入甚隘悉去衣赤體伏地蛇行以進其穴長三丈大僅如筒又曲折中多懸柱時從遊兩人以炬先入次及予度稽一時過隘洞復穹然上崇下陷俯躬南降垂乳紛列迥與外別導者曰未也又西踰一梁梁橫南北若闔越梁西下石乳愈奇西窮復轉北上藻績滿眼彌轉彌勝此洞與山南黃鸞岩正南北相當然一山皆空環峙分門者尚多也北向開洞門者三此為中東西二門俱淺東向開洞門者五北為高穹中為三

曲狗頭南為道士東峽和合小岩而三曲最深南向者三即平地道士黃鸞也志稱辰山有洞三級第指其南耳惟西面予未之窮出青珠洞過北洞一東麓洞五循南入平地岩初入敲仄側身緣東隙而上內境既穹外光漸闕火炬已棄北隅暮色亦上出東北抵王慶字家

十四別慶字東北三里過矮山山在堯山西瀉水東北聳一枝如附姆指乃桂林石山最北首峰也山南崖削立下有白岩洞洞南向三竇旁通內垂石如蓮葉捲覆下多透漏其後少窪下輒復平曠轉西入數丈仍南穴天光出洞東向溯小溪二里抵堯山西麓又二里為王虛殿山迴成塢西向開洋由殿右轉入

東有菴于是



山後兩山夾湖。南向湖澗半里。踰澗東上登嶺角。益東北上升。降三四。又二里始登堯山絕頂。此中石峯林立。間得此土山。反以爲異。故堯山名特著。山之東石峯叢合。有溪盤遶。其間當卽大壩上流出。廖家村<sup>西</sup>者也。下山仍返西麓。南渡橋五里。出堯山。益東南馳松篁間。出林夾右轉石山而南。東南塢。其南石峯森森。東南一峰尤兀突。卽鐵峯山。頗似獨秀。下有岩洞不可入。西南三里抵冷水塘。小橋跨流急湧。西南去一村依山。遂澗亦幽棲之勝。村南石峰如屏。東西橫互。從西嘴望之。薄若立指。由其腋東轉南山之坳。出山南大道。直西馳共三里。過萬洞寺。則石山四開。寨山兀立其中。望寨山東崖。穹然壁立而不睹其徑。循山南抵西麓。乃歷級北上。當寨山西北隅。

崖開一罅。上架橫梁。踰<sup>梁</sup>入東貫山腹。已在嵌室內。遂託宿。

十五曉起。遍觀洞中。其洞西北東南前後兩闢。中通隘僅容一人。由西麓上山腰透入。飛石下旋。躡其上。卷石爲橋。以達洞門。門西北向。門內洞界爲兩。南北並列。北洞後卽通隘。透腹處隘長三文。既入卽寬闊。爲岩懸乳垂蓮。紛綸左右。東岩上下俱極崇削。下亦有深洞。路當山麓。南轉始得東上。予旣晨餐。西北望黃金岩。頗近。亟趨之。不復東尋下洞也。下西麓。過竹橋。由村右西北行三里。抵岩之陽。山骨立路北。下卽裂爲洞。南北交透。前卑後峻。後門之半。石橫架空中。門界爲二。由洞內上躋。北出架梁之下。俯瞰北麓。拖劍水直嚙其下。土人俱指此爲黃金岩。予



南下出洞西復有洞南向高裂深入不透僅如重峽已從西麓  
北轉山西北垂亦有洞西向中窾不甚深透對面有東向一洞  
與此相向若門廡對列洞內分四支如十字東北二門外透而  
明西南二峽內入而黑然西北皆懸崖上奧東其所入南乃深  
潭也拖劍水在東峰北抵此洞前轉北循山當洞有橋跨之橋  
內匯爲池亦山叢水曲之奧出洞不知其名問汲水池中者曰  
此洞不知<sup>多</sup>上更有一洞可尋躋也亟披箚透崖上南北兩石  
屏並立起微徑界其中甚峻洞峙南屏後門亦東向不甚宏洞  
右有舊鐫黃金岩三字可辨是洞始爲黃金前乃其東峰之洞  
也出門左見北屏內峽有躋<sup>路上</sup>爲夙莽所翳雨深蔓濕不堪置足

予強登之南轉則上洞也門北向門外棘蔓交絡縷分之乃得  
入入則旁竇外通重樓三疊度閣之石板裁蟬翼薄然無級罅  
可攀惟中洞之內旁竇玲瓏懸隙宛轉可穿而上第甚隘層折  
難舒於是解衣蛇行遂出上層平度閣上踞洞口飛石高呼靜  
聞下而迴望黃金岩西北麓諸洞尤多乃隨拖劍水遶山北麓  
又得北向洞二西向洞三遂西趨屏風山將渡拖劍水望屏風  
黃金兩山中又南界一山下有洞北向復迂道從之洞亦旁分  
兩門一北向一東向西有級上躋級崩路削又有洞北向乃下  
抵西北隅則旁透中空之洞峽連關與黃金西北同正西一洞  
高窾層裂紛拏傑張此又以雉武見奇非尋常窳窳窟也問之



土人知爲飛石洞。遂西渡石堰一里。入程公岩北二里。仍飯王慶字家。西再探道士諸洞。過屏風山西麓。至是已四周。其山入浮橋門。浮橋共三十六舟云。

十九。始定陽朔舟。

二十一日。中乃行。南過水月洞東。又南雉山穿山鬪雞劉仙崖頭諸山。皆從陸。遍遊者。惟鬪雞未到。今舟出其東麓。崖頭有石門。淨瓶勝舟隔洲以行。不能近。悉去省已十里。崖頭之南。江流浩然自放。又東南二十里。過龍門塘。南岸有山嵯峨。中峯最高。處南北透東五里。橫山岩突立江右。又東南十里。江右削崖屏立。南五里碧崖岩。岩南石峯隔江排列。起橫嶂。南天上分危岫。

幾埒巫峰五老。扼江使東。江流嚙其北麓。怒濤翻壁。赤壁采石。失厥雄麗。崖間一石。紋黑鏤白。章成泛海大士。曰沉香堂。其處南雖崇深極致。北岸猶夷豁。共五里。下寸金灘。南轉入山峽。江自是左右皆石峰。嶙峋爭奇炫詭。入峽下斗米灘。五里南田。站當臨桂江荆界。山遂轉峽爲塢。四面層圍。僅受此村。過南田。山色暮合。舟人夜棹不休。江爲山所泥。危南危東。盤峽透岷。凡二十五里。抵畫山。月猶未起。山隱空濛中。又南五里爲興平。月從羣峰東隙出。舟泊候曙。漓江自桂林南來。兩崖森壁。迴峰中多洲渚。分合無翻流之石。直瀉之湍。故舟行屈曲。石穴閒。無妨夜棹。第月起。稽緩。闇行明止。未免悵悵。



二十二蚤起曉月光流奇峰合棹南三里為螺螄岩一峰盤旋  
上轉峙江流興平水口山也又七里東南出水綠村山乃斂鋒  
予掩篷就寐南三十里則龍頭山復錚錚骨立而陽朔四圍又  
攢作碧蓮玉笋世界矣陽朔北自龍頭南抵鑑山二峰巍峙當  
漓江上下流中有掌平地乃東面瀕江以岸為城而南北屬於  
兩山惟西面壘垣為雉城西山最近者為來仙洞石人牛洞龍  
洞諸山通省大道從之蓋陸從西水從東也其東南門鑑山下  
則南趨平樂水陸並道正南門亦西北轉通省道直南為南斗山延壽殿旁文昌閣無徑  
他達正北即陽朔山層峰駢峙東接龍頭東西城俱屬於南隅  
北則以山為障竟無城及門東北一門在北極宮下僅東通江

水北抵儀安祠讀書岩然俱草塞人罕行其徑惟東臨漓江開  
三門以取水焉予上午抵城入正東門從文廟西入縣治蕪寂  
殊甚縣南半里有市橋橋下水西自龍洞入城出橋東即懸流  
注深壑壑大四五丈四面叢石盤突是為龍潭但飛流下搗不  
見下流所溢潭東即城大江流城外蓋地穴潛通也橋南鑑山  
獨聳一名易山即南借以為城者東麓有鑑山寺寺倚山臨江  
通道置門即東南門也西麓則正南門予初抵北麓竟道上躋  
東南二面就崖為城惟北面在城內有微級久為莽棘翳沒乃  
扳條捫隙直造峭壁下莽徑并絕復出其旁躡巉石盤旋半空  
終迷所欲登乃下時顧守舟僕期東南門外於是南經鑑山寺出



東南門覓舟不得。渡江東一里至白沙灣。舟泊其南。乃入舟白  
沙灣。去城東南可二里。民居盛於城。有河泊所。其南三峰列峙。  
最東一峯爲白鶴山。江南抵其腳。曲而東北。抱此一灣。沙土雪  
潔。其東南一溪。南自二龍橋來。北入江。溪在南。三峯之東。逼白  
鶴西趾。出溪東。又有數峯。自南趨北界。溪入江口。最北者書童  
山也。江以此乃東北逆轉。

二十三。從白沙依江東北行一里。南渡江。已出東界山之東。江  
東北岸有高峰。巖四尖。超特障江南。趨既渡坡塘。高下林木。脩  
然有澄心寺。可憩。東一里。過穆山村。復渡江而東。循四尖南麓。  
趨出其東。山開日曠。奇致愈出。前望東北。又起一峯。上分二岐。

東岐若僧帽垂空。西岐尤高。豎四尖。東枝銳若脫穎。與二岐西  
岫建標絕頂。各見雄振。迴眺西南。隔江下。皆尖崖並削。上懸雙  
岫。此卽書童之南。東界羣峰所幻。出隨江東五里。出二岐東南  
踰嶺下。是爲佛力司。司當江南轉處。北去縣十里。問之居人。始  
知二岐西峰最高者爲狀元峯。乃仍踰前嶺北去。西一里抵紅  
旗峒。鹿一里上斷磴。閒三里踰山坳。坳乃東西峯分歧處。西北度  
亂石重蔓。直抵高峯。崖畔有洞。東向。門高穹。上懸竅。兩重。簷覆  
出無由得上。洞前東向之峰。卽似僧帽者。其峯亦有一洞。西與  
山對。懸壑隔莽。竟阻不得達。予必欲一登峯頂。南北俱壁立。絕  
磴。從洞南緣峭梯險。轉從峭壁南直抵崖半。則穹然無片隙。不



復手足力所及遂下飯佛力肆居人蘇姓者謂此峯懸削曾無  
登路數年前峰側有古木一株其僕禱而登經級備窮峻阨然  
止達水所亦未造巔後遂問津者絕輒乃返白沙灣佛力司之  
南山益開拓內雖石峯離立外俱排山互嶺桂林秀出雲峯南  
盡於此聞樂<sup>平</sup>以下四顧皆土山巉厲之石不挺於陸而藏於水  
山自此而頑水自此而險也

二十四由白沙截江渡南峰下循麓東南又轉一峯有岩高張  
東向爲田家洞卽在白鶴山下軒朗平豁上繁垂乳白鶴東對  
書童山排闥而南內成長塢塢中舟行六十里可抵二龍橋出  
白鶴循北麓溯江三里入東南門肩炬由正南門出西北循大

道向龍洞岩二里東越小橋有兩洞西向其南列者謂龍躍岩  
地稍下門極危朗北洞地稍高草塞門徑先入南洞東五丈層  
陟一臺臺右有竅深入出由洞北登龍洞岩爇炬入洞闊丈五  
高一丈南崖半壁平互如行廊入數丈洞乃南闕頂始高後壁  
下方圓池各一深五<sup>六</sup>寸泉澄明如鏡屢斟輒滿池上連疊小龕  
俱無通道處由左壁窪陷處伏地入漸入漸小穴僅巨管大蛇  
行南透五六丈始可屈伸已而遇旁裂龕得宛轉達躍龍後腋  
出洞東望龍洞南列峰閭闔重啓異之遂渡溪東行棘莽沮洳  
中共一里抵山下初入西向第一門高穹如峽東入數丈北轉  
愈昏黑莫窮乃轉南得明穴西透西出洞門之上蓋南上西向



第二門也。由其外更南上西向第三門。洞東入成峽如初。洞峽底迫仄。峽上層疊有同閣殿。入五丈。下峽既盡。上懸重門。圓整擬剡琢。第峽壁峭削無可上。與靜聞索慮躋躡得上峽一層。最上層仍懸互莫達。出洞前仰望洞頂。又連啓兩門。此又南上西向第四門。第五門也。冀其中下通峽內重門。於是又過南上西向第六門。仰望懸崖倍高削。彌難慰。卽又過南上西向第七門。見石紋層異突出者可置足。竅入者可鉤指。遂反躬上躡。凌數十級抵洞門。洞北又夾均豎起高五六丈。始入上層。其夾光膩無級。計絕無攀<sup>所</sup>予獨審視周夾。雖無級罅。而夾壁宛轉。可以手撐足支。不慮懸墜。遂聳身從之。如透井。皆橫綳縱發。不階級磴

也。旣升夾脊。其北復隕成峽。窄映明透。知與前所望洞必有一通。因騎牆坐。上睇洞頂四達。高傳促靜聞久之。至教之如前法。登同從脊北下峽中。峽底平曲折北進西上高懸一門。則第六門也。不及上循峽更進。轉西出第五門。門有石龍下垂三四丈。由龍側北循崖端得第四門。穿門東入<sup>稍下</sup>次層。中廓然四闕。右向東轉。深黑無窮。左向西出。卽前第三門上層也。知重門若剡處當在其內。循崖窮之。復隔一柱。轉柱隙入門內。另環一函。不遠亦不透也。自第三門上連闕四門。初俱板躋無路。一入第七門。宛轉俱達。升陟重樓。復閣闕有莫公臣者。遍題珠明洞云。仍從第六門峽內西向板崖上。門雖高張。內外都無餘地。不若四五



二門外懸臺榭樓楹內疊也乃踰脊南下第七門門外循崖復南又得南下西向第八門洞亦成峽東上雖高峙鮮所旁徹此山西向八洞惟南北二洞不交引中央四洞最高紛紜曲暢較他處一二洞勾連輒攬奇譽真霄壤矣下山循麓南半里路東西各一峰屏峙遂由南門抵市橋入龍潭庵莫姓者隨予至問遊岩樂乎予以珠明岩誇之曰牛洞也數洞相連然不若李相公岩更勝卽在西門外不可失予仰日色尚高亟出西門携火炬從岐北行復西岐已繞此山東北兩面蓋卽前屏峙路旁東峰也繞至西麓洞正西向西峰門右鐫閩人李杜記諡爲來仙洞入洞東行不甚高爽南轉遂昏黑秉炬東南入乳竇初隘漸進愈宏放瓊苑雲葉繽紛上下東北轉成穹峽高不見頂其垂突蹲裂種種開勝峽忽下墜淵昧不可以文計炬火星散投之沉沉杳不得其底其左削崖不能受趾右乳柱紛楞窻戶歷歷隔崖探以炬內若行廊玲瓏似可遠達松光相盡將乃由舊道出東入西門出東南門渡口桂林舟人已艤舟待遂下舟宿二十五舟過水綠村北七里西岸一岩門甚高敞東向臨江前垂石成龍曰蛟頭岩由峽右腋深入漸高黑由岩左登前互爲臺後結爲竇危樓之竇後深陷成峽以無炬返時舟已先移待興平出洞循麓溯江半里達螺螄峰下繞峰東麓又二里及舟北過興平二里泊



二十六北五里抵畫山。山橫列江南岸。江自北來。至是西折。山受嚙半。剖爲削崖。石質錯綺成章。舟人泊舟山腳。晨餐。予乃登其麓。與靜聞選石踞勝。崖半洞北向。望之甚深。高下都無着足處。又北上。小散大散灘。至鑼鼓灘。共十里。其山南岩竅有水中出。緣突石飛下。墜江勢同懸瀑。粵中皆石峰拔起。水隨四注。無待破壑騰空。此瀑出崇竅。尤奇絕。又共八里。過攔洲。西北岸一峰純透。初望之。疑卽龍門穿穴。以道里計之。始知另穿一峰。前以夜棹失之耳。又北三里爲冠岩。蓋江東岸。巖丹碧煥映。采艷畫山。冠岩卽在其北。山上突崖層出。麓竅一洞。西向臨江。水自中出。外與江通。棹舟入洞。門甚高。內更宏朗。悉懸乳柱。惜通流之竇下伏。無從遠溯。久之。棹舟出洞。望隔江羣峰叢合。憶前攔洲所見穿山。當正對其西。惜溪迴山轉。并其峰亦莫能辨識。頃之。忽見<sup>北</sup>皎然一穴。另懸江東。峰半卽近在冠岩北。亟登岸趨之。期舟候南田站。一里抵山腋。踰嶺度明穴。在東南面。絕崖不可扳。反循岸北稍下。則洞果南透。其山甚薄。上穹如合掌。中罅北下。俱巨石磊落。南則峭崖懸互。故登洞道必由北。洞東皆旁門複室。東北彌深。仍轉洞西北隅。又得一洞。南北橫貫。其北峯之麓透而不敞。仍南出西北。行平疇中。其西隔江屏立者。皆穹嵯削壁。陸路望之。更覺崢嶸。東則石峯離立。後崇巒<sup>托</sup>共四里。至南田入舟。



二十七。經橫山碧崖諸勝。無閒昔遊。橫山岩東向。右腋有竇。旁穿而南。南復闢一洞。甚宏。有門。有奧。奧西上。則深入昏冥。奧之南墜。皆嵌空透漏。門在墜奧東。廓然凭流。與前門比肩立。又西北過龍門塘。南望橫山岩。西透頂峯。雖似穿石。無從上躋。夜過新江口十里泊。

二十八。昧爽。亟推篷。已過崖頭山。十里抵水月洞。北城下。入浮橋門。

二十九。入潯藩。訂獨秀期。主僧辭甚遼緩。予初擬再至。省一登獨秀。卽往柳州。至此失望。悵悵。

三十。炎威莫支。倦臥寓所。

六月初一。流寇訛傳。薄衡永。藩城愈戒嚴。予遂無意登獨秀。獨秀山北面臨池。西南二麓。予俱繞其下。西岩亦已再探。惟東麓與絕頂未登。其異於他峯者。祇亭閣耳。

初二。同靜聞再爲七星栖霞遊。由七星觀左入。卽登級爲碧虛閣。閣在摘星亭左。予昔遊急於七星。以爲此軒閣無煩履齒。後累經其下。上見岩石倒出。異之。至是遂先入仰視。閣上爲瓦所掩。不見岩頂。旣轉入玄武座右。豁然透空。高跨頂上。如梁。類穿山月岩。惜人坐閣內。不見出閣後石垣外。始見亂峯飛石。森列掩映。訊閣僧。後山道何向。曰。須南自大岩庵。乃出。仍登摘星亭。入七星前洞。由閣後東上。數十級。得小坪。石盤其中。遂北轉。透



重門出門東壁外崖裂竅懸雲予亟解衣上連躋重龕二層俱  
列戶疎櫺勢同垂幄北下卽棲霞洞盤空西向矣此山岩洞駢  
峙棲霞在北下透山之東西七星在中曲透西北出碧虛閣在  
南亦東西上透三穴並懸六門各異北又有朝雲高峙兩岩皆  
西向此七星山西面之洞也洞凡五下棲霞南入大岩庵望碧  
虛岩後山石叢薄可由庵外東北登遂從庵右草坪中上共一  
里得坪一區小石峰環拱之秀薄層雲西卽碧霞岩透明穴北  
卽七星山頂與餘峰攢成斗列者覓小徑出東南坳中下山共  
一里得一岩東南向西下卽曾公岩也曾公西又有洞在峯半  
板菴上洞口亦東南向初由石峽入得平展處稍北轉外復有  
龕東列後則穿門西入內益崇空深轉杳不可睹遂下山出花  
橋東街此處岩洞駢峙者亦三曾公北下同列者又有二岩予  
昔遊省春先經此俱東南向此七星山東南之洞也洞凡五若北  
麓省春三岩會仙一洞旁又淺洞一俱於前日履經者則七星  
北面之洞也洞凡五一山凡得十五洞云返寓於肆得桂林故  
勝西事泮百粵風記上諸書按部考勝者竟兩日  
初五讀清秀岩記卽出西清門覓之門在西北隅城外削崖之  
半有洞西向出渡城濠壩西有二歧一循山北行卽北門西來  
大道石峰突峙其北片片若削下開大洞西南向日橫洞一從  
山南入峽疑卽清秀道遂南西行一里峽南北山俱中斷開徑



四交徑西北有洞南向覓道北入愈入愈深旁絕他竇夾危底

正岳有山屏立峽中者下有牛角洞

平灣環以進莫測幽際出問行者曰黑洞也問清秀何在曰由

北徑出峽有塘曰清塘西南瀕塘為下莊洞無所謂清秀者予

意清塘當去清秀不遠遂北轉從大道出峽峽門東西崖俱有

小洞無徑道可登北出臨塘潄水一泓凌山西北麓循之西路

忽歧山南上板躋漸高後磴仰望都無懸竅知非洞所在乃下

南嵌崖來北俯淵碧出塘而西其南山迴塢轉別成一壑門殊

杳然仍返過黑洞西向屏立峽中山一里抵屏東北即有洞斜

騫門東北向南下漸窅昧為牛角洞出洞遠屏北而西轉出南

麓屏南岬峭削色黃赭下有窪潄水從山麓石岬出崖不甚高

中若崆峒即牛角南通穴至此墜成水窪也又南抵峽門北入

問清秀於道上人其人曰惟此峽有清塘上有洞南與黑洞通

此外無他洞乃悟清秀所托必不出北峽時已當午遂捨之南

炊隱山乃西過西湖橋一里抵小石峯下峯峭裂中介眾峰間

南瀕陽江峯雖小如蓮之間辨列房半崖坪中有石高丈許如

東北西三面俱短垣環之從西北隙踰垣披其東北抵小峯南麓

屏一角獨秀又盤空上片攢支削尤增奇幻搜剔久之出問其

聳從

名曰秋兒莊陽江西來循墜北岸西一里為獅子岩西又聳一

有壘垣可渡南即趙家山穆陵村中隱諸洞云

峯與獅岩夾有岩東向中垂一柱旁楞裂正東瞰獅岩首北轉

凭峭石之上

又一洞北向高穹曰天慶岩由級南下中互壁界洞為兩入數

丈兩峽復合其北崖之上重門複竅懸綴甚高望不可攀登此

峽

可直通山南北出洞西北行石山叢薄閒山俱林立圓聳石山

松陰石影又北里許經



西麓兩洞比肩。西向捫棘入南門。進五六丈。轉從北洞出。仰望洞上飛崖片片欲舞。為蝦筓山。西有林木迴叢。平時閒陽。江西環之王太守園也。仍從雙洞南登石磴。一里踰坳。西板石鐫上所板石。鈿若劍戟。石斷崖絕。中俱棘刺。遂出舞空石上。瞰北麓斗懸難下。尋舊磴下西麓。繞出其北。東一里至宋家莊。出牛角洞南。北過北峽門。北眺西峽。半有洞岬然。當即清秀。暮色已迫。遂趨入西清門。

初十始出振武門。取柳州道。西五里過茶庵。庵南小徑二里至琴潭岩。岩東有村。土人俱訛為陳搏。余得桂勝。方信儒記云。得清秀玉乳琴潭荔枝四岩。故前日首索清秀。幾及復失。以下三洞無知者。予疑陳搏即琴潭。及今抵其村。覓一人為導。聞東南有七寶岩。先趨之。乃東南渡南溪上流。共三里至李家村。村南石峰西向巉突。若不深而峭。蓋在南溪白龍潭正西向。遊白龍時西望羣山迴曲處也。返陳搏村。導者負松明并梯至。西趨小山南。先觀水洞。門南向。水匯其內。浸洞口。洞中衍。四旁皆水所際。其左深入洞前。左崖瀕水。趾刻琴潭二大字。即信儒筆。洞左復開一門。後與洞通。中多列柱垂葩。嵌空虛度。予既得琴潭。知荔枝當不遠。導者篝火執炬。請遊幽洞。徵幽洞何名。果荔枝岩也。遂出琴潭。沿山左瀦塘行。遠塘北轉而西。至荔枝岩。門東向。不甚高。西進數丈。循洞底。右竅入其下穴。有方池。四旁甚峻。再



東南轉平入數十丈。兩度低隘。右崖半一竅。高闊僅盈尺。內洞  
平竅。潛水齊竅。引首竅中東望。其水廣濶。中石龍蜿蜒。南崖石  
盆一方。平度水面。不能以身入也。出至洞底。少西進。循一右竅  
入。上峽東有石幢圓立。繞出其後。忽度為兩層。下穴少西轉。輒  
止。上穴以梯上躋。內復列柱分楞。窄楞少西。遂下南峽中平。入  
數十丈。又南旋成龕。龕外洞頂亦復龍形天矯。仍出洞底。又循  
北竅入上峽。則層壁紛垂。懸蓮徹柱。雜然綴壁。大抵此洞以幽  
悶見奇。而深入在右。水竅側小石彈丸。大多磊落。痕荔枝定稱  
以此出洞西北三里。抵大道平塘街。西石峰峭甚。夾立如門。南  
峯山頂開穴。達山腹。予向尋銅錢岩。過此神動。今亟問道。知道  
旁油坊後轉東南。至古廟可登。乃曳杖過油坊南。無徑可入。遂  
巡得蛇道。伏草間。隨山麓東行。南轉將抵古殿。見有路西上。從  
之。始捫級。既乃梯崖。崖窮陟峽。棘蔓擁沒。髻頂鉤不能出。久之  
抵叢石。崖下其上分形設詭。計透明之穴。已與比肩。乃橫陟而  
北。逾轉逾出。峰頭俯嵌。崖削窟反在其下。下有高呼路。悞指予  
下踐之級者。隨其指下。呼者乃二牧翁。云登崖道尚古廟南。  
遂從廟南歷級上。西南轉出小坳間。眺其南一峯。枝起頂豎。一  
石高數丈。予所見石峰綴立。雁宕翔鸞龜峰靈芝。及此地笋石  
駢發。未有靈怪至此者。度已出崖後。瞻石壁下。猶未見洞門。日  
暮。遂返宿平塘。期明日導遊。



十一從古廟南登山導者揚鑣斬棘共一里抵昨返步處石隙中登數步洞門西南向又板石崖數步即入洞其門前向東北後向西南徹望通明後洞正對豎石峰導者謂洞曰榜岩山曰楓木亭山由過古廟南由田塍中渡西來小澗水自兩路口西塘迤邐東穿山麓即南溪發源也東南入石岩洞門西北向後門東北向中空洞旁裂後門右崖有臺架虛上又盤蓋隆起悉窻楞隱透出後洞北一里仍抵平塘街街北石峰巒岿若屏東隅有崖東向日社岩街西北尋銅錢岩即架鼓岩也西二里經兩山峽峽北山巍然負宸下爲廣福王廟峽南山東有岩門東向西出峽是爲兩路口市肆盛列西北爲義寧道予往柳州則

從西南永福道路東有岩西向門甚紛紜多所像類西四里路右小峰如佛掌高擎下合上岐於衆峰中尤詭異其南又駢峙兩山東成峽峽南之山東層裂兩岩上岩明透山後亟南趨之祇下岩可入上岩懸壘莫登乃入下岩岩中列柱牽帷爲峽爲窻轉透其後橫貫山腹予意由後竅西出可反躋上岩透處乃上下俱削旁絕階援仍東出洞前東北隅石頗坎坷板隙登上層則前後二門俱與下岩並列門內乳帳蓮柱左右環轉以達後門數丈之內紆折無竟前門一臺正對東北合掌峰凭後門龕牖遙瞰西南塢外之奇收攬都盡予所見粵中重樓之勝此爲第一下西向行又見重樓北麓復有岩北向此峽南之山也



在峽北者西向亦有二洞層列洞門俱石色赭黃獨為標異但一出峽匯水直浸兩峽西中壘石堤互水面旁皆巨浸無從渡水一登赭岩又聞有八字岩亦不能至由石道西行匯水中望西峰之東崖壁高互上懸三洞相去各二十丈俱東向駢列其山在匯水西南與東峽南峰東西夾塘成匯遙睇崖端俱有微痕自南之北可上躋惟北洞斬然懸絕特不可階遂循堤西草徑傍水而南已抵南洞下梯崖入洞門甚崇內崆峒宏峻規模迥別稍一歧由右入西南轉漸昏宵莫窺底止一歧由左入不五丈則一門西透山後一門北通中洞先西披後岩洞門高與東埒上下俱懸崖斗巘仍入內北上中洞洞亦北轉而東遙望西南對山亦有洞若梁門廣中邃曰牛洞東向巖黑而不知其涯探其北轉至洞門

有石內度架為兩層上壘閣倒向洞內下裂門嵌壁間即所望北洞也仍入中洞內東臨洞門門愈高穹下則崖危路絕遂循南洞出由舊級下一里北出大道西循南山北麓行三里越一平坡其南北岩洞甚多不暇詳步南至通城墟又南一里為上岩後洞門北向前臨深塘入其內廓然崇宏峽分左右進右峽下墜為淵石壁東西夾峻不可下其底南眺沉沉壁西之崖迴覆淵上予所駐足下瞰者壁東絕壁之下駢通二穴若環橋連互水通其中不知所往北則石壁自洞頂下插淵底壁半裂柱成隙泉淙淙隙端下注出右峽由左峽上蹲石當門中聳為臺臺上一柱支頂路從柱南北入內復有石崖自洞北南突若塞



門與洞南壁夾成罅。路循崖南西出，繞崖後，外穹爲門。門下橫  
闔而上，多垂簷。踞闔坐，門外峽復峭峙，兩旁多倒懸下攫之石。  
若龍爪猿臂紛拏，其門俯仰兩絕。出洞，循其東麓，復開東向門。  
內窪下滴水空聲，轉南漸黑，當卽通後洞。環橋水穴者，洞南則  
上岩村，村後疊石開逕，曲折上爲上岩前洞。門東向，高齊後洞  
肩，深折不及，洞側有臺趾，由臺直躋洞後，遊竇成龕，垂石如距。  
有垂至地下，離一線者。有中懸四旁，忽卷者。有柱立輪囷，其中  
者，有爪躩分出其歧者。其東南對山有泉源，曰龍泉云。下洞仍  
出後洞塘北，西向入東來大道，度高橋共十里，至山蚤鋪。其四  
旁雖土阜，闕出石峰，尤屹突焉。又三十里抵蘇橋，爲洛青江上。

流水始捨桂入柳去，予遂與桂山別。



西南遊日記四

十二自蘇橋登洛容舟順流西南五十里過永福縣又八十五里泊新安鋪

十三一百二十里抵洛容縣陸去柳州府五十里水須三日溯柳江乃至遂定騎為明日陸行計

十四出城南西二十里為高嶺鋪南寨山秀立其南乃南折登嶺共五里直抵南寨山西柳江逼其西崖舟人艤舟以渡有小

溪自南寨破壑西注柳江曰山門冲江東西為洛容馬平界去

治各二十五里登西岸瀕江南向行為馬鹿堡東望隔江南寨山分枝聳秀亭亭露奇又五里西向踰坳入則石峯林立夾道





南峯曰羅山頂北向有洞斜竊開兩門仰眺無躋扳路西麓又有洞駢峙其北峰東面峭削尤甚西二里小峰中峽立曰獨秀

峰迴眺羅山西麓洞心異之遂從歧東南披宿草一里抵羅山

東轉循其南麓

西南角北望山半亦有洞南向高少遜北巔而背面正相值轉山之東遂踰坳北入一坪中開其右峰北巨石數十丈斜疊起

衣折古勁逼肖左崖之北雙門墜峽下內洞北向深削成淵底伏流澄徹兩旁俱削壁數十丈南進窅然莫規其源北抵洞口

壁亦蕪絕上有橫石高二尺如闕可坐瞰其底無能踰險下也

坊後有洞東向中甚高平寬朗探其左北轉漸里隘右則石愈昏邃莫後有透明處久之不得出仍從

北出峽門上有道直上西峰得石坊二里轉西麓先入一洞

石坊共

轉而西進黑不可捫石轉窮於水出洞又北即向大道所望洞

東下

洞門亦西向連疊兩重洞外一大石橫臥當門峻不可踰北有隘側身以入為下洞中懸一石復界洞為兩南北列先從南門入稍窪下南壁峻裂非扳躋可及北崖有微隙正穿入北門內內亦下墜東入洞底水聲汨汨與南洞右轉之底下穴潛通由北門出仰視上層石如荷葉下覆虛懸徑絕上躋復從南門側左穿外竅得旁龕龕外有峽對峙相拒尺半其上南即龕頂盡處北即覆葉端從峽中手扳足撐遂挺虛凌其上上層洞東入不深惟洞北裂岨成竇環柱通門石質乳態各各創變板隙西透崖轉南向開二楹下跨重樓陽朔珠明外此為最出洞返獨秀峰下西向大道馳五六里北望兩尖峯亭亭夾立南則羣峰



森繞中有石綴出峰頭纖幻殊甚。又西五六里，柳江自南而北，卽郡城東繞之江也。西渡江二里入柳郡，郡三面距江，故曰壺城。江自北來，復北折而去，南環甚寬，北來東形正，與壺等，寓郡治西。因靜聞病臥，予亦數日不出。

十八始出大南門渡江，江之南稍西爲馬鞍山，最高而兩端並聳爲郡案山，稍東爲屏風山，形伏處方正，東北爲登臺山，則又高，乃扼江北轉者也。馬鞍山尖峰聳削，曰立魚山，山特起，復有山映之，非近出其下不能辨。立魚當賓州大道，在城西南隅。由山東北麓躡級盤崖上，岩門東向，踞山半，門外右上復旁裂一龕，若綴閣，其左下拾級數層，又另穴一竅，雙峽夾壁，高穹直入。

皆門以外景也。入岩，張巨吻，中寬夷整朗，後通兩竅，一南一北，皆穿腹西入，先由南竅進，內忽穹然高盤，西復透一門，踰闕出，西臨絕壑，遙矚西南羣峰，開繞延攬甚擴。由門右窄峽竅以下，復有洞西向，石柱中懸，柱後穴卽前洞所通北竅也。門內左循岩壁上，洞橫南北，勢愈高盤，頂有五穴，乘空紛若<sub>王</sub>，其下東開一峽<sub>穴</sub>，前達僧棲，置鍵不通行，稍南西轉，下峽復西透一門，前亦下臨西壑，門左轉入，內亦下墜成峽，直迸泉底，深峻不可下，緣其上，捫崖透腋，又南出一門，前一小峰枝起，與大峰駢立成坳，從其間，板崖梯石，直躡立魚巔，是洞透漏山腹，東開門二，西開三門，南開者一，頂懸側裂，復十餘穴，真異境矣。遂仍出前洞。



門右歷級南上少憩僧廬東瞰山下塘匯水一方內沁不知所去東北平對者即馬鞍山西北麓為仙奕岩居人祇知馬鞍不復曉仙奕實無二岩也東南所對乃馬鞍西北枝峰峰有壽星岩岩後重岩迴複為馬鞍奧境非一覽所盡予欲候靜聞併仙奕俱留為後遊

十九留顧僕伴靜聞寓中予獨挈囊為融縣遊出西南門得沙弓小舟同舟者明晨行竟宿沙際

二十上午始發舟循城西北溯柳江江之西鷺山亭亭獨立曠野中自柳郡西北兩岸山土石間出土山迤邐間忽石峰數十挺立成隊所異陽朔桂林者彼四顧石峰不受寸土此則如椎

處囊中尤覺有脫穎異北二十里泊古陵堡

二十一過杉嶺江右尖峰疊出共五十里抵柳城縣城西江道分為二自西來者慶遠江也其源一出天河縣為龍江一出貴州都勻司為烏泥江經忻城北入龍江自北來者懷遠江也其源一出貴州平越府一出黎平府流經懷遠融縣至此二江合為柳江所謂黔江也下經柳郡歷象州與鬱江合於潯今分潯州南寧太平三府為左江道以鬱江為左也分柳州慶遠思恩為右江道以黔江為右也然鬱江上流復自為左右二江則以雲南交水南盤江為右交跡廣源州麗江為左也二江合於南寧西合江鎮右左右二江指此今則以黔鬱分耳南盤自交水



下田州至南寧合江鎮合麗江是為右江北盤自普安經忻城  
為都泥江入黔江經象州至潯郡合鬱亦為右江是南北二盤  
在廣右俱為右江但合非一地耳雲南志以為二盤分流千里  
至合江鎮合則誤以南寧左右二江俱源自盤江不知南盤無  
關於麗江北盤且不出合江鎮也下午自柳城北溯懷遠江入  
又十里抵舊縣

二十二暑雨時作僅行三十里

二十三西北十里過草墟江右崖壁甚峭秀又十里江左山崖  
迴互內遙峰森列攢合天半於是舟反東北轉十五里抵沙弓  
融縣南界也江之西南即為羅城縣東界西望隔江羣峰匯聚

處皆羅城道中所由也

二十四仍附原舟向和睦墟先是沙弓人謂明日乃和睦墟期  
墟散有融縣歸舟原舟亦往墟買米故仍附之行舟自沙弓西  
即東轉北一里有江來自西北舞陽江也內灘石甚險又北東  
九里抵和睦墟已散不得舟得一荷鹽歸者乃附囊與之行北  
二十里大道直北向縣而荷行李者家與梁西北遂同西北行  
二里上雞籠嶺西大山曰古東山山北東隅為東梁抵縣大道  
所經也越雞籠三里抵其家去真仙岩尚十里去縣十五里  
二十五北取真仙道過讀書岩岩有二門俱南向東西並列相  
去數丈外嶂駢崖中通橫穴若複道行空層樓內朗垂蓮倒柱



鈞連旁映甚軒爽可憩西有小石峯特起田閒旁絕延附亦有  
門東向并越水畦入之初入覺峽逼無奇穿門西進罅遊十字  
西既通明南北俱裂竅土人架木竅間若欲爲懸閣以居者又  
西循溪滕里許抵赤龍岩岩北向高穹山半洞前北突兩峰洞  
當其中高曠宏邃底平而上穹門內石臺兩重界其閒洞右列  
柱分楞別成敞室中洞直入數丈脊稍隆起成仙田中每貯水  
更入漸窪黑闇內門東如竇止容平身入入則廓然通別竅恨  
不携炬一竟其奧山前有溪自西來分兩派東底東梁北匯安  
靈潭爲靈壽溪之上流卒山北越溪北山有洞駢立門南向雖  
高穹側裂中乃下旋如墜螺門外右躋復飛嵌懸崖趣豐凭踞

乃下此山北正與赤龍南北對讀書則東西肩列北趨閒道正由

北山讀書兩峽中北山東隅復開東向兩岩曰鐘洞岩北岩淺峻

若豎鐘剖其半南岩門高層穴屢引上透無級入下洞當門巨  
柱中懸環轉無餘地遂下直北趨二里越一脊脊北爲百步塘

尖峰四列中開平臺一圍循山右轉又一里山分突三峯北向

列西一峰山半洞門西向會中峰洞東向東峰洞西向先登東峰

洞洞南北遊橫峽斜竇有石自山巔下嵌峽底四面可繞而出

次登中峯其洞北竅下裂上懸南牖石飛架其閒上牖前突石

臺憩臥甚適下直北徑百步塘三里越塘北小溪自古鼎來橫涉之又

大溪自南趨北卽赤龍岩前水東過東梁至此二水合而北行



一石梁橫度。於是東西俱駢峰成峽。溪流其中。曰靈壽溪。北一里。匯為安靈潭。神龍之所窟也。又北里餘。山當面橫列。洞門開張。山半。余疑真仙岩至矣。至則路轉出其西麓。遂東行環遠其北。復有洞。不識中貫高洞否。時真仙岩尚在北。北即安靈溪水流。

入真仙後洞處。予未悟。東循山麓出。北轉一里。與東梁大道會。峰轉溪怒。始見真仙前洞。東北懸高溪流。從中北出。前有大石梁二道。越梁而西南向入洞。洞門圓迥如半月。高穹中剜。一山之半。其內水陸平分。北半高崖平敞。南半迴流中貫。由北畔陸崖入數丈。中壁橫拓。分二道。壁之西有竅南入。僧棲倚之。壁東南溯溪岸深入。巨柱中懸。上下綴旒紛鬱。稍後則老君危然鬚眉皓潔。皆玉乳所幻結。故又名老君洞。其洞則千門萬戶。乳像愈

極繽紛。以無炬未及入。下則溪匯為淵。前趨峽壁。激石轟雷。其隔溪東崖。南與老君對者。溪上平聳為臺。後倚危壁。為下層。北與僧棲對者。層閣高懸。外復疏明。為上層。但非鵲橋不能渡。遂出憩僧棲。同僧參慧入市。隨之北一里。過下廊。又北則大江在東。即潭江。北自懷遠大融南來者。菜邕江。西自丹江橋遶老人岩至此。東入江。二水合流下廊。旁道當其中。北渡菜邕橋入融南關。約二里。城居甚寥落。問老人岩道。復從下廊北循菜邕江西南行。西抵一峰。石勢疊聳。迴削千仞。老人岩當北溯溪岸。予悞南入山峽。峽乃老人岩南支。與南山夾成者。南峰北麓。石磴盤山而上。有僧方汲。趨問之。其上為獨勝岩。非老人岩也。岩北



向高綴峰頭。僧廬塞其門。入其下。不知為岩也。穿穴入。內開一  
龕。稍窪。亦隙裂成樑。但無光透耳。獨勝北有鯉魚岩。即古彈子  
岩。聞甚豐乳柱。不及往。仍東北出下廊。溯西北小溪。抵老人岩  
山下。下有洞。東向。捨之。西向。拾級上。兩崖合東。懸磴其間。取道  
甚勝。已透入一隘。轉北上。至岩之前門。其岩一洞兩門。前門東  
南向。後門東北向。石崖高跨而東突。洞徹其下。前後相去不遠。  
亦穿岩類。惜前後俱障以佛廬。遂令空明頓失。從廬側轉入後  
岩。仰見盤空之頂。後岩僧樵未返。門閉不得入。遂留為後遊。下  
山出獨勝東峰。披蔓草行二里。暮抵真仙岩宿。  
二十八。參慧始東炬導遊真仙後暗洞。始由天柱老君像後入。

溪之西崖。陸洞也。千柱層列。眾竇競啓。前之崇宏雄曠。忽為窈  
窕靈奧。窮搜殆盡。石下巨臥蛇橫火燭之。不見首尾。踰之出入。竟伏  
不動。然此奧雖幽邃。猶溪西一隅。時時由隙東瞰溪流。冀得一  
當。終未能下涉。既出。迴顧溪竇。內透天光。對崖旁通明穴。益神  
動不能已。托參慧入市覓筏。以為必入水洞計。參慧復爇炬引  
予由岩前左右下。北入深穴。穴雖深幽。無乳柱幻空。然下多龍  
脊盤錯。交伏鱗爪。宛然亦一奇也。出洞。參慧即往覓舟。予恐不  
能遠得。不若躬往索之。且以了老人諸勝。乃出洞北大道。西望  
山峽門。峰巒聳異。內有劉公岩。草深無道。仍從下廊先趨老人  
岩。入下岩門。東向。西北竅深入。漸暗。聞秉炬以入。徑甚遠。從門



左仍躋石峽抵上岩轉透後岩內結閣畫踞洞口閣前臨眺上  
下懸崖峭絕菜邕江西來潑其北麓自爲分合抵岩下北轉去  
大江當其前恍然如天表飛仙直北卽爲香山遂下江絕流渡  
雞場洞幾隨之西遇荷薪僧指香山在東北乃轉循北山東麓  
一里西登級抵香山廟廟虛無人東北至縣西門又南過下廊  
遇樵者令覓舟入真仙二人慨然許之先是予屢覓之居人俱  
云此地無筏而舟爲陂阻無由入洞須數人負之趨不意此乃  
漫相許予心不以爲然竊計岩中有遺構可結桴浮水獨巨木  
不能自移還與參慧圖之既抵岩參慧已歸亦覓舟不能得惟  
覓人結桴爲便意與予適合

二十九晨促參慧覓結桴者未行昨所期樵者呼羣至謂予曰  
已入洞否予應以待舟樵者謂舟不能至若聯木爲桴予輩水  
中挾之入正與舟等參慧卽以覓人錢畀之遂羣負木入溪斬  
竹爲筏頃間桴已就復以岩中大梯架其上更置木盆予踞坐  
盆中諸人前者引緯旁者扶篙後者肩聳遇深淵輒浮水引之  
遙不能引輒浮水挾之始由洞口溯流仰瞻洞頂益覺穹峻兩  
崖石壁劈翠夾瓊漸進漸異前望天光遙遙層門複穴交映左  
右既入重門兩旁俱有層竇盤空上嵌前後明光皎然彼此照  
耀挾桴者欲從中蕪炬登崖以窮旁竅予令先溯流出後洞乃



復浮水引桴抵洞門。門西南向。吸川飲壑。溪破石而下。桴抵石。爲所格。不能入溪。捨桴踐石出洞。又善然一天也。溪石坎坷。不受踵。望左崖有懸級。在伏莽中。援莽蹠空上。不數十步。輒得蹊徑。四望平曠。中圍衆峰環繞。卽予昔來橫道北岩之東北隅也。返登桴順流入洞中。倚東西俱有穴可登。而西崖穴高難扳。且前遊暗洞。彷彿近之。東崖則穴競門紛。曾未一歷。遂蕪炬東入。其上垂乳環柱。與老君坐後暗洞諸勝。工力悉敵。從其內穿隙。透折多有旁穴。星星上徹雲影。知其東透山膚甚薄。從其側宛轉北出。已在老君對岩之下層。因岩爲臺。下臨溪流。再出卽爲對崖之上層。上亦列柱縱橫。石崖峻阻。與此層無徑相達。仍引桴下浮。欲從溪中再上溪崖。亦懸嵌無由上躋。計取道當從洞前南轉。抵東北山椒。可入洞中。非架梁不能上也。乃絕流引桴還登東崖。諸人釋桴歸舊處。予亟呼其中一點者。携餘炬令導遊劉公洞。北半里西南轉入小岐。向山峽二里抵山下。一洞在南山東向。一北向。北山中突峰。又一洞東向。方莫知適從。忽聞牧者警咳聲。遙訊之。北向高騫者是。亟披莽從之。其人見予所携炬一束。笑謂入此洞。須得數枚炬。乃可竟。僅此將何從。伏莽中石磴隱隱。隨之躋洞門。巨石前橫。從石隙入。崖石上大鑄。西峰之岩四字。爲寶祐三年李桂高書。前又有碑記二方。其一不可讀。其一爲紹定元年太守劉繼祖重開此岩。桂林司理參軍



饒記并書始知名洞以此入洞先爇炬從其後右畔入乳柱環轉不數丈出又從其後左畔入數丈後愈轉愈廓玉笋左右森羅升降曲折杳不可窮紀恐火炬易盡竭蹙嘗嚮出不知蔗境更何如也西望北山中突洞石態秀出門若雙列中必相通趨其下岨懸無路導者已先歸見予徘徊留眺復至引入南麓小洞內甚淺不通上岩上岩危嵌峰半遙望多姿今迫視了無警目處且路絕莫援不得不爲却步及東行回首再顧紛綸之態復標異撩人仍強導者芟翳級石猿引以登予接之遂歷其上削壁層懸雖兩崖並列中不共貫外復淺竭興索然返東南抵真仙岩阻雨岩中數日

七月初三予出洞往覓對崖明竅徑東越洞前石梁循山南轉而西徑伏草中時不能見抵後山過脊竟不得西向登崖徑乃莽然躋山半覓之皆石崖嵯峨無竅可入度其處似過而南懸崖復下忽二農過其前詢之果尚在北也依所指西北上莽棘中果有一竅止容一身然下墜甚深俯瞰之深餘三丈卽北崖僧棲對望處已聞榻碑僧笑語聲但岨峻下不懸不能投虛墜眺視久之見左壁有豎隙雖直上無容足板指處隙兩旁相去僅一尺五寸可臂紉足撐下乃左轉向隙轉處石皆下垂無上岐圓滑不受板躋摩腹過既至隙中兩臂足若膠釘稍動卽且溜脫下然卽欲不動支撐久力竭勢必自溜不若乘其勢蹲脫就



之。迨溜將及地，輒猛力一撐，遂免顛頓。此法亦勢窮所生，非問學可至也。既下，岩寬四丈，中平，下臨深溪。前列層柱，若護欄。岩內四周環壁，皆紛紜成蕤，非雕鏤所能殫。前與西崖掩映，後復得洞頂雙明竅，從中遙顧溪兩端，出入處俱一望皎然。收一洞全勝，真仙爲天下第一。此又真仙第一也。岩右一石平突溪上，由其側扳崖而北，又連闢兩龕，內俱明潔。石壁迴嵌，色態交異。如初墜處，其前崖亦有一柱傍溪起，中纖圓類指上，抵洞頂，復結爲幢絡，蛇龍繞織，指下垂環，而夭矯者數縷。內近龕處，復有石圓起三尺，聲拍之若鐘。其旁倒懸之石，皆能傳響。此皆溪東上層之崖也。南與下層並峙，崖相隔無幾，中有石壁下插溪根。

無能外渡。稍南有隙，南入皆倒垂龍形，縱橫交折，冀其中通。南崖尚有片石，隔若鑿空，取道於此。從下層臺畔結浮橋，渡老君座後，宛轉中通，無假道於外，免投空嶮。真濟勝盛事也。時雖溜下，計上躋無援，隔溪呼僧棲中榻，碑者乞其援索垂崖，庶可挽之。上榻者不識外轉道，欲以長梯涉溪。溪既難越，梯長不及崖之半，即越溪亦不能下。徬徨久之，擬候參慧歸，覓道投索。因午過猶未飯，反覆環眺，其下豎隙，雖無可扳援，其側覆崖，反有凹孔，但上瞰不得見，下可因躋。聳身從之，若鳥斯翼，不覺透井出，仍從莽中下山，返飯真仙岩而臥。

初四，聞西南十里古鼎山有龍岩，高懸鐵旗新闢，且可從真仙



後溯靈壽上流。幾欲命屐為候。搨所羈。

初六。搨事竣。始探鐵旗岩。晨餐即行。過來時橫列之北洞及南洞。南過安靈潭。西渡溪。從岐西向山坳半里。踰坳。路漸大。透山峽。出共一里。南越小橋。即來時橫涉小溪上源也。橋南山半洞。北向無奇。循麓西至古鼎村。問鐵旗岩。居人指西北峰半。半里抵峰之東南。又西。始見洞懸山半。閣倚於前。稍上得層級。大木橫偃。級旁上叢木。耳芝結其下。予時急入岩。不及細簡。抵岩。岩南向。正與百步塘南山相對。內亦無奇。外勝頗饒。鐵旗名。以峰著。非以洞著也。因問僧龍岩所在。僧初住山。悞以沸水岩為龍岩。指予西南入。龍岩實在東南。古鼎村後山。予不知。從僧半里。

至沸水岩下。穴東北向。滿漚水。內聲砢峒。東穴亦如之。蓋其下皆中空故也。予所聞龍岩在山半。乃望高上躋。上岐兩峰。中削千仞。東西各有淺穴。側罅。終無危崖貯水。乃下。東至古鼎村。村後山南向。開洞一。高峽上穹。一圓竅並峙。即從岐東上。皆無峽中之水。如所云龍岩者。既下。仍由村北舊路過小橋。溪挾雨瀑漲。橋沒水底二尺。杖傘以渡。念小溪如此。若靈壽石堰。漲高勢湧。必難東渡。適土人取笋歸。古鼎問之。曰。大溪誠難涉。可不必涉。踰嶺抵溪。即隨溪北下。止涉一小溪。竟繞出老君洞左矣。予聞之喜甚。過坳<sup>抵</sup>向所云安靈西堰。果水勢洶湧。非厲搨所能及。即隨溪左北行。約半里。近隔溪橫列之南洞。溪遂西轉。又環西



面一獨峰。從其西麓轉北東向。趨老君後洞。靈壽大溪已東去。惟西山夾中有小溪西來注之。上有堰可涉。循溪而東。從左越坳下。坳皆層懸石層嵌。藤刺冒之。陷身沉頓。手足失勢。傾蕩洪濤中。汨汨終無出理。久之。竟出坳脊。俯板棘滾崖。出洞左。蔬畦中得達洞。參慧已下。捷支靡矣。呼啓扉者。再得入洞。若更生焉。初七。別參慧入城。訊舟。初九。始得一小舟。過午。主舟者至。發舟東北行。已轉西南。共六十里。泊沙弓。

初十。四十里為羅岩村。岩在江右。層沓班駁。五采燦列。南崖稍低。石芝偃峰頂。崖半匏窠一洞。當有勝可尋。惜來時以暑雨掩

蓬。今去僅隔江遙睇耳。又四十里柳城縣。縣南二里。江之東為巒。巒山削崖截江為縣城南障。西即峭峯叢立。土人指為筆架。穿山者棹月順流。瞬息二十里。一山兀聳江東岸。排立而南。江亦隨之南折。灘聲轟轟如殷雷。為倒催灘。又南四十里抵柳州府。泊其南門。城鼓猶初下也。

十一。蚤入寓。靜聞未寤。顧僕亦病。往返二十日。莫其霍然。同行加以顧僕。尪弱尤甚。為之悵悵。

十三。出城南渡江。循馬鞍山北麓西行。折而南。循西麓。由西南塢中登山。草沒石級。濕滑不能投足。仙奕岩在山半削崖下。門西向。正與立魚對。祇隔山下平壑。中一潭。岩內逼如合掌。深止



文餘岩右有石端聳上遊裂成紋參差不齊雖可登憩以爲黑  
肌赤脈分十八道可奕似未確岩左東南上又裂一岩形與仙  
奕等西南向其下東南抵坳中又遊一岩亦淺隘不足觀仙奕  
三岩齊列山半俱相伯仲而已西下山麓還望復得一岩亦西  
向正在中岩下岩前砥石如枰其北石窟成峽北透明通中開朗  
可憩出岩西盤一山嘴轉出東南山半有洞西南向登之洞門  
岬然中高穹上出下深墜縱橫成峽樓殿層疊雖不甚寬放固  
以危峻逼裂見奇入門有石突門右青踞若牛背復高突一石  
圓若老人首先是立魚僧指其處有壽星岩必卽此由突石左  
懸級下墜西出突石下則下墜淵削上級虛懸皆峭裂不通行

東入峽道中灣環以進忽天光上映仰睇若重樓空架兩崖上  
覆下嵌無由渡虛上躋遙見光映處內門規列高懸夾崖末外  
戶分透前山頂平若覆帷恨不牽縷一登下山東仰北山半復  
有門南向計其處當卽前洞光映所通也下俱迴崖層互稍東  
循崖西北上踰下崖抵中崖上崖卒懸絕不得上復從前道下  
更東循崖角西北登上崖沿崖西陟則洞前三面皆危壁倚空  
惟此一線盤崖可達前有平石如露臺內旋室方丈四壁俱環  
柱駢枝分布密嵌西北內通一門下臨深峽果卽前所望仰透  
空處也仍循崖端東南下南復有山鵲起望西麓山半懸崖穹  
拓黃斑赭影欲登無路循山南行得微徑從草中東上抵五一



門外雖穹然內僅如合掌無可深入望黃緒削立處已在其北  
崖嘴間隔不可盤陟復下至山麓再從莽中望崖登久之抵崖  
下崖危削數千尺上覆下嵌若垂空之雲互接天半每當平削  
處裂孔一方中多紛綸奇詭第瑣隘不能深入循崖腳北行上  
有飛突之崖升降石罅中如度凌虛檻榭披覽久之下山東出  
前峽兩崖石皆巉嵌叢翠翳之共一里出馬鞍東麓得北來道  
踰界峽石垣又東  
截大道東一里為郡東門對江渡於是瀕江南岸倚屏風山北  
麓東行里許抵登臺山江為山扼轉北去路從山南繞東麓而  
北一里有山橫列三峰其陰即王氏山房所倚予昔來自洛容  
從其北麓渡江者也山南有洞駢立南向岬然其山倒石虛懸

內裂三峽通外三門宛轉迴合惜不甚深擴遂下西坡小徑北  
循西麓踰一岡竹塢蒼叢共一里於是東倚山麓西臨江坡坡  
上密箐蔽空連麓交蔭道出其下行空翠中一里抵姚埠東門  
渡由村後南向登山入竹塢中箐箐萬个俱碧玉森翔塵喧開  
滌頓盡已而上山石磴甚峻西南折穿榕樹根中又東上過一  
度石片下石去地五六尺崖旁平度出薄齊架板上為王氏山  
房小樓三楹橫洞前北臨絕壑勝贍遐眺樓後即洞洞高不受  
樓掩日東林洞洞後分東西竅南入西竅稍東轉黑隘不堪進  
東竅亦從南入轉東忽明踰東闔出巨石迸裂成兩罅北透者  
石叢而平臺中懸其東下隙則茅閣虛嵌削崖四旁聳石成雲



非若他山透腹出。一覽竭致也。從洞東南躋嶺頂。石磴危峻。收望愈擴。直南盡登臺久之。下山渡舟適至。由東門二里返寓。

十七。同靜聞輩下潯州舡。以中元節無旅客。故留滯數日。

十八。晨餐後放舟十里。有小山在江左。江稍東北。曲小山東爲龍舡山。又西南爲夾道雙山。乃北門陸路所出也。又五里爲油開江。始東轉十五里。乃轉而南。南十里爲山門冲。卽向日洛容來渡江處。江東爲南寨山西麓。石崖迴返。下嵌江流。又南十里爲羅峒。前有山兀突坪中。罅裂其南。上連下透。如石門巔。又一圓石突綴。作一僧倚崖南向。肩與崖齊。頭顱上出。又五里。諸峯森叢。江右由山門冲至此。江稍西南轉。又東五里。轉而南。一崖

懸突江左。層累疊嵌。光彩離奇。更有尖峯若牛角。遂東轉五里。迴渚成涯。曰犁冲。山脉北自牛角尖直下。江流環其東南。西三面中成盤涯。宛似犁尖云。忽北轉五里。直抵牛角山下。復轉東去。灘聲如轟雷。久之乃止。懸流迴湍。一瀉數里。曰橫旋灘。自犁冲北轉至此。若破壁出。東南下灘五里。山漸開。又東北二十里至三江口。洛青江自東北來注。日已西。遂泊。

十九。乘月放舟。五鼓抵賓江。有岩特立江左。下削上突。江因之西轉。二十里至象州城。在江東岸。隔江卽爲象山。西二十里過大容堡。遂西南行。兩岸始廓然無山。又東南十五里。都泥江自西南來會。江東北岸一小山。北面分聳。西歧爲兀突。東峰峭削。



尤甚正對都泥江口特建標以識都泥江者北盤之水發源曲

林海子

靖東山抵普安州由泗城下遷江歷賓州來賓出於此溯流舟

至遷江止上流卽土司蠻峒人不敢入水多懸流穿穴故鮮核

其源流也又按慶遠忻城有烏泥江由縣北合龍江詢之士人咸

謂忻城絕無北合龍江水口蓋卽都泥南下遷江者且遷江忻

城南北接壤烏泥都泥音聲相亂實無二水也又東南二十五

里東下大灘曰菱角灘又二十里泊瀧村

二十放舟五里下大鷺灘江右石峰復駢列出又南五里至武

宣縣隔江兩岸山卓立歧分引隊南下若皆奇詭若垂手引項

偃僂比肩種種怪異志謂縣西有仙人山南有仙岩山當卽所

望諸異峰也東南十里兩岸復曠然又二十五里爲勒馬堡過

此卽潯郡桂平界南十里兩岸山漸合又五里爲橫石磯石自

江右山麓橫突江中返流倒湧遂極瀕洞勢兩崖連山逼束至

此爲入峽始又東南二十五里爲鎮峽堡又十里兩岸山勢益

高聳獨冠諸峯閒出石峯懸峙江至是轉而東其南迴東轉處

江左瞰流之石有大書鐫石傳爲韓督憲留題云東北二十里

小溪自北破壁出其內峻崖屈曲如夾堵牆又東卽大藤渡峽

處南北兩岸俱有石突立江心昔有巨藤橫架江上故南北兩

山狴賊此追彼竄得藉爲津衢韓公雍破賊斷之因名斷藤峽

過斷藤五里下弩灘遂南出峽口一水自東來注曰小江口合



而西南下勢甚峻急蓋北自橫石磯入峽南入弩灘其中山勢  
迴逼正如道州瀧江嚴州七里瀧但此峽相去六十里始入為  
東西峽中轉為南北絕無居廬叢木虧蔽兩旁悉搖撞窟宅故  
得因勢展暴使刊木開道則亦丹崖鈞臺勝概相麗矣出峽西  
南循山下十五里抵潯州府日已暮泊於北門

西南遊日記五

七月  
二十二留靜聞顧僕寓潯之南門覓擔夫為白石勾漏都嶠三  
山遊從駟前南渡鬱江八里至車路江小水自東南西入鬱郡  
舟上水可抵此又南二里為石橋村南望白石與獨秀山各挺  
峙三十里外實尚六十里而遙為山道迂複也村南二里得迴  
石一壑清流中瀦石皆玲瓏遊裂為蕪原生采更南匯潭益盛  
東有山自南抵北從其西漸升而南益遊穴平地下陷為峽為  
井中悉叢石含嵌淵水澄其下蓋地中二丈下皆伏流潛通石  
骨阻互偶骨裂土遊則石出陷成穴云又南二十七里抵姚村  
依山匯水真山中樂墅也渡小溪南踰嶺五里為木角村村在



白石山北麓去山尚十里炊宿山村春舍閒

二十三東南越嶺歧徑望白石趨其山峰攢崖絕東北特聳一

峰為獨秀孤懸峭削上齊白石頂下則若傍若離直剖其根崖

石獨多赭赤色五里路漸沒草閒嶺半得一山家傍舍植芭蕉

甚盛趨問白石道尚在西南由其側登山轉山脊五里度均稍

東向山南

東即南折直抵山北麓獨秀已不可見惟危崖盤削下多平突

之石盤互疊出又作一態直上抵崖石下南出共二里為三清

岩岩西向橫開大穴闊十丈餘高二丈深及闊之半石特平燥

不作紛紜滴瀝勢即白石下洞也又南半里為大寺後倚崖壁

寺左水自半崖下滴曰圓珠池池無他異按志山北有漱玉泉

西事泐百粵風土記俱謂其泉暮聞寺中鐘鼓輒沸溢起止則

寂然詫為異及抵白石寺并漱玉名不知何況聞鐘泉沸非寺

僧之蠢即著書附會之談也遂由池前南循崖壁行已東上入

石峽峽兩峰中剖上摩層霄裂罅相距不及丈磴懸其中時有

巨石當關輒置梯以度連躋六梯始踰峽登坳坳南北猶重崖

摩夾稍北轉循坳左行則虬木叢篁迷雲閣島身度霄漢上不

知午日之中東嶂稍開始見獨秀峰東北立東南塢中又起一

峰正與獨秀對峙高殺三之一宛然蓮蓋中擎但四面為諸峰

所掩惟此得睹全體耳又北板懸崖上木根絡石間為梯為紐

得受手足緣躡已轉一壑礪自山頂西向墜峽累搗潭穴峽南



復懸梯上登宛轉三梯東行平岡間外則萬仞下削內即絕頂  
漱根之峽內外皆松木一道深碧日影下墮臨風颺曳閃映萬  
端林盡鑿石成磴躋磴轉會仙岩岬然南向矣岩皆黃赤石上  
下開穿內漸湊合無紛紜滴瀝與三清同而地位高迥已窮極  
幽暢乃從峽右躡削嵯凌絕頂崖雖危削盤阻處中有子石鶯  
卵大嵌突齒齒上露其半藉爲麗趾級不覺一里已湧出峰頭  
東向與獨秀對揖此峰正從潯郡來所望獨秀西白石絕頂獨  
秀四削如天柱非傳翰不能翔上此峰三面亦危崖特立惟南  
面開罅梯隙得躋頗似太華三峰上分仙掌下懸尺峽透險蹠  
虛此真青柯嫡冢他未見其比即桂朔柳融諸峯非不亭亭直

上然石質青幻片片芙蓉攢合竅受躡痕受扳無難升陟此則  
一劈萬仞雖曲循隙竅何啻蹈空自奮也獨秀蓮蓋二峰爲此  
峰門戶其內環壑深坑虧蔽日月重岡間之人無至者久之下  
會仙歷三梯三里至峽坳之上峽南一石倚崖起下有線罅穿  
其中僅容側身進其上或連或缺既而漸下南轉出罅飛石上  
下懸嵌危不可躋返出石峽坳倚石側復有道上出石端危懸  
殊甚扳根引蔓僅躋其端透入石闕中即倚石西盡處與前崖  
夾成闕穿闕南抵飛石南懸之上瞰前罅正在其下遂扳登倚  
石頂則一臺中懸四崖環峙上又連者如橋缺者可瞰如井下  
峽坳歷六梯一里西出峽又里北返寺



二十四西向下山三里過周塘村倚山環池樹木掩映南七里為麻峒墟又二十五里宿中都峽

二十五南二十里下核桃嶺大溪自南來西折去即潯郡西繡江上流也發源自平山墟乃大容山西北水大容東西有兩繡江一南自廣東高州北至北流縣合大容東南水經容縣注於鬱此容縣繡江也一即此水為潯上流之繡江循溪三里涉流渡江水及腹為橫塘渡潯郡南界止此江南即鬱林地屬梧州西北境由江南岸溯流踰嶺南五里過白堤亦深山奧境溯溪踰嶺右南行八里得大寨村自白堤至此山迴谷轉夾塢成塘溪木連雲堤篁翠夾堤篁宛然避秦處也

二十六西南十五里過箬帽山山稍開南見大容又五里為平山村東望大容在三十里外猶有層峰閉之南十里轉峽西出為勒菜口於是山分兩界大容東北峙寒山雄倚西南排闥東南去中成大塢溪流南注為羅望江源十里過馮羅廟廟南峽愈開寒山南盡而大容東轉於是平疇擴望南有岐東涉羅望江循大容南麓過陸馬廟東四十里可出北流縣予取鬱林道南十里止松城墟

二十七十里抵鬱林州州西南一里南流江自東而西其流較羅望為大涯下泊舟鱗次上有堤內環為塘堤下臥石片片橫列涯間紫泉在堤下石片中石南北夾成橫罅橫三尺闊二尺



東迴環而西，缺其南。水從底上溢，瀦其中，停泓者三尺。上從南  
缺處流瀉去，時見珠泡浮出水面。泉之西有石梁，曰南橋。灣南  
流江橋北文昌閣，當江流環轉中，虛敞可眺。爲此中勝覽。橋南  
爲廉州大道，予由岐溯江岸東行。水月岩道也。東北共二十三  
里，踰山峽東下，峽東石峰森森，自北而南，出峽循西土山，東麓  
而北，一村倚山東向。又北一里半，東轉得龍塘村，村踞岡脊中。  
其南水南流東去，其北水北入水月洞。由其東又北一里半，直  
抵石山中峯，渡石橋而北，則上岩西向，高穹山半。上岩者，水月  
洞南倚山，凭虛之竅也。石山自東北來，南引而下，一支中出者，  
西瞰平蕪，削崖懸竇，層結皆不甚深，而北層最下，亦極擴環。峰

石皆青潤，獨裂岩處色變赭赤。石質尤窮極神詭，尋丈之間，穿  
穴蓋偃，無不具足。岩前架廬當門，敞其上，不使掩岩勝。由岩後  
右腋穿竅上，復出一層如偏閣，其左腋可環柱，出柱側緣崖上  
躋，轉出岩末，復得岩西向，自分左右兩重。左重在下，垂柱裂竅，  
仰睇上，卽右重也。然歷磴無階，由外北躋，始入右重。閣綴絕壁，  
與左層翼對增妍，皆岩之中層也。其上削崖絕頂，尚虛懸一重，  
級絕板躋，惟供矯首耳。水月洞在上岩北，地稍下，龍塘水經石  
橋北，過上岩，乃東向，搗入水月洞門，亦西向。路由其南，水行路  
北，相沿入水。北透後洞出，前後洞門一望通明。水傍蹲石，夾流  
兀突，俱作獅象形。洞頂垂石天矯，交龍舞螭，續紛不一。其水平



流洞中無真仙岩之大兩岸亦失其深峭可褰裳涉溪岨右有  
一小水南自支洞出爲陰洞左則沿溪笋乳迴峽上亦裂門綴  
穴層閣之上又匯水一池爲奇此明洞以內勝也後門崖口列  
大柱數條自門頂合併倒懸洞內望之蜿蜒浮動此明洞以外  
勝也陰洞乃明洞旁穴中又分水陸流不甚大東南自牛隴又  
開一門穿山腹至此合明洞溯流南入半里洞漸沉黑崖益斗  
水益深結筏積炬曲屈約二里出牛隴此陰洞水中勝也從陰  
洞溯流始崖左嵌石下竇甚隘匍匐下穿引炬而前忽歸然上  
穹上下垂聳盤柱詭狀百出升降其中動心駭目遂曲莫盡此  
陰洞陸中勝也是日子抵上岩已過午道流方局出戶予坐崖  
下荔陰閒久之道流罷釣歸卽促其束炬爲水月遊既入明洞  
篝火入陰洞道人不隨支流入由其側伏崖穿隙遍收陰洞陸  
岨勝中崇宏幽奧森羅衆詭凡五易炬出欲溯流窮水岨道人  
以無筏辭請別由牛隴探其後崖不必從中出也乃出明洞涉  
水窮左崖之勝仰睇後洞諸垂虬舞龍石出飯上岩宿  
二十八子曳杖窮最上岩下憩右竅偏閣中既午循山而南至  
昨來所渡石橋橋側東折入峽中是山石峯三支俱鋒稜巉削  
由東北走西南中支爲水月岩所托是峽則中支南支相夾者  
南支多削崖裂竅予來時循其西麓詢之士人皆曰中不甚深  
今故從峽中轉其北得平窪一圍羣牛散寄其中知爲牛隴窮



隴西北水匯成潭陰洞後門即東南臨潭上四旁皆陡石無路  
入必涉潭乃登洞甚虛敞隨水西入漸北轉石崖成峽水亦漸  
深昧與水月陰洞所見等雖未徹其中兩端源流悉見可無煩  
暗中摸索也洞門右崖馬蹄痕莫紀其數疑即志所載天馬洞  
出洞益導峽而北東西兩界峰石翔聳蔚成霞綺二支北盡處  
北支又兀突起與中支北麓對峙成峽下有三洞南向上蒸雲  
流電閃爍多異東畔二門駢立雖懸乳繽紛俱不邃進其西畔  
一門孤懸峰半洞門嵌空中忽淵墜深且數十丈宛轉內透極  
杳渺之勢但兩崖直削無級下降踞崖末望之飛鼠千百成羣  
見人蓬蓬內竄聲傳遙谷出洞望中支西北山嘴頗近以為由  
此穿水月後洞抵上岩甚便趨一里至其下扳陟山岡則巨石  
飛聳中都蔓絡腳嵌沉淵底遙探洞外諸奇石杳不可見即溪  
流破壑出者亦盡沒其跡乃仍出向峽返上岩復至水月後洞  
睇望所陟路斷處尚隔一峰嘴也

二十九由上岩過牛隴共三里出峽有兩歧直北循北支石峯  
東麓者為北流大道東向踰嶺者為閒道乃從東歧二里抵塘  
岸墟墟為陸川北境北轉即北流屬二十里為橫林村北石山  
一支自北而南叢簇尖翠予初望之以為勾漏在是漸近路出  
其東南西望而行秀色飛映蓋此山在北流西十里勾漏尚在  
北流東十里也自橫林共東北十里抵北流縣縣當大容南面



之中山脉由大容南下曰綠藍山。水分東西流。東流者為北溪。循城東下。登龍橋入繡江。西流者即南流江源。西南合水月洞。水經鬱林南門。西合羅望定川諸水。南下廉州入海。是縣實為南流源。其曰北流者。以繡江東自粵東高州來。至此始勝巨舟。東過容縣界。合洛桑渡。水經容縣南門下。藤縣北入鬱江去。非謂北流源此也。縣西十里為鬼門關。東十里為勾漏山。二石山分支聳秀。東西對列。而鬼門顛崖邃谷。兩峰合立。路經其中。勝與勾漏實相伯仲。予自橫林北望。即奇之。不知為鬼門也。至縣始悟。已從東南越之過。以不及經其下為恨。東出縣東門。飯於沙街。北出隘門。抵北山下。循南麓東行五里。渡溪橋。入石山夾中。

南為望夫石。即黃婆岩。西垂之山也。北則石峰逶迤。愈東石骨益瘦。疑即獨秀岩所托。今已失其迹。峯東崖大書勾漏洞三字。南北二石峯。俱東拱寶圭洞。予東行夾中。凡五里。石山迴合。中復突一峰。勾漏庵正倚峯南麓。其西隅即寶圭洞。庵頗整潔。內堂三楹。西則葛令也。葛像綸巾朱履。飄然欲生。前庭佛桑盛放。乃令道人多覓竹束炬。為明晨遊具。道人欣然願前驅。八月初一。先作寶圭行。約道人肩炬篝火。後至洞。在庵北半里。庵後先有兩岩。一南向。一西向。望之俱淺。寶圭更在其北。漫流自西北來。東向直漱山脚。北涉之登山。抵洞門。門西向。左開岩軒敞。平臨西峰。右則深入窪嵌。下一石柱當門。端石斜飛。磴道



由其側下至洞底交關爲四岐由東入由南入者二岐俱深黑岐而虛明則一西向豁一北透焉西向豁者卽正門所由入內與東岐黑穴對北透乃偏門另啓正對南岐黑穴也岐交於中成十字東岐之南頂側忽倒垂一葉平度半空外與當門柱適對上下凭虛各數十丈卷舒懸綴薄齊蟬翼葉間復分開竅竇若眼之決眚由東岐南崖板級上抵葉根垂帶處盤旋帶側出葉間踞孔坐其上坐久之復盤帶下向北透岐岐中一乳倒垂長數丈水由其端涓涓下更北入峽中右則窪而北出爲下門左復稍高北渡疊成上閣閣前平臨西北亦有乳柱界其中此明洞西北二岐也道人負炬至爇炬先入南室兩旁壁峽起高而不廣入半里側皆裂竅垂柱少進忽下墜成淵由洞底水深二丈水之深不知其幾也兩崖俱無可着足南眺其內窅黑莫竟促道人涉淵言水深曾無能徒涉者促之覓筏則又以隘逼曾無以筏進者然則若何可入曰冬月水涸始可墜崖涉入何如曰內甚深能見明而不能升也予聞之悵甚捫石投水中淵淵不遽及底旁燭之仰見左壁有旁通隙入則漸東無餘竅乃下返出四達處更入東穴初兩旁亦成峽壁下漸高中闕如堂皇稍北而東徑遂窮比之南竅雖有穴宛轉深不及其半乃謀爲白沙洞遊道人復肩炬束火從北透偏門下層出循山西北麓行始見其山前後兩峰駢立而中連峰西南突者卽寶圭東



北峙者乃白沙所伏。白沙亦前後開洞。前洞北向高敞。分爲三門。兩旁峻懸。中可俯級入。後洞南向高隘。僅通一線。前對寶圭。背東卽二峰中連脊也。先經白沙後洞。草沒無徑。道人不之入。北去一里。東北轉繞山北麓。南躋前洞。入門卽窪。下數十級。及底。仰視門左右。各有隙高懸。卽所謂左右門也。逆光流影。豐照四徹。然虛嵌莫得扳其處。從洞中東轉。頗崇宏。漸窮漸黑。予先遍探四面。無深入路。出促炬命導。仍入其中。以火四面燭。旁無路也。導者忽從南壁下投炬。蛇伏入竇。高不踰尺。廣如之。旣入。忽廓然盤空。衆象羅列。方瞻接不暇。而崇宏四際。復旁無餘隙。透東轉南。倏開倏合。凡經四竇。皆隘若束管。薄僅透屏。故極隘。

忘窘。屢經不厭其煩也。旣而東崖之上。大書丹砂二字。南有歧入之不深。出向西轉。再南則天光四射。後洞門在望矣。導者欲仍從前洞返。予強之出。後洞見寶圭後峰。特爲當門屏。乃西南披草棘出。均仍過寶圭北偏門。將及庵。東探清泉岩。卽前所經南向岩也。還飯庵中。下午探近山諸勝。西南入黃姑岩。黃婆岩者。寶圭西南諸峯所裂岩也。其山西自望夫石東來。岩當其東北隅。與寶圭東西對。稍南遜。岩門外極危聳。黃崖綴其中。岩頂峰石分岐發異。惜內無深入竅。西抵望夫山西麓。環觀東西南三面。鼎立諸峯。巒岫無出黃婆一面者。按其攢簇之勢。疑卽志所載巫山寨云。已乃循黃婆東麓。南抵東南隅。石萼懸峭。片片



飛雲綴空自外岩扳峭石上歷豎隙屢出層空達峰頂遂盡發其危嵌態下山轉循南麓峭崖穹立石色雄赭乃東由營房橫過勾漏庵後峰東南角蓋寶圭所託之峯南面駢立而中連西立一峯卽庵後清泉岩所倚東立者與之比肩南向得一東向岩內頗深漸縮如牛角出洞又北清流一方淙淙自亂石中出上皆草石蒙茸莫辨其自來忽一少年至曰欲覓洞乎其巔中二洞相距數十丈可探入也予急拔棘踐刺覓之深蔓中洞門果穹然東向外爲蔓石擁蔽入洞卽隕然下墜俯瞰之有溪自南而北貫其底崖勢峻立非扳緣可下四矚其上南崖有墜而未盡者片石緣空若棧道架閣闊不盈咫而長竟墜處直達

西崖但中棧有二柱駢立若樹柵斷路外一柱已爲截去下存尺許可跨而過但其處益狹必以兩手握內柱外柱始得越臨深并險莫此爲甚過棧達西崖與洞門正隔溪相向乃明炬燭之崖之下深墜與外崖等上則垂列乳柱迴錯開閣疎楞窈窕深入猶徹外洞光乃出崖臨溪從深墜處投空下抵溪中仰視洞頂高穹延照內映倒棧凌虛尤增縹緲溪水深不及膝南從崖脚湧出北墜峽去卽由此東出爲亂石泉源也於是從南崖溯流入穴極低垂覆水面距止尺遂衝沫過額南入數丈望前有流光熠熠又南數丈洞復穹然高盤轉而東西橫貫上則東關爲外門門高聳與前所入門等勢時從人亦至乃令其以炬



更前西向湖流洞愈宏放流益深闊又數丈石砥中流登石內望洞闊如廣廈淵潭四際其下以杖測水不竟其底不知更幾轉得抵寶圭南穴前所望深墜處也返步隨流乃抵東關外門下從人將垂首及膝腰橫炬匍匐北向低穴出予止之曰此門雖峻與先所入者無異不若攀空躋危竟登此門為便遂扳崖出洞口門亦東向與所入門比肩特翳於突石連蔓遂相顧不見洞外循左崖平出返眺門頂又上關一重惜無躋級蓋北洞奧室內羅此洞外綴層樓所異者此耳遂一以北洞工登法而下崖半石隙蔓影中彷彿并北洞見之迨極下仰眺仍茫然失所睹矣乃自東南山角共一里入庵

初二錄詩寶圭者竟日

初三飯勺漏即東北行由營房轉山之東南角過亂石透泉處徑草坡五里越坡一塘匯水環浸山谷渡橋約二里堰塘愈大石峰至此東盡山北隙中露大容蜿蜒為列屏又東十里水自西北大容來東南入繡江為容鬱分界曰洛桑渡水頗急以藤橫跨西崖上繫舡於藤渡者引藤就進謝絕篙楫又東二十五里為景清新橋則大容東峰巍然北臨若負辰又五里入容縣出城南門門外繡江自西而東西南合渭龍江北出藤渭龍源出天塘山北南向石寨村始入繡江渡江南十里宿古樓村初四西南循大道盤都嶠而過蓋都嶠北俱削崖懸互無級可



階必繞出其南始可北向以登共五里過石寨村又一里抵石  
嘴舖舖東南八里有黃土岩不及登東度一橋始從峽北向上  
山循池東上五里抵南山寺古稱靈景寺大岩倚東崖門西向  
外欄高垣設蓮座於中雖云寺實岩也蓋都嶠北穹高頂南分  
兩腋如垂臂直下下兜成塢清塘一方當其中兩腋石崖皆重  
疊迴互一岩甫斷復開一岩層穴之巔復環層穴外列多門如  
絳帷紫幄紛披競綴靈景為東腋首岩最高而大高三丈五尺  
深五尺橫闊十餘丈而端稍低中穹如半月北有三岩皆西向  
差小三清則當分股兜合處岩高深橫闊同靈景東有南向二  
室與西向岩易隅齊列其西有飛岩則南轉東向為西腋戶迤

遲南下與靈景分門對峙若兩廡此兩層也三清上又列重門  
為中層無緣陟道其上又啓一岩為上層是名寶蓋岩高十五  
尺深二丈闊五六丈後倚峯頂地愈高上獨當中幹平臨兩腋  
巔再上即中盤頂上午先抵靈景門外竹光旁映岩中霞帷高  
張心樂其幽曠僧留午餐聞三清觀道者已他出竟止寺中  
初五由岩右北行歷西向三岩盤磴上入南向二岩共里許然  
後抵三清岩岩孤境寂樹拂空明又西歷東向虛岩乃仍返西  
向三岩間取道北上又一里半沿躡崖末抵寶蓋岩下視中岩  
嵌入足底而下岩三清樹杪若浮空載之者岩左循崖躡石石  
迴互如盤髻上突俱不中空雖峭削無容趾級而子石嵌崖一



同百石絕頂可緣之上上一里遂凌頂乃知是山東西駢列三  
峯最高皆北聳南俯此其最西者也迴睇最東層疊更多但不  
及此峻耳北又橫突一峰爲此峰北護卽縣南望之趨者其北  
而峭削特甚西則旁插一峰頗尖銳爲此峯附西北兩附開下  
開一門內環爲峽乃北護山與西高峰夾而成者峽中又突嶂  
中盤爲當門屏由屏東進峽南轉則中西二高峰交夾隙也迴  
谷甚深曲乃從舊道下至靈景岩飯石嘴舖北過石寨村東望  
峽門窈窕聞其內<sup>山</sup>半有竹簡岩遂東向峽門入一里抵當門  
屏下其南面裂垂罅削爲三崖西則下層北護峯與之並起東  
面危崖獨展與西高峰麓相對成峽峽南堰水爲塘環匯南罅

三崖下西附小峰卽椎立於南塘上一家結茅居之環戶以竹  
幽致甚由此渡峽東上西峰北麓一里越嶺少下下又成峽細  
流南向直墜椎立小峰腋溯流北入澗壁萋森藤竹映其上菖  
蒲覆石嵌水根葉交加足之所投知菖蒲不知爲石也緣澗上  
東躋嶺共一里飛石二丈當道懸梯入則竹簡岩在其北兩岩  
並列門俱西北向高爽殊快南有飛泉外墜若下崖直達澗底  
計岩後卽西高峰絕頂當與三清岩胸背值若由此置磴可先  
登峰頂次第下諸岩也返至環塘西探南面裂罅罅相距五尺  
兩罅並起界崖爲三俱危懸絕峭仍東抵危崖獨展處循崖北  
行夾澗藤樹密冒深綠空濛徑西飛崖千尺轟影流空隔絕天



地若不有此行。止謂都嶠南北峭秀可一覽。整幾失此幽邃。凡  
二危崖北窮與塢西轉。即當門屏北麓也。較南麓三裂崖稍遜  
其峻。亦環垣成城焉。路乃捨塢東向。復登嶺。嶺乃西高東北支。  
北走屬北護峯者。踰嶺復開南北塢。塢東乃中高盤互。上亦有  
岩懸綴。下與西高夾爲此塢。北更有重崖間之。南則灣環以出。  
不知所極。既而南見兩三家倚西峰北麓居。則石背村也。時日  
已下逼。抵縣尚二十里。亟返出石寨村北。過古樓村。昏黑中抵  
繡江南匯。叩昨來炊飯家宿。

初六出容縣北門。即西行。已復北轉。循大容東麓十里。水自西  
北來。東入繡。三渡溪。循溪溯流。行夾谷間五里。爲石頭舖。復亂

流涉水。山勢愈夾。西折入山峽。行透峽共五里。山復開。爲李村。渡  
一橋更入。幽阻盤折。山峽間樹蔓壑底溪流。藤箐沉翳。舉首不  
見天日。五里躋嶺。復盤折其上。峽又五里。山迴谷轉。潄水滿腹。  
浸山脚。皆平溢不流。左右幌漾。真山棲佳勝處。南出峽。水遂西  
流。爲水源。蓋大容北下脉所盤夾成者。西北二里至同山墟。山  
乃大開。西轉。仍見大容西峰。巍然穎出也。又五里止雞黍山北  
塢。秦窰村。地多大竹。裂竹片大至尺許。

初七西北七里。踰長嶺。始北望白石山。在重峯外。又八里爲平  
地墟。西羅江自南東北注。源出大容西北。至此始勝舟。東兩日  
程。出頭家寨下繡江。又十五里抵羅秀。北三里將至盧塘。道傍



空樹一圓出地一尺五寸圍大五尺中貯水一泓水面上不盈  
圓者五六寸下浮出平地幾及尺澄碧流瑩杖抵之深不可測  
珠泡沸沸上發乃屢斟出之輒齊舊痕不與地平為可異又二  
十里渡大水河抵陳村

初八西北八里上一嶺正西瞻獨秀下山二里為陳神已出獨  
秀東北正予昔登白石頂東望深塢中聚落也又三十五里至  
陳坊墟宿

初九西十里渡鬱江返潯郡寓中兩病人比柳州時少有起色  
橫州船以明晨早發遂携囊下舟候

初十未明發舟曉霞映江從篷底窺之如行紫絲步障中三十  
里望白石山亭亭峙東南甚迫西北三十里泊鎮門

十一二十里為白沙又五里登涯向羅叢岩東北里許北望數  
峯叢平疇中南一小峰如立指中三四峯東西駢立再北一石峯  
稍低而橫亘即羅叢所倚也由小徑四里透小石峰峽又三里

北抵羅叢岩門南向索炬同導者入洞頂高處盤窩成蓋又倒  
石捲空上垂但無登處比入五六丈遂分東西內洞西外洞亦南向擴

然透明五六丈由西竇北入則西內洞矣其內時夾時開時高  
盤時墜下覆頂平若膜裂隙成紋至石形之異有壘蓮綴空挺  
笋特立者隨處布置不專以乳柱見奇也計里許北過一隘西  
轉有峽北透天光時數炬更盡不復能由內返北躋後洞出穴



北向僅中匍匐出洞已下北麓循麓東行過東北隅導者指其上列竇曰此東洞後穴也予即欲從之入導者曰無炬須仍由前洞携炬出從之環其東麓麓東一峰圓峙高逾北山竅穴離披導者謂都無深入洞然其北有石一枝離立起不由此不得睹也復入東前洞縛炬內遊乳石奇變與西內洞等而深止得平不若西屢轉逾擴也東崖上穴駢迸亟躋上則有門三穴聯翻北向而下無階級導者謂從其內西向躋暗夾中有道可出然愈上愈隘不若仍出前洞出飯後導者復肩炬爲水洞龍洞遊水洞在山西南隅門亦南向中寬數畝潭水四際深不測其外邊處紫碧浮映日光所爍也洞<sub>門</sub>左右俱有重崖迴環潭上可

循行以入各抵潭北崖插底兩路旁絕上無歧穴不識水洞何所止出洞循西麓北轉東得龍洞洞在西後洞西門亦北向中山西北有水夾其上片石東西交成天生橋焉五丈以內又度一梁篝火入西穿石柱夾漸大南入可半里路窮下黑乃多燃火炬照耀之亦有深潭一泓瀦水莫測其大更逾水洞投石沉沉亦止而不流也已而熄炬消焰南望隔潭深處杳杳光浮水面道人神以爲光怪使然予謂穴影旁透道人曰昔村人結筏窮之至其處輒不得穴安所得倒影予曰此地深伏雖去洞頂甚遙然由門南出計去水洞不遠或水洞之光由水中深映浮筏者但從上矚下不及燭光從水出耳若係靈怪豈有自古不一息者



哉乃復明炬出洞別道人西南十里抵安祿營為潯貴兩縣中  
道處蓋羅叢岩西北有崇山橫亘其東北自潯之西山直西南  
接貴縣北山二山兩角高張東西相距幾百四十里中間峯巒  
橫疊翠環雲繞頗似大容大容為鬱江南條山界繡鬱兩江閒  
此山為鬱江北條山亦界黔鬱兩江閒貴縣之倚西山北猶容縣  
西嶺潯州之倚西山之於大容東峯皆東西突聳兩角中則連亘焉大容東西八  
十里較近中有北流縣界其閒茲山較遠而別無縣治惟今安  
祿營為中界耳

十二自安祿西南二十六里直抵石山下為平碣營營東石峯  
離立曰大岩山岩甚巨中容數千人南又突一小山上有平流

架石若橫橋其下透明出小山西為馬鞍山亦峭聳起皆平碣  
近峯也南望銳峯若筆架若卓椎者在數里外望之趨三里度  
石梁又南十二里直抵眾遙峯西麓曰劈竹鋪眺路左諸峯分  
岐競異即貴縣東山也又西南十八里抵貴縣南門則大江在  
其下靜聞與顧僕所附舟已先泊南門久下舡迫暮放舟乘月  
西行十五里而泊

十三行十里西抵西山南東南轉十里為宋村由貴縣南至南山  
十里南山至宋村亦十里舟行屈曲水路倍之予先擬一至貴  
縣即往宿南山詰朝明從南山閒道候舟詢之舟人既不得地名  
且云舟將連夜發遂不得行及發不過十餘里即泊今上午過



宋村悔不從所擬至此登舟也又四十五里夾江兩山起溯之入又乘月十五里泊香山駟

十四過烏司堡已十里為橫州界

十五挂帆三十五里抵橫州南門猶上午也是日為中秋節以行李及兩病人入南寧舟予獨入城傍江而東二里抵下渡渡南岸為寶華山道道甚大共十里過蒙氏莊又一里東向入山二里抵山下披叢入之寺尚在山半渡澗拾級又半里得寶華寺門西向寺旁無他勝問所謂山後瀑布僧謂墜自後嶺高百丈峽為叢木所翳行絕蹊望之無可所睹惟從嶺而上可聞其聲耳予乃曳杖上嶺自巔至峽皆紛植蔽虧予直造山頂風瀑

怒聲不止瀑果不可見嶺南下五十里即靈山縣矣乃返寺宿十六自寶華下山十里望東北鳳皇諸石峰在三十里外路遠不及往遂西抵州由上渡渡江入南寧舟

十七舟西南行四十里抵陳步江內通小舟欽州鹽俱從此出是日靜聞病轉劇

十八舟至是多西北行旁皆土山繚繞蓋自鬱江惟鳳皇山石崖駢立瞰江餘皆壤阜耳又三十五里泊江西岸

十九平明行五里過火煙駟為永淳縣界於是舟北轉歷十二磯磯在江右涯盤石橫突江畔又四十里抵永淳南門

二十北繞永淳東旋西繞其北江幾環城四隅矣於是始西北



行共四十里過伶俐水五里泊  
二十一西南五十里八尺江自西來入江發源自欽州通舟可  
抵上思州遂西泊黃花駟駟去南寧府尚五十里  
以下八月二十二至九月二十凡遊南寧者俱脫去約十七八頁

西南遊日記六

九月二十二予自南寧崇善寺別靜聞下太平舟泊建武駟  
二十三下午始解維行八里泊窰頭

二十四放舟西五十三里為右江口右江自北左江自西至此

會聞右江之流溯田州而上舟至白隘止由右江口北望其內

無崇山為閭

兀一圓阜頗與眾山異矣

俱高涯平隴而左江南岸則眾峰內突西入左江二里泊大果  
灣乃兩江中交脊盡處北有小峰三石圓互如覆鐘山至是始

露石形

二十五西南二十里為楊美石嘴錯愕臨流又二十里泊金竹  
洲上流野岸



二十六西南十里過蕭村入新寧州境石山復出若列屏若角  
挺瀕江兩岸奇石棊置競露崢嶸又五里東折江南岸穹石成  
洞外裂多門如猛獸羣立空其跨下北岸則斷崖為峽飛梁駕  
其上兩端又五里仍西南轉俱石山倏忽向背兩岸突石愈奇  
上下覆嶮如劈雲如肺葉降垂紛幻沓換但崖未甚深擴竟成  
閣殿耳又十八里石山始在江南岸又三里西透兩山腋兩岸  
始石山對列舟挾江北石峯北轉而循其西麓於是東岸之南  
峯列三洞門北向北之駢立兩崖崖壁兩重重各有洞是名獅  
岩南向爭榮北三里直抵獅崖下南轉乃三里復有駢崖平剖巍  
然臨江潭者筆架山也而東岸石根愈聳透共三里過象石下

泊新寧之西門自南寧來過右江口岸山始露石至楊美江石  
始奇過蕭村入新寧境江左始有純石山抵新寧北郭江右始  
有對峙之岫舟行峯石中如梭度緯應接不暇且江抵新寧不  
特石山最勝而石岸尤奇蓋江流擊山山削成壁流迴沙轉雲  
根迸出或錯立波心或飛嵌水面皆洞壑層開膚痕縠縐江既  
善折岸石與山輔之恐後益使山江兩擅其奇予謂陽朔山峭  
瀕江無此岸之石建溪水激多石無此石之奇雖連峰夾嶂遠  
不類三峽湊泊一處促不及武夷而疎密宛轉在伯仲間至其  
一派玲瓏通漏別出一番鮮巧足奪二山之席矣  
二十七西南行八里江東岸石根空中上覆已為詭幻忽一轉



雙崖前突。碧石高連。下闢如閭闔。更巧幻中。雄觀又一里。冲江自東南來。會南三里。東岸一峰甚峭。其北垂環。腋轉截處。有洞西向。累累特懸。空無路。又西曲南轉。共六里。過那勒。予泊舟於此。為穿山犀牛二岩。遊西南三里。透兩峯下。南至穆窰村。市肆西臨江。澗穿岩在其南一里。羣峰排列。岩在峰半。門西向。扳崖石上。抵門始西。見江流橫其前。洞直透山腹。又見隔山迴環。後門外翠壁掩映。乃由門上躋。踞其中。高則東西兩門對闕。上皆垂石。駢柱凝結。兩旁但其內。西下東上。故東透門高出西門頂。自外望之。都無所見。必入門始知為穿岩也。兩門外俱削壁千丈。矗立雲表。而東門地勢既崇。壁尤峭。趾尤峻。所環對諸岩。自

門北迤。遲東轉。又南抱深谷。若另闢一翠微境。其下旋轉西去。

谷口崖口交錯。不得窺。下山過穆窰。聞犀牛洞在騏驎村。村依

那勒東。與穆窰三村鼎立。乃東北三里。至其村。村人指洞在北

山東峰上。相去祇里許。至其下不得路。聞岩下伐木聲。呼覓之。

不得。時已過午。雖與舟人期。抵午返舟。今即舟去。不能顧也。乃

復出大道旁。道西北皆石峯。二里一歧北轉。有燒痕在焉。先是

騏驎村人謂抵山下燒痕處。即登岩道。予謂在是矣。益前趨北

入山夾。兩旁峰崖攢疊。抵北轉東。共二里。環夾為塢。四面迴崖

截嶂深叢。翳之道遂窮。出沒莽棘中。索終不得路。仍西南五里。

返至騏驎村大道旁。前望有隔隴燒痕一圍。亟趨之前。至伐木



處痕間有微徑石環叢隔故前不遽見今當在是矣益厲勇而  
前乃愈上愈遠西望南垂橫脊東突迴峰予皆已出其上獨一  
徑北躋二里路及逾頂北下翳不可行仍逾高頂返下至燒痕  
間見石隙復有一道望東峽上其徑正造南突孤峰下始與騏  
驎村人所指合凡三悞三返後得之日色漸下亟望崖下躋半  
里抵孤峰北是崖迴聳高峰南從東轉西向若獨角中突犀牛  
擬稱以此崖北一脊北屬高峰與東崖轉對處脊上巨石巍峙  
與獨角並而支其腋巨石又中裂豎穴嵌一石圭高丈許兩旁  
俱石灰上復覆之若剜空特置其間者圭石赭赤迥別一山石  
色爲尤異脊東下墜成窪深若迴淵上削崖四合環轉無隙踰

脊俯瞰淵底南崖下有洞北向門高張內深不知所極四崖樹  
蔓蒙密淵底益盛崖旁有徑可循至淵底翳不可前使芟除稍  
盡可達洞腹則奇邃盡發矣日已墜乃踰脊西下由騏驎村北  
西二里抵那勒下舟

二十八放舟南行旋轉西北三里直逼雙峰石壁下再折東南  
五里小水自東南來入卽穆窰也又西南一里過穿山西又一  
里西入兩山隙又五里江北岸山崖陡絕小峯如浮屠插其前  
山半綴一南向洞又六里界牌山蜿蜒江北西卽太平境蓋江  
之北新寧太平以此山分界南岸俱屬新寧也又二里舟轉北  
向西岸列岫嵯峨一峯前突俗名爲五虎出洞舟遂東轉已復



西北抵北山下，循之西向行，共六里，過安定堡。北山盡，南山復出，亦西循之。三里，隨山北轉，過花梨村。又西北轉，隨江北山五里，轉而西，隨江南山三里，又暮行三里，泊南岸晚夢村。二十九，循南岸山二里北轉，又三里轉而西，又五里，山開水繞，百家之市，倚江北岸，曰馱盧，屬太平崇善縣。是日止行十里，舟遂泊不前。

十月初一，循馱盧西北五里，北岸為左州界，稍南，南岸石峯復突，又二里西北轉，乃見北岸石峯，三里西南入峰夾間，十里西岸迴崖雄削，駢障江流，南最高有三洞，東啓極南一峰稍低，上關洞尤巨，洞南崖石外跨，自峰頂下插江潭，崖南洞復透門出。

中崆峒交透，舟行望之甚奇。又南二里，東岸石壁不少讓，而峰壁合映，江滯其間，更為勝絕。又西南行六里，已而東折，則北岸雙崖高穹，崖半各有洞南向，南岸磯嘴盤疊，飛石凌空，無不穿嵌透漏。二里西南轉，上銀瓶灘，灘始有巨石中橫如壩，西五里西北盤，東岸迴崖二里，抵北山下，仍西南六里，山開江曠，一望廓然。又五里而暮，又五里泊捺利，在江西岸，屬新寧。

初二，西北三里，抵江北危崖下，南七里響源水自南來注，聲傳如雷，源發自江州，水之西岸即江州，屬新寧江州，以此水分界。水入江處有天然石壩，絕江口，高十尺，東西長十餘丈，水踰壩墜江，雖不甚高，而雪濺雷擊，勢猶闊悍，亦一奇觀也。北岸為上



果灣有岩西向臨江上。於是北一里抵北山下。又西北轉。兩岸  
山復出。二里為宋村。村有八仙岩。絕勝。又八里。西岸石崖疊出。  
屢變奇詭。盈望。又五里北轉。西岸一崖嶂天。崖半洞列雙穴。東  
向如連環。北大南小。垂石外間通其內。既而大者愈穹。忽劃然  
中剝。光自後透洞前上下。皆翠崖危壘。倒影江潭。南有馱槎村。  
轉登山後。間可扳躋上。又北一里。東岸臨江。皚然者為銀山。劈  
崖截山之半。斑斕綴色。與天光水影相為飛動。覺陽朔畫山竟  
遜一籌。崖下有上下二洞。門俱西向。上洞尤空邃。中懸石作大士  
形。上嵌層壁。下瀕迴潭。無從中躋。其北紛竅甚多。裂紋錯綴。樹  
閉吐納雲物。奇為詭怪。幻一里轉而西。遂止馱朴。為明日陸行計。

自入新寧至此。石山皆出。已豆樹蘇木。二種樹殊小。已豆葉色  
丹映。每墜聚重巒。孤懸絕壁。丹翠觸望。如楓葉著霜。正紅。點染  
可愛。蘇木則山均平地。隨處俱生。筴如扁豆。子長倍之。繞榦結  
癭。點點盤結。同垂乳。土人以子種成林。收賈不至。輒刈為薪。又  
擇其高年榦細者。光削之。乳紋旋結。朵朵作胡桃痕。色尤蒼潤。  
予昔自天台覓萬年藤。一遠僧携此。云出粵西蠻洞。予疑為古  
樹奇根。不知即蘇木叢條也。馱朴西至太平府。陸四十里。水倍  
之。水源直通高平。為安南地。由龍州換小舟。溯流四日。可至太  
平。人呼之為高夷。聞龍州山崖更奇。其地分水至思泉明府東。  
換小舟。可溯流四日。至天龍洞。過山。半日即抵上思州。州屬南



寧府有十萬山。山水西流爲明江，出龍州，東流卽出前八尺江。初四自馱朴取道至太平。南湖江八里爲新鋪，江從正南來，陸路遂西南轉，又十二里轉一山嘴，乃循山南麓西向行，迴崖聯翮，上壁極峻拔，多玲瓏石。二里路南復突一危峯，遂西入山夾，又一里南登媚娘嶺，東南五里路側石窻一圓，曰龍井，下墜五六丈，四圍大徑三丈，俱純石環壁，墜空綴磴，下底甚平，東北裂一門，透門入內，水聲潺潺，路遂昏黑，踐崖捫隙下，忽深不可測，久之，光漸啓，迴見所入處，一石柱細若碧筍，中懸其間，上下連屬，旁有石板平度，洞雖不宏，竒奧窈窕，得之路旁亦異也。自馱朴至此，輒見岡陀盤旋，四環中墜，深者爲井，淺者爲田，上下異

太平穴，彼此共窻，蓋他處水皆轉峽出，必有一洩水門，惟此地明洩淵甚少，水皆從地中透去，竅之直墜者，下陷無底，旁通者則底平可植五稼，路旁大抵皆是。惟龍<sub>井</sub>下陷猶有底，故得墜玩焉。西南出山四里，江自壺關東垂北向，至湖之南，升降岡阜，又西四里抵壺關，關在太平郡城北里許，麗江西自龍州來，抵關之西南，折繞城東轉，復北抵關之東，乃東北去關，東西正當水束處，若壺頂然，相距不及一里，垣之設關於中，爲北門鎖鑰，其南江流迴曲，壺腹閉則羣城倚焉，城中縱橫相距亦各一里，東西南三面俱瀕江，予以下午抵關，留憩關左映霞庵，青蓮山在郡城北二十里，重巒北障天半，其支南向東下者，卽媚娘嶺，西下爲



碧雲洞。洞在壺關正西二里。石峯突兀。洞穿峯半。門東向。先從北麓上。三折。坂東向隙石隙曰天門。得平臺焉。洞門峙其上。門狹而高。內南轉。空闊深暗。上透山頂。引光一線。空濛下光。下有<sup>透</sup>大士龕。北向中坐。像後有潭。深陷。炬燭之。沉黑。又一穴南去。不知其底。此下層也。其上層。隔窗之南。復闢為門。門前列雙柱。上平度。兩盆曰寶盆。先由大士像右壁穿小穴。南下窗側。由雙柱中抵寶盆。下透門入。始頗隘。連進門兩重。漸轉東上。則穹然高張。天光下遊。一門南向出。為通天竅。歷級上。出洞門外。亦有臺甚平。下瞰平壑。與東向門無異。由大士像左壁西穿小穴。曲折入。兩壁狹轉。下伏為隘門。透門進。忽上盤如覆鐘。凡進四門。連盤而上者。亦四五處。乃出於大士像左壁稍北。又西。小穿小穴。漸北轉。則岬然中通。山影平透。裂一門北向。號曰盤龍窟。此洞中勝也。北門外崖石橫帶山腰。東達天門。西抵一飛崖。下上覆<sub>下</sub>上嵌崖不甚高。上下俱絕壁。中虛而橫帶者。若平廊。複榭無愧。羣峰獻翠名。北瞰深塢。重巒前拱。較東南二臺。又作一觀。由崖東扳石萼。西望峯頂。蓮瓣錯落。中有一石。東剜空明。為蔓深石。削不得扳。即仍從蟠龍窟入。出東臺。仰眺洞南。峯裂歧嵯。環一峽。乃扳枝援隙上。直歷峽峰。攢合中。復有東向洞。內皆聳石。攢空隙。裂淵墜。削不受趾。瞰莫窺其底。石塊投之。聲歷歷不休。下即大士龕中。承受墜光處也。至此。洞外勝始盡。



初五聞壺關東四里有白雲岩乃由郡城東渡江經歸龍峒東  
抵石壁下穹崖高展下削如屏色瑩潔如玉崖南削壁中列洞  
四五大小不一皆西向南面一洞較大下復疊一洞不甚深昧  
而上洞中空外削望之窈窕竟不得攀憩再南半里有洞甚大  
亦西向前俱大石交支從石隙透門入窪敞可容三百人內無  
旁通竇洞北有小徑東上山峽兩旁削石並聳扳級而登踰山  
坳南亦有窪下陷木翳不能窺其湫其北更起層峰西瞰江流  
城堞俱在足底再北直出白雲岩頂其坳中窪窞雖多然深莽  
密冒終不能下通若半洞也蓋此山岩洞特苦道路蕪阻若能  
岩外懸梯或疊磴中竇其委折奇勝當更居碧雲上遂西出歸

龍南湖江岸三里抵金櫃將軍兩山間金櫃瞰江峙崖洞中容  
空大容數百人茅棘湮阨亦莫覓入洞道祇三週其東南北三  
面又再越其頂對瞰江城若晰鬚眉於鏡中東卽將軍山片崖  
立峰頂頭迎江有干城赳赳之勢環郡四眺峯之特聳者此爲  
最下渡江趨壺關山雨忽來暮色亦合矣

初六予欲走歸順由富州入雲南聞歸順爲高平所阻道未決  
且從歸順行必假參軍馬牌方得前會庠友滕賓王肯畀書參  
戎道意遂留滯壺關庵中

初八有僧自南寧崇善寺來謂靜聞以前月二十八子時故去  
予別時裁五日爲之哀悼終夜不寐



初十。滕始以參戎馬牌相畀。又爲予作諸土官書。竟連日阻雨。不得前。

十八。始同顧僕出壺關北行。關外有三歧。東北向馱村走左州。西北走龍州。今直北取中道。太平州道也。西北十四里登樓脊。黃兩旁山崖陡絕。夾隘頗隘。逼隘少西下。輒有塘一方。匯水西行。峽中二里。踰二黃。高倍於樓脊。西下。崖石斬削。夾深塢。北一里上。大嵬陡絕。更倍之。踰坳北下。夾壁截雲蔽日者一里。塢窮西轉。其北四山中墜。下窪不測淵。又西一里。踰隘西下。懸磴旋重崖。間直下山脚。幾千級。按郡北有蕩平隘。乃青蓮山中裂成峽者。東南自樓脊嵬西北出。此中爲嵬者凡四重。兩崖重互。水俱穴

壑底墜。並無通流隙。真阨塞絕隘也。既下。循麓北行。一深窞懸。平疇中。墜陷如奔。上開線峽。南北裂。中跨石橋。界爲兩。其南可。循磴下。泉流漑漑。仰望如處甕內。引首窺天也。北十里山始離。立西北十四里。小水東自嶺峽中西南去。絕流西渡。聞水聲動。山谷予疑卽所渡上流。忽見大溪洶湧。路右。闊比龍江之半。自西北注東南。下流與小溪合而去。上流水懸壩石下。壯齊湧雪。蓋此江發源歸順州。至安平州北。又合養利思誠二州水。至此下抵崇善水口。綿埠村入龍江水口。在太平郡西七十里云。西四里。水南層峰秀起。瀕水一小峰孤突。上分歧。怒流橫噬其脚。北則巨峰危踞。特當關扼之路。抵危峰東。卽北轉。共十里。爲叩



山村屬太平州境。又西北七里暮抵太平站。  
十九西十里渡江止太平州。州西南峰俱峭立。西北一峰特倚  
州後。下有洞南向。門突巨石。

二十西北六里過石梁。水北流入江。下俱石峽嵯峨。西岡一銅  
鐘覆路左。質甚巨。傳聞重三千斤。自交南飛至。土人已不憶其  
年。色作新。出於型畧無風日剝蝕痕。紐已為四川人鑿去。土人  
謂尚有一鐘在梁下石澗中。然亂石磊落。窺之卒不辨。又十三  
里為安平州。江在州東北。東南赴太平州去。西南一山壁立。觀  
音岩穹其下。門北向。高敞明潔。四旁多玲瓏竇。壁洞後懸壁上  
坐大士一尊。下開兩門。內復橫拓為洞。從其右入夾隙。東轉甚

深窄。以暗逼出。大士座下右裂一門。直透東麓。座左拾級上。從  
東轉跨梁飛棧。遂出懸石巔。西入則深竇墜峽。已而南轉昏黑  
中。久之忽見光隱隱動。望之前一門。東南透壁出。門稍隘。門以  
外穹壁高懸。南眺平壑。與前洞頓異。仍出前洞。返州宿。  
二十一取思誠道。思誠在安平東北。由安平西北抵下雷。日半  
可達。而東北向思誠走龍英。須四日抵下雷。今安平西通下雷  
界。曰十九峴。與交夷接壤。慮彼竊掠。用巨木橫塞道。故必東迂  
二日。於是。由安平北一里與江遇。江源出歸順州。即志所稱羅  
水。勢比太平州減半。蓋養利思誠二州水尚合於下流故也。渡  
江有山橫嶂江北岸。循山麓東五里。路北一峰。枝起如駢指。其



東北崖嶂間高裂中透特峻不可登穿山東峽東北轉峽之東復起層峰夾而東北去五里折而東東峰少斷處尖岫中懸如人東向坐忽一江自東而西石梁開五碧跨江上江水透梁即東南搗尖岫峽中下邏水踰梁即思誠州

二十二仍從州前思越<sup>西</sup>五碧橋循橋東向五里山峽愈東江漸小山峽東盡處峰中峙南北俱有大溪合於中峯西水始大而成江又五里直抵中峰北北夾山始盡循北峽東崖渡一小溪溯中峰北畔大溪北向行夾崖中二里峽東西轉西峽有小水東入大溪乃越小水向東峽溯大溪北崖行一里捨溪登鼎促嶺二里至頂爲養利思誠界北下又二里入谷底四山重護惟

東面少豁向之行予以爲水從此出一里北渡溪水乃自東出西者竟不知西峰迫合透何峽去東北行山叢中巒岫歷亂共五里出峽始開大塢東西遙望皆峰頭轟合而南北夾壁有同迴幃極崔巍勢出峽北向三里橫度此塢直抵北崖下若無路可達者至則東北開一隙穿入之峽峰峭合愈覺宛轉難竟二里東山大開出達養利止數里從小徑北一里西北入北夾中南北兩夾山皆引錐怒箨俯仰神境<sup>者</sup>四里復開大塢東西互南北兩界山如南塢但南塢東西俱有叢岫遙疊此則前後豁然不知西去直達何地也東北斜徑塢中共五里至此山東盡處東山益大開爲龍英屬其東隔江即養利養利西北至江止不



及五里循北山東麓北一里有小峰駢立大峰東穿之即西轉。至是北條始見土山與南條石峰夾成塢又三里止聳峒站自發足來已五日雖行路迂曲而所閱山川特奇且兼辰晴麗即秋春不及也。

二十三北度塢抵土山共六里土山自西南石峰攢合處旋立東去北塢特石峯特立東北繞石峰東麓二里一土岡復前橫西抵遙峰隙東則南屬於土山北逾岡水淋漓道間叢木沉覆無燥地下益深始知橫岡之南猶在山半也北下二里至平壑渡溪橋一里直北抵石壁下壁西裂一隙板隙西登曰大嵬南北石崖駢夾極峻西穿其間乃墜至塢底共一里半其處山壁

叢合草木蓊蔽州人採木者皆取給大嵬云西北三里半北望石峰閒有洞並峙俱南向路出其西北透峽多巨石夾道二里踰翠村嶺北下東北二里溪自西而東兩岸石崖深夾渡橋東北踰透山隙出田塢閒共七里復踰土山西北十里入山渡石橋橋東北特峰懸削起曰牛角山極似縉雲鼎湖峰西北又特立一峰為龍英東面水口山又西一里抵龍英州二十四候夫不至。

二十五因往遊飄岩州北數里外土石環繞中一小石峰如筆架南開平疇一塢大溪橫於前即東入養利州為通利江源下太平州合邏水者也水之東有山當塢立為飄岩山聳拔州東

去養利止數里



卽前牛角山西北特立峯也。山東崩崖之上，有岩東南向，高倚層雲，下臨絕壁，聞龍英被寇時，州人悉避懸崖中，交夷環守其下，終不能上。余挾導至岩腳，扳登崖間，轉一橫木，渡石夾而過，輒有竹梯層層宛轉，懸綴長短不一，凡十四層，抵岩口，岩兩旁俱危壁，下瞰惟岩口直下，崩崖綴痕，梯故得宛轉依之。岩口上覆甚出，由中洞入門，甚隘，已而漸高，中懸石拱把，翠潤若玉，柱旁又有兩柱，上下垂接，斷僅寸，相對若天平針。由柱左北入穴，漸黑，既得東透光一縷，返由柱右東穿低竅出，門與中洞並列，爲兩西入隘，中復穹然不甚深，仍由中洞出，外岩北，杙一木透石隙間，復開一洞，東向，內稍寬，盡處乳柱懸楞，細同柯節，右有穴潛通中洞後，卽東透光處也。左稍下有穴空懸，不知入自何所，仍度所杙木，歷梯以下，下三梯，復見一梯，在梯左懸崖間，亟援之上，循崖端橫度而北，徑狹尺，長三丈餘，外橫木爲欄，崖窮又開一洞，亦東向，前一石自門左下垂數丈，端懸小石一，長三丈，圓徑尺，洞中高敞，不似中洞，明口暗腹也。後壁環一隙，更覺宛轉，卽上層懸穴下窺處，遍探各洞，久乃復歷十一梯下，是洞高張路旁，遠近見之，惟州治相背，反不得見。予西遊所歷登岩，險峻當以此岩冠，貴溪仙岩雖懸空瞰溪，然其上窄甚，不及此岩崿峒，而得水，則仙岩爲勝。

二十六。由州治前西南溯大溪二里，石山復攢繞成峽，八里踰



一岡溪南始見土山與溪北石山夾而西涉溪南踰土嶺凡八里西南轉入石山中里許西過石碇連陟二石脊共五里仍穿石山塢中山脈自石脊南去攢峯沓萼叢結甚固直東南盡於安平由安平東北經龍英抵下雷凡迂數百里皆以此山支叢脊故也西登石磴又平行峽中始直墜峽下磴道與澗水爭石共八里復與土山遇踰山脊望東南隔塢皆石峰攢合翠浪萬疊升陟土山中七里西南抵石峰下宿安村食冬瓜土人以為時物始知江南種當從此去

二十七西北盤陟土山共十六里及西塢復穿石山間又二里大溪自北而南溪之西卽下雷州州治開於萬曆閒屬南寧府宜統志之不載州南北三十里西與高平接界治西大山外向亦本州近地近爲高平莫夷所踞西爲州界者止一山州倚卽倚之其外皆莫夷境矣州南城外崇峰攢立一西南轉山峽者卽高平接界東南轉山峽卽隨州東大溪爲十九埂故道云二十八西北溯大溪二十里抵胡潤寨寨西南有大峽與交趾通界抵高平府可三日程西北長峽十五里兩峰湊合處曰鵝槽隘正西大山之陰卽歸順地日半至其州直北鵝槽嶺之北爲鎮安府地至其府亦兩日半程是日下午抵胡潤聞歸順道有交夷警乃決意返轅東北取向武州道鎮安與歸順近族也而世仇前糾高平莫夷破歸順虜州帥以去爲當道燭其奸僅



贖州帥弟以塞責未幾鎮安身死無後應歸順繼嗣而田州以  
疎族爭之歸順度力不敵田反乞援於莫莫向據歸順地未吐  
今且以為功遂驅大兵象陣代營鎮安莫夷過歸順即在是月  
十八日今其事未定不知當道作何處分也聞當道遣官往詰  
莫酋酋厚賂之報云彼以仇鬩無與中國事當道懼開邊釁亦  
曰土師司交惡與中國事無與不知土司絕世國有定憲今龍  
英鎮安正宜如昔日太平立郡故事疆理其地若莫夷助歸順  
得鎮安而自取歸順地是中國自撤其藩籬而日近狼虎也此  
邊陲一大利害朝廷烏乎知之

二十九候夫未至散步寨署前後始見大溪之水一西北自鵝

槽隘來者發源歸順州境南一北自土山峽中來者發源鎮安南  
境合於寨前流始大即志所謂邏水為左江西北源南下安平  
出馱綿埠云

三十下午夫始至溯北來大溪僅東北七里止南隴村

十一月初一南隴東北一里渡大溪北岸溯溪二里溪來自東  
南山峽轟墜下兩山峽口巨石橫亘如堰高數十丈闊十餘丈  
崩雷傾雪勢極偉壯西南來未之見也水由此西南去路由峽  
北山塢東北上踰嶺四里復與溪遇橋跨大溪上溪北自石山  
腋中來橋北溯溪入即鎮安道渡橋東半里抵羅峒村村倚塢  
北石山下從村東南山隙去又上英峒都康州道也余走向武



道則直東去。由村前南渡溪。循石山嘴東向上。里半登隴。上復見石山四合。五里上嶺。西北有土山排列。北則來龍大脊。與東南石峰分界。東北去。循東南石峯北平行。其陰升降者七里。下壑底東北入土山。四里宿上岷。胡潤境抵是始盡。

初二北三十二里。過上蕪村。東南折入石山夾。三里宿那岷。

初三東半里。當前有石山。巍聳大溪自南峽透出。經危峰西麓。抵其北。折而搗魏峯北嶠。中東向去。路亦循之。倚崖阻水。止容一人。板隘入。置柵爲關。曰北岸寨。東過寨南向。循寨崖再出隘。門南下。東行山塢間。南北石山排闥立。大溪貫其中。共東北六里。循路右山崖東南轉。始與溪別。又東二里。稅駕向武州舖司。

土州守黃君一見如故。遂歡飲十日。

十三始往百感岩。先經瑯山東。回望見東面懸梯。乃新縛以升。岩者晚出百感岩。度橫棧。未下梯。有歧東循崖。一岩在百感東。晚不及上。

十四出州城北半里。覓大溪。溪卽枯榕江。隨其支流而東。遊瑯岩。竟再往百感。遊東上岩。復從百感大岩內暗中穿洞。北下百感村。溯水觀水岩。岩外水深不得入。約明日縛筏以進。遂東北渡橋。由百感外村東南踰嶺。南出東來大路。西入隘門。過紅石崖下。其北石山有洞。南向甚崆峒。月下共五里。還舖舍。

十五東渡南曲小溪。循東流。有岩在路北。過百感村。僧言村氓



未得州命不敢縛筏乃返至瑯岩東北觀枯榕江三分水北爲龍庵村渡溪東隨所分北溪入山隘水東潛入穴憩崖上西向洞者久之。

十六黃君命人送遊水岩。

十七復以銀鐏爲予贈凡留向武者十六日岩洞奇勝特詳列於左。

向武石峰其洞甚多予所遊者七爲百感洞又東洞又下洞又後若水洞爲瑯山洞又下洞爲龍庵村東北江流所入之上洞其過而未登者三爲瑯山東北二里中江墜穴之上高崖南向洞又爲瑯山東南二里南江所繞獨峰西南向洞又爲州東北

巨峰南向洞洞在紅崖峰北其間而未至最以奇著者尚二爲向武西南三十里上英峒界吉祥洞洞前後通明溪流其間又東南二十里風輦洞共十二洞云。

枯榕江卽州北大溪自西南境東經北岸寨抵向武北龍巷村前江東石峰一枝東西列江當其西垂分爲三北枝東循石峰北入峽爲正派東循石峯南者爲中江南枝直東南流田塍間爲南江入峽者東北五里山勢四逼東搗入石穴中北透其下爲水洞循山南者忽下墜土穴亦北通百感洞南行塍間者東遠平疇間兩獨峰南又東抵隘門嶺西麓北折直趨百感東洞下稍東入峽亦下墜土穴北入百感三流分列石峰西隔山岐



壑皆復合百感一岩內北出爲大溪始東北流經土上林縣之  
刀村入右江

百感岩在州東北七里岩西南卽分水橫列山中江水所由入  
者東南卽隘門嶺北遷而屏於東南江水所由折而入北者西  
北卽岩背環爲龍巷村東入塢北江水所由下搗者東北乃此  
山後門繞爲百感村衆江合於岩中北出者此岩外四面也岩  
則中關於山半南通二門一前門一別穴皆隘北通後門甚拓  
而北面層巒阻閼不通人閒自州來必從南門入初抵山下東  
北板級上仰削崖高數百仞朽木橫棧同雲氣出沒西上危梯  
三十級達崖半得坪一掌東緣崖端石級左爲東洞道入正門  
則西踐棧棧闊二尺長六七丈石崖上下削立無少痕竇虬枝  
古幹倒懸上輒就之橫木爲棧外藉樹杪而內者則鑿石壁架  
長木梁其上削短枝鋪之又外就垂藤爲鎖索資人移踐棧上  
懸枝外時時下窺絕壑奇險甚劇棧西盡又北上懸梯十餘級  
入洞前門門南向高三尺五寸闊半之僅容偃僂入下文許中  
平石柱四環爲一室旁多細穴延光外爍宿火種於中爇炬由  
西北隙下下懸梯三十級底開北峽益高峻梯腳一小穴伏壁  
根南透出亦明室一圍在前門下層當懸棧下由北夾入路西  
穴平墜深不測乃循東壁行西壁下窪穴益多斜傾西墜深入  
可下通水穴然流沙圯瀉不受踵由夾東又北過一隘下懸梯



三十級底復平曠石紋粼粼俱作荔枝盆其西懸乳委蛇扳隙入如穿雲葉稍北轉西上望微明躡沙坂從透隘西出則南北高穹赫然大觀此處內抵西南爲偏門外抵東北通後門長四十餘丈闊十餘丈高二十餘丈上皆倒垂乳柱紛紜無慮千萬紀兩旁懸臺卷室楞榭縱橫覆殆無曠隙由東岩躋入西南洞底上層龕龕西則偏門光自頂射照耀幽壁扳峻峽西上達偏門門西南向頗隘下臨無地惟樹杪叢雜沉疊石閒岨嶂懸截不辨其處爲前山爲後山也西龕既窮仍東北下趨後門門東北向高二十丈門外兩旁石崖直墜山脚爲水洞門門內洞底中陷亦直墜通水洞陷處徑一丈五尺周圍如井井北巨石東西橫高洞內者五尺當門爲之闔由井東踐闔北上踞門之中內觀洞頂日厭雲物外又俯絕壁立重淵破壑中采色艷絕此闔內井外峽下透水門正作一架空石梁第勢極崇峻無從對矚耳闔東透石隘東北下磴倚絕壁壁石皆崢峴樹根穿隙怒發磴斷處閒橫木度下半里至百感村餘勝猶攝目不得合西來第一無以易之也

百感東岩在百感前門東由棧東危崖端緣石痕一縷東數十步得洞門亦南向內不甚深然高爽窈窕石備五采詭裂成形峽中東入三四丈輒北轉石特中峙踰隘進漸昏黑中又南北成峽深十丈平底上峻北盡處多巨柱迴環其外通明躋級北



上一竅敲側東透僅納天光由竅內北轉又連闢二室一室中通外嶂乃由此北達者一室則北盡東向先入中通室西隙俱旁環東亦多瑣穴外徹紛光綴引北透一隘達北室前遂虛敞高門門東臨絕壁直矗笋中立北復有懸崖倒垂外又聞水聲潺湲則南江北轉至此由其下入穴室內西壁羣乳環為小龕皆編竹架欄疑昔人棲隱所

百感下水岩在百感洞後門下百感村之南百感有內外兩村山從百感洞分兩界北向迴環下成深塢水出岩為江曲折北去村界於其間源闊土沃中豐腴產洞在內村南二百步門東北向上即後門也水自洞前匯為廣潭溢兩崖石壁倒插水底

道從潭中浮筏入洞中頂飄渺似出雲表不意乃向所凌跨處洞內兩壁排空南向入瀦水甚深西北一木梯懸嵌石間東壁石隙中拓有廬架絕頂而石壁削懸二十丈無可攀躋聞縛梯可綴壁上入洞十餘丈壑窮上峽懸透遙眺西南峽竇深入處日影熒熒浮動下峻不可及又不知所通為山前為山右也下壑石根插水水面無內入隙水由下泛溢出其中眾水交合處尚崆峒內局歷古竟無問津者返筏出洞從門外潭西躡崖登左壁透峽上亦闢岩一圓東向下臨前潭右瞰洞水前眺對崖旁竇紛綸可橫木跨洞門渡也

百感前下岩在百感洞前門下路西腋坑閉門亦南向高拓如堂



皇中多巨石磊落。後漸下。值水漲時。山前水亦自洞外驅而入。今乃無滴瀝。洞東北隅北進。峽上透隙光。下皆重石嵌累。數石下窺其底。水淵然涵深。竇石輒浮綴。兩崖間遂不得循隙下。架空入亦窮。惟倚石內望。西北峽盡處亦有返照光。隙長且狹。倒影浮動。壁間亦不知所通。為山前為山右也。

龍巷東北塢上洞。在州東北七里。卽百感西崖。第道由龍巷村東入山。北折成塢。枯榕北枝大江分。搗塢中。崖迴塢絕。乃東墜。穴洞正臨其上。門西向。左右皆危崖。下臨激湍。都無入徑。惟由其北板線崖<sup>綫</sup>踐懸壁入。上下雲芝疊發。東進五六丈後。忽烘然中燿。殆無霜旦。又三丈北轉。漸上稍隘。又三丈止。中亦豐懸柱。

不及百感。林立下有丸石。圓潔勝珠。散布坡坂間。坡坂上紋皆粼粼。綉鱗次簇。邊隆起中窪。圓珠堆嵌紋中。無恆河沙數。

瑯山岩在州北半里。形正如獨秀。始見西向門三疊。不知登道。反在東峯半。予至州。黃君始命縛梯通棧。板東麓危梯數百級。入東洞門。豁然高敞。門以內分三徑。北徑平開。一曲卽透北向門。直瞰龍巷北山。大溪西來界。其中抵橫列峯。西三分之一北面。鬱氣浮翠。遠近悉攬。南徑反從洞門內東折出。外復豁然。卽東洞門側竅也。一石屏橫斷。故假內峽中。曲達其內。下有深窪。循深窪上崖。南入峽。躋漸隘。石梁上橫跨。透梁下再上。峽南盡。東壁開穴。度空延納倒影。西竅高穹。南透出為南洞門。前正與州



東北巨峰對屏立當前。不知其下乃通行峽也。由西直入者高穹旁拓十丈後。即側偃曲房爲隘門。然其上盤益穹。當隘處亦上裂成峽。高聳尤劇。透隘門西出。當<sup>堂</sup>西關。光明四溢。以西洞門高敞獨甚也。堂左右分嵌樓龕。至洞門石闕高阻。透竅出。始俯瞰下崖穴。層接如累棋。已出西望。第三門最上。下即爲中門。坐其上。倒樹外垂。環流下湧。較南北門爲最暢。

下洞即在瑯山西麓。門西向。東入三丈餘。輒止。仰其上層穴。競開懸崖頂。凡疊門兩重。予初至此。望之深苦。不上。通明日又至。亦不知上層可由東達。并不知有東洞可級也。既而由南級往。百感出山之東。回望見梯已蜿蜒垂空。始知上洞由東入。但無

通中洞道耳。

向武多何首烏。大有至五斤者。生石山穴中。予於州墟以十二錢得三枚。重約十五斤。土人皆以爲馬槓榔云。

十八始別向武州。東過紅石崖下。直東即出東隘。可五十里至舊州。又三十里爲刀村。又三十里爲土上林縣。予從鎮遠道。乃南入山五里。南踰石山脊。亦置隘門。曰哽腋。下嶺入土山峽。東二十五里。宿峒槽村。

十九曉起半里。過寧墟。從南峽去。抵天燈墟。聞有營懷洞。乃龍英分界。爲左右二江脊。東十四里。飯龍瀨村。地已鎮遠屬。初至村。遙見屋角黃花燦爛。以爲菊。疑無此盛。逼視之。乃細花叢叢。



不知其名。又見白梅一樹，折之，固李也。黃英白李，錯紅霜葉中，亦仲冬一奇景。東十七里，又與石山遇，循南崖入，崖上石竇，歷亂下累石，屬南山。傍崖設隘門，南北兩石山，復崢嶸立，共一里。抵鎮遠州，州屬太平府，在郡東北二百里。

二十，鎮遠東一里，出石山隘，東北六里，山峽開，東西界俱深木，密藤蒙障，不辨土石。北七里，東踰土山嶺，共二里，為鎮遠信倫界。東四里，宿信倫州。

二十一，東南二里有岐，西南溯大溪，乃信安養利大道，為信倫入郡者。正南一里，東折入土山峽，其處西為鎮遠來所踰，石峯峭聚如林，東為土山，自信倫北繞而西，遙裏西面石峯，中開大

塢，亦自西南轉北去。東三里，登南嶺巔，東望盤谷，東復有石山遙列，自東北環峙西南矣。踰嶺東南四里，一村倚東山麓，為都結舊州，其站夫絕點，詭與信倫互委往返者，凡五日，乃散步村前，東隨溪入山峽，里餘，水西南轉，墜深峽中，東峰崖下有兩洞，南向，東洞頗寬邃，一圓石界門為兩，右門為大，右入深十丈，高三丈，闊如之，後壁轉漸隘，黑而中若穹然，甚遠，無炬不能入。從左南擴，復分兩歧，一東北，一東南，皆不深，然明爽玲透，有上下旁穿者，上則青石穹覆，盤旋竟尺，圓石密布，無餘地，又黃石倒垂，其間紋色俱異，此中一異境也。

二十七，夫始至，從舊州東北七里，上一嶺，嶺畔多叢木，木中行



嶺上者三里。林木少斷處。下瞰左右旋谷中。木合葉阻。飛鳥不能墜下。一里木山始盡。一木皆黃茅。彌望東十里。踰二嶺。得一平脊。東從嶺北行。漸入叢木。出山南。又度一脊。南望皆石峰排立。東南一峯尤峻。出羣峰上。過脊稍下。輒東上。直造前所望東南峻石峯北。始東南下。一里半及塢底。兩崖壁立。叢木深翳。循水穿峽一里。峽流南匯成陂。直漱峯足。又一里始東南出峽。東十三里。都吉州治。倚南山麓。土守農氏求予作兩院。申文留飲者三日。

十二月初二。乃行。東五里。一石峰東峙峽中。先是南北兩界山。自州西八里。卽排闥而至。至此則東石峰中峙。塢始盡。由石峰北東走北塢十二里。復穿山峽。峽甚逼。石骨稜稜刺人趾。不堪着足。出峽路忽降而下。已復南轉石壑中。高下亂石共三里。山漸開。路左右曲折。墜成兩潭。清流中瀦。心目恬霽。東折五里。北渡西來溪。溪水穿石壑中。路隨之。水石交亂。從溪北轉入北壑。共二里。水復自南來。又渡之。東一里。水自南而北。又渡之。乃東向出峽。忽墜峽直下者一里。下山是爲隆安界。亦爲太平南寧兩郡分壤處。乃知西山都結地直在西山頂也。北溯溪一里。得岩村。民居始有瓦房高櫺。如見漢儀矣。南行六里。抵西界石山下。峰皆尖若卓椎。若有中空者。行石山下。嵌石中南四里。乃循東界土山東南五里。宿巴潭村。黃姓家。



初三東南踰土山共三里溪自西北石山下東來泷泷有聲南  
隨溪一里西南平壑大開西界石山至此南盡而石猶未盡於  
是平疇曲塍中怪石森森危離危合高下不一流泉時漱之環  
以畦塍使置一椽其中石林精舍勝無敵此者行石閤一里得  
村曰巴定東北六里至隆安縣縣城在右江西南岸予前至南  
寧入郡堂觀屏閣所繪合郡圖此縣繪右江北故予自都結來  
以為必渡江後抵邑至此乃先邑後江非躬遊殊域則郡縣圖  
殊不足憑也地多巨竹徑尺餘土人以為牢柵婦人每擔四竹  
筒汲於溪筒節長至四尺縣北關外為鞏閣右江自西北來經  
閣下東去江涯深峭遙望竟不之見涯下不得南寧舟期明日發

初四舟忽改期初八遂以初五定擔夫為步行計

初六夫至始行出城南六里土山南盡一石山如椎錐中央立南

六里又抵一石山下山自北遙望若屏立近循其西麓愈見平展

已遶其南復南向東三里山忽東西兩壁前環列中央則北壁後

遜皆削崖布空三面圍合南獨缺前復有土岡橫接兩峯盡處

為當門閤焉先按百粵志記隆安有金榜山合沓成城至是心

異其山問之皆不知所謂金榜者問此山何名第曰石岩山也

予乃北半里踰土岡下直抵北崖脚東崖上兩裂透壁光若日

月高懸又望西崖頂裂罅層懸疊綴嵌空天半乃先從北崖麓

入一門門南向嵌壁可層累上內不甚寬而外皆疊透連躋二



重猶飛軒下臨。爽朗可憩。左轉一罅。西裂最深直。自崖巔麓底。板夾縫。僅可脅肩。上乃下趨。西崖懸扉。門東向。仰眺皆崇崖。莫躋。惟北崖有可扳線痕。乃逆上。兩盤短峽。下復上。始凌洞門。門以內。隙西北穹起。門外隙。直從崖麓墜下。峽深數十尺。前巨石立掩之。故自下望。祇知崖石懸立。不復知內有峽也。然峽壁峻削。上俯之。不得下。卽欲扳之。門內隙亦傾側難措手。內窺漸暗。於是從舊法扳緣下。南出大道。過路左魚奧村。村人勞予曰。遊金榜大洞樂乎。予始知金榜卽此山。遂問大洞云何。曰。是山三面環列。惟西面如屏。大洞在前崖後高峰半。中闢四門。宏朗靈透。予乃悟所遊者。爲前崖小洞。尚非大洞也。東南七里。右江自

北來。隨之南下。抵江畔。一水西自石峽中來注。水亦深廣可勝舟。但峽中多石。不能入耳。下有渡舟。曰龍場渡。渡溪東南二十里。至那同村宿。

初七。東南三十七里。抵平陸村。已爲宣化村屬。暮黑行四里。至那吉。人皆呼爲屯吉云。

初八。二十三里。至宋村。卽來時左右二江夾合處。南面臨左江。爲大果灣。宋村正在兩江夾中。實卽古之合江鎮。土人莫存其名矣。東一里卽右江口。路從東北一里半。渡右江。南望兩江合處。在半里外。正猶前日舟過右江口。內望此地也。渡右江東岸。東北四里。雨阻王宮村。



初九淋瀝雨中僅二十三里煨濕木爇衣<sup>羅</sup>氓村。

初十東南十五里至南寧崇善寺聞靜聞永訣事沒在九月二十四酉時止隔予行一日也寺僧引至窆骨所拜哭之南顧橋上顧奴行李適至遂寓城外梁店一別南寧已七十五日矣。

西南遊日記七

十一予在南寧行道莫決聞靜聞訣音必定骨雞足山遂至崇善寺拜棟骨起置大竹撞開北取慶遠府由黔入滇道。

十九乃行以接日<sup>積</sup>雨阻今始得夫也出南寧朝京門東北六十里至施逆駟。

二十由施逆東北十七里為韋村朝著山負宸列村後按郡志東八十里有橫山高險橫截江即此南走截江特立者也宋置橫山寨為市馬所又十七里溯流入山峽峽束處截塘堰水兩崖山甚逼曰關山土人又名為山心按志崑崙關在郡東九十餘里必此地無疑然土人皆謂崑崙關在賓州南謝在抗百粵



志亦謂在州南十里賓州南者乃古漏關非崑崙關也世因狄  
武襄駐賓州以上元饗士夜二鼓破崑崙遂以賓州古漏當之  
而今在南寧者皆以崑崙為關山若崑崙果去賓州十里則兩  
軍已對壘武襄十日駐飲二鼓起破之及曙反不足為神奇矣  
又十五里抵長駟又十里宿裡段墟

二十一北十里東八一隘門門以內屬賓州為柳州南寧分界  
處土人名隘為界牌嶺又指為崑崙關按志崑崙為南寧地去  
郡東九十五里此與賓分界去南寧已一百二十里今經行者  
見其處有隘遂以崑崙當之故西事洱云崑崙關不甚雄險其  
上多支徑欲守崑崙須慎開道亦悞謂此也又十六里小水自

南來東渡之為上林縣境自界牌嶺至此皆屬賓州獨此水東  
又為上林屬以上林思籠一駟孤懸其中也過橋東北升陟岡  
陀四里抵思籠其地東西南皆賓州境惟西北五十里達上林  
駟南面曰高尖山北面崇山並障東曰北斗山西曰晒麴嶺遙  
山層疊正西者曰陸蒙山溪自界牌嶺東北至此扼於北山遂  
轉西北去惟陸蒙隔於溪西也由思籠東下塢南北皆崇山逼  
夾乃高尖北斗二山東垂也東二里半至二山度脈脊水遂分  
二派脊東北者入都泥江西南者屬右江為黔鬱兩江脊踰脊  
隨水行峽中峽甚東半里稍下復為賓州界蓋賓州之地東西  
夾思籠一駟於中屬上林南界者橫過僅七里耳既下山踰逼

在賓州者又以古漏為崑崙



路益東轉已越高尖山東麓按志賓州南四十五里有古漏山古漏水出焉其關曰古漏關當卽此地然土人無復知者隨水東北出峽三十里至山口溪北山東盡溪南山亦漸東南轉其東平疇齊望天嵐空豁萬山阨塞中乃有浩蕩區東可十五里至賓州州在平楚中謝肇浙謂崑崙在州南十里此何據也予取三里道從山口北渡溪二十里至公村

二十二公村北越山七里西望雙峰峻極雲表者大明山也山在北斗山西北爲上林武緣分界北渡大明山大溪共八里登思落墟西北二十五里至開籠山一名雞籠由此西二十里可抵上林縣予自隆安西嶺入土山嶺崇卑不一皆壤阜無片石至

此復覩崢嶸面目矣北入石山峽中千百爲羣離合競變有分三岐者東岐大而高中次之西岐特銳細若竹枝詭態尤甚有聳立衆峰閒卓如簪筆者如此者五里北至洋渡大溪由上林西北崇山中東流至此直逼溪北石山下又一溪北自三里山峽中南向入大溪二流合其溪愈大循石山東抵遷江入都泥江焉舟渡北山下稍東溯南溪來西岸入峽十里峽復大開四山爲大塢一峰當塢起平疇中道經其西北五里度桂水橋抵三里城城建於萬曆十八年設參府移南丹衛於此以鎮壓八寨云

三里東西皆石山排列自後營分枝南下中有土山一支至此



盡參府即倚之。建牙城久頽，且無樓櫓。鎮江陸參公鎮此六年，增緝雉堞，創三門樓。南門外又建南樓，壯一方形勢。又前則東西二溪交於匯水橋，俱發源後營東西谷。西大東稍遜，合而下洋渡，而獨山岩又中峙為下流鑰。前又有獨山村之山為第二重。

三重。四境南踰洋渡，抵雞籠山，共二十里。北過後營，抵分脊巔，共五十里。東抵周泊隘，共二十五里。西抵蘇坑，共五十里。縱橫皆七十里。名三里者，以昔為賊踞。王文成平八寨，始清出之。編戶三里，一曰上無虞，二曰下無虞，三曰順業里。曾置鳳化縣，隨廢。設衛與參府鎮之。田糧初輸衛，後收歸上林縣。民以不便復

紛紛議歸衛矣。

三里以洋渡為前門。李依江西自上林大明山發源，東至此橫為洋渡。渡南石峰離立，若建標列戟。渡之北則石峰迴合，中開一峽。小江自北來，南注洋渡下流，即匯水橋下合流水也。溯小江入峽，宛轉石山中，數里兩界山漸拓平曠，中開獨山村界。其中一石山中立，溪西為外案，又有獨山岩為內案。北面石山愈愈開，土山自北來，結為城治。其東西兩界石山迴合如抱，愈遠愈密。殆天成石郭，蓋西來巨脊高峙為大明山，分支東走，遶蘇坑南北者為西界障。又北轉東抵後營，乃中抽土山一支，直南四十里，結其分度。東度者又南轉環繞為界障。故周泊蘇坑兩



地爲三里東西腋正中與城治相值其處東西最拓由周泊而南漸轉合漸至洋渡西向臨溪則青獅廟後岩也蘇坑南下亦漸轉漸合至洋渡東向臨溪則白崖堡東崖也二崖湊於洋渡爲三里城之前門

東西兩溪俱在兩界石內土山北自後營盤伏來西源遂夾與俱西界者南至羅墟北又合一西來水曲折遠城西抵石村併汛塘水東南出匯水橋下合東溪東界水南至琴岩東又南出琴水橋合一東來水曲折抵東南石峯下又穿流山峽中乃西出合西溪二水合而南滌兩獨山又南注洋渡東併大江東去西北峽卽洋渡東北峽爲青獅廟後崖

仙廟山在城西四里西面石山之最近城者石峰中懸三面陔絕惟從西南均板崖上則三里四際盡在目中昔有村氓登山樵採遂仙去故土人廟祀之

汛塘浮石在城西五里汛塘中汛塘者卽仙廟山南塢也自仙廟山前廟西接佛子均塢中塘長數里水漲時洪流漫衍巨魚逆流上土人利之故障爲塘而不畝其地當塘之中有石壑一區上浮如敗荷覆葉支撐旁偃中空漏水一潭遠之石箕踞其上去水不及三尺極蜿蜒分合勢西北里許卽汛塘村村倚北下山下

汛塘後塢石洞在城西七里西山東來過佛子嶺分爲兩支一



支直東爲汎塘村後峯一支北轉爲韋龜山二山東北又環成一塢東以仙廟山爲前障中有支峰對其麓一洞東向前隔水內望甚深中可容千人所向東峰上亦有西向洞高懸敲側皆醫沉莽中俱未及登

韋龜洞在城西十里韋龜村西由汎塘踰佛子嶺北其道近北由羅墟轉石山嘴而南道較遠五里其中羣峰環繞內拓平疇小水自北趨南分流石穴去惟北面石山少開亦獨峯中峙爲之標韋龜山中懸東南直北向對之函蓋獨闢山水皆逆桿洵世外丹丘也數十家倚山北麓以造楮爲業棲舍纍纍高下層嵌石隙望之欲仙西卽洞門亦北向初入甚隘暗西南下數步

透出石隙忽穹然高蟠內朗四際博通頂有懸空穴天光倒映正中墮北向躋石上乳柱前排環一平臺可布几席拾級南下匯泉碧黛中用周村汲平臺前西多森立柱幢蓋縱橫文采瑩潤東則怪石磊落如獅如象交踞不少遜內復可左右深入秉炬由左右西向入漸下漸南歧可半里又開一壑聞由壑梯險上入甚深以覓導不得出復東向由左入北躋半里轉一竇返三里雖岩谷絕盛固當以是岩冠况岩外村居又擅桃源谷口之勝乎

佛子嶺北岩在城西七里汎塘村西佛子嶺者石山分枝東出爲汎塘仙廟諸峯嶺界其間石骨嶙嶙踰嶺北下韋龜村西塢



水南流抵其麓，傾入洞門。洞北向甚豁，中迴成潭。潭水際四壁，時久霽，溪涸，入無涓流。潭中渚水，特澄深不可測。潭四週皆石，壁無隙，聞其南隙伏水下。大潦從北下擊，洞滿不能容，則躍出於山南崖。門右穿旁竇，南抵潭東涯上。一石高碧，潭傍上懸洞頂，不及尺。若鵲橋，坐瞰深潭，橋石上更悠然也。

佛子嶺南岩，門南向。前有石洞天，成若槽，橋橫其上。時澗中無水，卽由澗入洞。洞外高岩層穹，倒裂不能宏拓。北入洞，僅受一人，中漸黑而光潔，類琢磨者。入頗深，卽北洞洩水道。水盛，北洞中滿，水從下反溢出，激湧勢壯，故洞與澗皆若磨礪以成云。

佛子嶺西北岩，去佛子嶺西北一里，門東向。韋村西塢水自北來，又分流一澗，西抵此洞前穴。地墜，洞乘水上，臨外門危朗，入可三四丈，輒止。洞南又一隙，傾側下，下漸黑，轉西南向，無炬出。聞下與水遇，循水西南炬行，卽透出後山，乃知此村水墜穴，山透腹與向武百感一轍也。

琴水岩在城東六里，琴水橋北中支土山東南盡處也。東溪自北來，環山東土山，旣盡，獨露石山，一拳石參差層脊。山南亦有村數家，洞在村西山半，門南向。初入甚窪下，北進數丈，秉炬踰一隘，西轉，始穹然中高，西透明穴，上垂柱，繡紛當明處，平石闊三丈，臥洞底，可扳憩。躋西穴出，則山之西面也。下山仍轉出山前，騎周玩之。洞前稍下，又東開一洞，門亦南向。村人以爲積薪



寮北又開二岩。上下立。上者托重岩。苦無徑。下岩多瀦水。然亦不能與前通也。

周泊隘。在城東二十五里。東界石山脊也。隘當脊中。南北崇隘。崖高壓。東踰隘。即遷江境。其東北石山。內為八寨之羅洪洞。東南石山。內為馬腸洞。地無居民。皆巨木。

獨山岩。今名砥柱岩。在城南四里。此地有三獨山。皆以旁絕。附麗得名。一在溪東岸。與東界石山近。一在此山南五里。障溪而東。環之獨。此山高正當中立。與向武瑯岩絕類。省中獨秀。無此峭拔透達也。岩當山腹。南北透。南門尤高。遊前有巨石。自岩頂分跨而下。界洞門為兩。正門在東偏。門稍西南。皆有古木虬藤。

倒挂其上。每輕風搖曳。香翠眩望。岩中合掌起。高數丈。闊一丈五尺。平通山後者五六丈。南北徹眺。衆山無不羅列出。北竅上。飛崖倒覆。又分竅。西透亦西。北轉通一門。架閣兩重。上穿圓竅。入下竅。行若透橋。出又闢西向洞。一洞四門相通。乃小峰乃出。此殊幻。惟東面不通。而崖外一門東向。西入深數丈。是又分門立戶者。

小獨山岩。在城東南五里。與砥柱東西夾溪立。自砥柱東望。似此山偏傍東界。自此山西望。又似砥柱偏與西界近。平中望之。兩山去東西界各懸絕等也。山小於砥柱。尖銳殊甚。極似一浮屠中立。下亦通一門。石外跨西透小隙上。懸崖側峙。平石為臺。



上斗絕處有洞南向極深若能階梯上亦異境也遊砥柱日獨  
隨一騎浮江并盡此勝

砥柱岩西峯水岩在城南四里有峰兀突砥柱西高不及砥柱  
迴列倍之上冒下削其淋漓痕儼若香片側立南多空裂成門  
北麓洞北向兩崖合掌上並內深杳有光南透若甚崆峒第洞  
口瀦水溢兩崖不能入策馬渡水水多亂石不能前

堡北岩在城南十二里巨堡北堡南去洋渡僅三里洞門東向  
深六丈後窪下不能深入

獨山村西北水岩在城南八里大道西門東向洞口危石磊落  
嵌嵌正倚西山山下中窅然沉黑竟不得深入也

白崖堡南岩在城南十六里由洋渡北岸西湖江轉入山塢得  
白崖堡山南北迴合又成一洞天洞在南山上重門重北向高級  
萬仞壁自堡中仰之即在目眦末無從着足崖底石腳下插亦  
開裂成紋初板數隙如升重樓復出望之始知去洞猶極遠土  
人秉炬前導仍出山口循南山東抵南麓拾級上得一門東南  
向為後洞正對卓筆青獅崖諸峯洞內東北上躋甚暗更北上  
益峻遙見天光中引愈扳躍以升得掌大隙瞰隙外即闢巨門  
則上洞下層也隙隘不受側身過祇可俯眺而已內更上躋透  
隘出一洞門岬然北臨無地向仰眺莫可及者今忽躬立其上  
此洞最高前夾崖下陷假以木橫架補其闕即堪托憩凭挈諸



峯也仍下內隘再外窺第二層洞已置為必不可到姑以杖從  
隙中投之由故道下抵前遙見天光處明炬遍燭北崖下得一  
穴亟引炬蛇行入中漸高成峽數丈後宛轉東折又北透數丈  
其門北向高裂巨樹盤根洞中偃出洞外為第三層洞洞前平  
石如掌上下皆危崖峭懸絕壁上眺層門重疊出數十仞巔即  
上洞與第二層洞也稍緣平石而東峽壁間藤樹蟠絡乃猿接  
以登久之竟歷第二層外洞前所投杖儼然在洞深三丈高五  
丈嵌兩上下兩洞間獨不中通必藉外躋始達倍覺幽峭  
白崖堡南山下洞在後洞西三百步門亦東南向洞外高崖氤  
氳內橫分二道一西南一東北皆下從窪中入必以炬西南者

數丈後輒分兩層下層一井大穴由井下墜即得平峽西行三  
丈又懸峽下墜得平窪中峽竅盤錯乳柱花萼垂垂圍簇者千  
萬計又白乳蓮華一簇徑丈三尺細瓣攢合逆懸洞底根平貼  
上石懸一線盤折久之忽明光一縷透竅出井口如前在前井  
之南矣又從上層西南入中石脊高下屢見下陷坑窞無底疑  
即前所探下層也深入亦盤互乳柱細皆若駢枝團聚每千百  
枝惟後營東洞乳柱多而作大垂龍舞虬狀比列皆數十丈  
云於是從東北進不五丈有北嵌竅兩重俱淺東向扳崖上進  
漸曲亦如西洞之深奧少殺耳

青獅南洞在城南二十里西南與上林分界處路由洋渡過江

盤錯



東南四里。乃至其山石峰卓立。洞在山下。開東西二門。東門坦下。門高數丈。闊亦數丈。直透山西者三十丈。平拓修整。下闕如砥。慢覆其上。間有石柱倒挂。幔下洞西垂。又石柱一隊。外自洞口排列。抵洞後西界。別成長榭。從榭內矚外洞。如疎櫂倚牖。牽幙自蔽。西門特崇峻。下巨石盤疊爲臺。上忽中盤高穹。從臺內眺。已不見前洞頂。祇覺四面層繞。皆雲氣噓鬱。時有竅穴鉤連。空懸無上處。外眺則西面三岐卓筆。諸詭岫正近。當洞門設之。供由臺北下。奧窟中復開平洞。一圍外峙。巨石爲障。下透中虛。若橋之度空。從此秉炬北入。東轉穴大而易窮。東從脇隘直入。計其隘處當不下十五丈。已踰外洞半。此下洞最奧處也。出生

臺上仰視上層。冀一登不可得。忽見北光墮影。知其外通陸公。令健捷者從山外扳崖索之。久之。其人已穿入其上。呼曰。速携炬來。尚可深入。予從之。乃從西門下循山麓。轉出山北。南向扳崖躋山半。有門北向。穿石竇入。俯見諸君酌臺上。其上砥石平度。石端懸空處。復有石柱外列。分窗界戶。故自下望之。綴竇不一。內竇旁通也。於是秉炬東入。愈深。竇中闕幾二十丈。東窮西北轉。得一竇。板而北上。忽倒影遙徹。有峽縱橫。駢沓東北。峽一穴高懸。僅納雲日光。道絕升降。更披西北。峽上透得一北向門。愈高。吐納嵐烟。其北腋尚有餘奧。然所入已不甚遙。乃由其門出。欲緣石覓磴下。下皆削立壁。復從洞中道降。至懸臺下瞰處。



諸君自下呼噪人人皆以為仙也

青獅北洞在青獅潭北岸青獅潭者即洋渡下流也江潭深匯為羣魚巢窟乃參府禁沼罟網所不敢入者北崖亦多穹門與南洞隔江對予雨中過此不及旁搜又西為青獅廟危峰西南來抵水盡江至此合流而東峰截其灣愈見岬嶮廟倚山下遂極幽悶焉

後營東山洞在城北四十里即後營東界石山西麓也去後營四里中又界小山一重山坳中斷處有尖峯在前亦曰獨山則其西護也直抵東山下小石峯一枝西附起遙見當峰半一門西向高懸則西洞後穿別竅正門尚在南脇閒有兩門東西列

皆南向先從西一門入中平朗若堂皇石柱後列從其東轉出柱後下墜小穴上則垂乳窈窕圍成龕紋極玲瓏纖巧龕中圓且峻貯水一池沉映崖壁光影上照紺碧奪目穿西隙而入又闢後室高整與前堂無異門西向下臨絕壑即前從塢中遙見高懸者既乃列炬從東洞門入門外隘中窪入數丈輒巨乳夭矯垂空下續紛不一底甚平歧而西峽東隙皆不數丈盡惟直北踰乳隙進內復稍寬東折過方石中橫諺號為棺材石從石東北轉石坡高下乳筴參差立披竅北入復闢一最巨室乳柱迴環閣闔莫測道應從西北竅入予悞穿東南峽腋仍下方石邊聞此洞內透甚遐行至半日一大溪中貫上有空明倒影飛



梁渡溪直出遷江云予欲挽炬復入從者恐東炬不給強予出計所入未及十之一也瑰麗已壓諸岩矣

三層閣在參府廳事東陸公所新構長松迴蔭羣峯四合松風亭在署後土山巔松陰山色遙接成埤月夜尤佳絕予下榻層閣幾至忘行陸公餞予於松風亭沉醉月中故以終記

三里週迴石峯中當土山盡處風氣含和獨盛於此土膏腴懿生物茁茂非他處可及參府四圍喬松百餘株高刺霄大可三人抱予疑數百年物考之碑記植於隆慶初建帥府時栽踰六十年其巨如此爲良區異壤可知所藝禾稼特大恆種一郭長倍之性柔嘉亦異庶土所植鴨大者重七十兩方體粵西鯽魚

甚艱長僅寸此地有至尺者木棉樹最高巨粵西隨處有之此中尤多春時花大如木筆紅色燦然時有素禽羣啄四面繞之竹皆中實外多刺叢生最大如吾地虛中者閒有之然無巨者予以二十二下午抵三里二十四乃入謁陸公爲下榻東閣自後無雨無霽日二十八稍霽陸公特同予遊韋龜岩後復雨十一年正月十三始遊兩獨山岩十五雨中往遊周泊隘晚酌南樓觀龍燈甚盛二十七同陸公乃孫伯恆遊白崖堡岩洞二十八陸公昆仲至同遊青獅岩既乃觀打魚江潭抵暮歸臥疴東閣者數日二月初三雨中復往青獅潭觀打魚先是張揮使謂青獅岩南雞籠山亦有大岩故陸公以騎送予命予同往張謂雨



中不可入。固阻子。仍冒雨歸。自後予辭陸公行。陸公擇十三日為期。至是日始治裝。凡留三里者五十日。

十三。午後出東門。渡琴水橋。共六里。北向入山。皆東石西土。凡三十三里。抵後營。營在西畔土山頂。

十四。東遊東岩。出飯於後營下。山北行。兩界山仍東石西土。小水南流。兩山中。經後營南。西南墜壘去。即琴水橋上流也。北八

里。土脊自西而東。橫屬兩界。中為南北分水脊。南入洋渡。北入羅木渡焉。自此而北。昔皆三里民居。今為八寨賊踞。北二十二

里。為橋藍村。又十二里。是為周安鎮。鎮也者。并西南古鵬。北蘇吉。總為三鎮界。八寨中者也。今古鵬已廢。周安僅數家。倚溪西

溪東膏腴。俱為賊踞。不得成鎮矣。

十五。隨大溪西岸北行。石峯西突。路左。峯四面多開穴竅。中空。第高莫能上。北又有荔枝岩。深黑。須炬入。聞中有荔枝。益於是

東西界皆石峯。無復土山。中間先北涉一小水。又北涉一澗水。皆東向。入大溪。共四里。小峰當塢立。嵌空多穴。乃下流。鎮山亦

如三里之獨山。但南北易位耳。又六里。抵蘇吉鎮。復與土山遇。又十八里。一江西自萬峰石峽中破隘出。東復破萬峰入峽。則

都泥江也。剗木舟二。以渡江。閣與太平左。江隆安右。江畧相似。兩岸甚峻。江嵌深崖。開土人云。自利州那地至此。北渡江。飯羅

木堡。堡屬慶遠府賓州慶遠分南北。以此江界。堡北有小江南

所謂北盤江



入都泥湖小江三十里抵高陽站。站西石峯後卽猺窟。其西有夷江卽羅木渡上流也。

十六北二十里東西兩界俱石山。西界石山突東出曰橫山。乃忻城縣永定司分界處。緣山嘴盤崖北轉。密樹蒙蔽。磊石上。上下莫可窺眺。偶瞰路下石潭淵。沉仰見雲嶂排空。高下隱現。令人愴恍。二十里至永定司。又西北六十里踰石門。如門。西望擴然。則永順司接境。南卽石峰叢合。皆搖窟。北循石山西麓。升降土阜。上多迴環中窪。如塘如井。俯不見底。水由地行。此其中墜處。一如太平府所見。北七里歇東峯麓草塘村。

十七北三十里抵慶遠府之南門。

西南遊日記八

慶遠郡城在龍江南。龍江西自懷遠鎮北。憑空山透石穴出。循北界石山而東流。少殺羅木渡兩岸。森石嶙峋。過之。江北石峯聳立。曰北山。中爲會仙。東爲青烏。西爲宜山。又西爲天門。拜相山。卽馮京祖墓。皆凭臨江北。中復開塢。北趨天河者也。江南卽城。城南五里石山一枝自西而東。曰南山。中爲龍隱洞。山東爲屏山。西爲火號山。又西爲九龍山。皆蜿蜒郡南爲來脈。

西竺寺在郡城西門外。殿宏壯。爲粵西所僅見。南爲香山寺。寺前平地湧石環立。爲門爲峽。爲峰。爲嶂。甚微而幻。且小峯頂每有巨樹箕踞。其根籠絡。與石爲一。幹盤曲下覆。極似蘇閭盆玩。寺西



一池中亦有石池西北為黃文節祠後亦有臥龍石前有龍溪西流焉。

龍隱溪岩在郡城南五里石峰東隅迴環北轉處也前三門俱西向後通三背亦有三門俱東南向其中上下縱橫無不貫穿今中道交通處以巨石室穴洞遂分而為兩北偏一門最高敞前有佛宇南偏二門在山腋間其中門已無路予先從南門入北透暗穴反從上層下瞰得之無從下仍出南門板搜到其處再携炬入遂盡其奧曲。

北門西向高穹前列佛宇三楹入數丈洞稍隘偏南遂昏昧秉炬直東入又數丈有歧在南崖上板木梯以登南向入一窪下

陷如穿橫木板以橫渡又南西壁下絃一縷緣崖根臥鱗脊蜿蜒似龍形隱起又南數丈踰隘俯石級下墜下層穴亦開南北塢南透則與中門內穴通已為巨石隔斷遂北透渡二隘仰其上則橫板上渡處再北塢隘且窮遂從橫板竅板空上仍北下木梯直東入又踰一隘有歧亦南去從之漸見前竅流光燿燿已透山得後門矣行數丈抵後門門東南向下瞰平疇山麓溪一枝環而北透其腋前復有石山遶為塢別成一洞天仍北返分歧處直東入數丈遇巨石中路由北隙側身入皆井凭空下陷大三四丈深如之懸梯投炬令一人垂索下兩人從上援索以繫梯其人既下予隨之東南入一竅中復有下墜穴極深隘一



飛鼠驚窻上。從其西南板崖上。崖內亦皆井空陷。燭之不見底。循其上西南入。穴窮乃依故徑直西出前門。

南門在北洞南二百步。山腋間。俗謂之雙門。洞東向。入輒橫裂。分南北。南向忽明。透山腹數丈。出後門。亦後洞最南者。北向內分兩歧。一北一東北。予先從直北者。透腋平入。下伏深窻。循其上。若履棧道。數丈北抵透明處。中門西闢。在五丈下。此則中門上層也。前列柱垂楞。飛崖下懸。與下洞相隔。隙間俯窺下洞。洞前明敞。不啻堂皇也。上層踰隘北轉。昏黑不能入。乃出南門。索炬於北岩復入。至分歧東北處。踰石垣下。內寬宏窈窕。數丈約二十丈。透出東門。則後洞中門也。門內五丈轉西南。不十丈輒

有歧東南去

轉

窮。

中門在南門北數十步。與南門祇隔一崖。上下懸絕。叢箐翳之。下而復上。搜剔久之。乃得門。秉炬東入。其後壁頂南來上層也。頂從其下入峽。峽窮。扳而上。南即上層。北轉處向所瞰昏黑不能下者。今援側坂可通焉。東直進又五六丈。穿穴下。為大石所窒。塞即北洞交通中斷處也。大抵北洞後通之門一。南洞後通之門二。中洞則南通南洞上層。北通北洞奧窟。是山東西南三面無不貫達。惟此山不通。而頂有蚺蛇洞。另闢一境云。蚺蛇洞在龍隱山北絕頂。導山東北麓一里。溪水從兩山峽中。破壁西北來。漱空倒影。自成一壑。渡水共一里。板崖南上。兩崖



如削瓜突石累疊緣之躋佳木叢藤蒙密搖颺上一里洞門穹然北向正與郡城對前有土山障溪西北去環麓成塢門之中石柱玲瓏疊綴前跨一臺東闢洞空闊多外透竇東崖窮南轉始昏黑須炬入數丈無復旁竅乃出仰眺東崖上復有重龕扳崖上躋則外龕甚巨內龕重綴其上坐內龕前對外龕北竇一圓恰當其中照若明鏡

盧僧洞在龍隱北洞旁北數十步卽是門亦西向最隘中闢一室東北板隙上又得一小室其東北奧垂蓋上懸下聳圓笋若人之首卽指以爲盧僧者也

九龍潭在郡城西南五里平岡上有潭一泓深窅無底水常溢流成溪九龍洞石山在其南山北有岩北向前立石屏由西隙入內闕巨室不甚高後復有石柱一圍當洞之中秉炬南入又得一室南漸隘乃出岩西下又有一南入峽甚深隘秉炬深十餘丈而止底多石凡色黃不及向武瑩白東下又一覆壁橫拓平廣去岩西北四里石陣排列自西而東如插屏直止於香山寺前俗稱爲鐵索繫孤舟云又一里返香山寺僧謂九龍洞甚深須易數炬此洞猶丹崖墓非九龍岩也

會仙山在龍江北南而正臨郡城渡江半里卽抵山麓盤崖峻疊東西南俱無可上惟北山腋裁受級道從西麓北向行抵山西北隅乃東躋第一層南歧爲百子岩第二層南歧爲雪花洞



歧而北爲百丈深井岩直東上嶺脊南轉爲絕頂此會仙西北  
面勝也東麓北向上者直抵絕壁下最東北隅爲丹流閣西循  
崖爲東觀以次漸西爲白龍洞爲中觀爲西觀此會仙東南面  
勝也

百子岩在會仙山西崖半門西向入下門三文餘梯空上上復  
疊爲洞前門復出下門上洞雖不邃峻而是山石質皆青黝洞  
石獨赭南又一洞與上洞並復青石爲異

雪花洞在會仙山西崖乃百子上絕頂側洞西北向前結庵奉  
大士庵後秉炬入門少不宏漸進愈崇拓皆石柱石門宛轉數  
曲內復狹下石始欹崎不復平底越一小潭南轉境遂窮夜宿

洞側臺巔三面斗臨絕壑灑氣上接冲穆萬象

絕頂中懸霄漢江流如帶橫於下東界青烏山西界天門拜相  
山俱自北而南左右翼對宜山則近伏西腋以其卑小宜民則  
此山巖巖壓衆可知矣峯頂有玄帝殿頰巨無棲者

深井在絕頂北平雪花洞列道由二天門東北行忽山頂中陷  
下周迴數十丈深且百丈四面巖斲削下嵌密樹古藤垂結相  
虧蔽俯不見底獨南面石崖自山頂直剖下下有洞北向高穹  
上及崖半中特平遠反可敬矚以洞嵯削無片隙樹莫能緣也  
崖西北峯頭橫突石窻中踞之正對洞門傍又一棋枰石可憩  
予晚傳杖雪花洞至橫突石上心目俱動僧謂洞直通山南底



穿江底出南山恐未必然也。

中觀在會仙山南崖下緣石坡上至此則危崖削立洞南向洞東三百步得白龍岩。

白龍岩在中觀東危崖下洞南向入門即西行秉炬漸轉西北入愈崇放二丈內石柱中懸撐洞頂殊極偉麗後有巨石中互四旁愈擴窄隙入石柱益繁立數丈度隘又數丈石壁忽湧起如蓮下垂下絕無旁竇上復深昧去平地三四丈不得級乃出懸柱處又東上一枝入數丈石柱夾而成門踰門東下漸北轉恐火炬不給遂借未窮竟而返。

東觀在白龍洞東北二百步穹岩覆空門南向西復有東向洞崇峻崆峒西入數丈忽深坑下墜上嵌危石北轉益宏蓋下洞陷窟透石北轉於下洞上穹亦凌石北轉中皆嵌嵌石橫跨側偃彼此閉阻故無深入道第一望窅黑而已是洞乃白龍后洞前洞東歧未竟處可通此出云。

丹流閣在東觀東北二百步危崖至此又一折矣閣西有洞門東向甚高洞西入亦數十丈隘即無深入處閣北崖嶺巔北路遂盡此

西觀在中觀西三百步危崖上上下下皆石壁懸互後有洞亦南向予至中觀仰眺不見洞遂東折既下山麓迴睇見之不及復往矣聞會仙山西南層崖上又有仙姑岩由西南山麓扳躋上當在西觀上層雪花百子岩南崖無正道也。



多靈山最高聳其上四時皆春瑤花仙果不絕於樹登其巔四望無與障者山在慶遠西南九十里永順司鄧宗勝之境乃龍江西南都泥山東北二江中分脊也

予以十一年二月十七抵慶遠郡稅駕香山寺日方午乃抵南山遊龍隱雙門洞諸勝即宿龍隱庵

十八由山北登蚌蛇洞既下循南山北西行二里半穿山腋南出循山南又西一里半過龍潭又西一里渡龍潭所北出小溪南入丹霞墓洞遂渡龍江北循會仙岩西麓東上山共三里遊雪花洞又一里登絕頂下宿雪花洞

十九探深井岩從雪花東坳下遊百子岩下山二里至臥雲閣携火遊中觀東觀丹流閣白龍洞下午還香山寺

二十日日坐雨寺中

二十六早晴同僧慧庵往九龍西南五里越北流溪繞丹霞墓洞東麓南三百步迴眺丹霞墓山峰頂有東向崖玲幻極無可登道又東南三百步抵東峯北麓路旁皆水坑流貫路行其上若橋西有巨楓樹一株下為九龍祠九龍潭在祠南石崖下水從中北向經路旁水坑出丹霞墓洞前平岡潭乃其下流也九龍洞山在郡城西南<sup>五里</sup>丹霞墓東南山從丹霞墓山後繞而東其北崖有洞下即深潭嵌石壁中中一石中橫東西界潭為二西潭南石壁高數丈下插潭底潭多巨魚穴深入通流處當沉伏



水脚洞高懸潭上三文餘門頗北向頗隘入乃高穹峽南進秉  
炬直入十餘丈東轉下雖平石級屈曲湧起中環停滯成仙田  
東二丈忽深坑下陷由坑上南崖偃僂出坑之東下平仙田每  
每如西但其上覆石壓乳人不能舉首僅披隙透稍南北分岐  
逼仄愈難入仍西出坑崖上投炬締視坑中下深三文餘復開  
洞東西透西洞直入與上峽等東洞則橫拓空闊南崖平覆如  
棧惟北則自上直插坑底裂竅南北闊二丈東西長三文洞頂  
懸柱倒蓮恰下貫坑中色瑩潔逾衆乳俯窺久之恨無梯索得  
竟奧底也東三百步又有岩北向深十餘丈在東峯崖過脊處  
其九龍西峯高懸洞在丹霞墓山之東頂無路上重崖綴石逆  
扳雖險然石銛競裂似可援手以發足乃凌空上躍者數層從  
其北得一岩門東向前隘峻極中通一線可尺許曲折入三文  
內忽穹開西南轉遂黑暗中又轉入一小室似無餘隙乃出然  
非高懸洞也高懸洞尚在南畔絕崖上虧蔽不能仰見稍降轉  
崖脚扳隙以升岩亦東向然無門環迴前列高十丈覆室若垂  
雲之雲內壁後層削起上嵌赭石一區尤玲幻連開二門累累  
上齊雲氣惜無十丈梯凌空上也下山五里返香山寺  
二十七渡北門大江登北岸觀音閣前爲澄碧庵皆江崖危石  
飛突洪流就之結廬者又北一里過雪花洞下又三里循西山  
轉入西塢北界皆石峰崔巍南則土山間之中有土岡南北屬



踰岡西下。三門岩在北崖之中。乃北抵山下拾級上。先抵崖東。則石障縱橫駢沓。皆可深入。前有徑循崖端而西。其岩中闢高二丈五尺。深如之。橫拓四丈餘。外列三石。界門為四。俱南向。惟中門最巨。東腋一門頗卑伏。稱三門者。舉其大也。西門崖壁莫能前。其上石態更奇。東門穿隙出。即與東偏縱隙並出。岩東披縱橫隙。亦宛轉三四丈。始闢而大。踰闕東上。前穴通明。另成一境。乃岩外奧室也。透前穴出。石高擎穴前。平齊臺東。又有宛轉小隙。瓣萼連簇。紛披無不畢達。由臺前小隙下。即前循崖端而西。徑復從崖端東轉。石山嘴稍入。有洞內闕。亦南向。深數丈。致幽美。乃出舊道東返三百步。北望山坳。闕岩高懸絕峽上。輒北

板崖以登岩前皆棕竹翳峽中洞當轉峽側上下懸峭門西南

東入岩

向入五六丈。遙望西南銳峰一線直上。列洞前洞兩旁石壁廉利。沓合洞後透石門入。凡三闕三合。中連下透。俱若浮橋架空。思躋其上。竟不得受踵處。及已穿徹三橋。中轉寬黑。從左壁摸索上板東崖南出三四丈。凌內梁之東。梁背刀削起。趾不得着。梁西亦峻石拄頂。隔別不容西渡。又南緣東崖凌中梁。不可渡。如前。益南凌前崖之東。梁背平整。架兩崖間。又圓石尺許聳立。上遂平行。西渡梁北轉入峽門。即內二梁西端石所界成者。峽內東豁。即下通梁後。西窺又透入一穴。中皆為龕。為門為峽。細沙鋪底。平潔如玉。但暗東不能窮深。即返至前梁西崖。半板石



笋南下穿石窟出抵洞中央矣出洞取棕竹數枝東可百步一  
洞裂削崖開如丁字上橫下豎門南向乃北抵崖腳石峽間累  
數巨石上最上一石高削數丈無級下有斗大穴蛇穿以入中  
遂穹然上高數十丈外透起則丁字豎裂也洞內夾壁入底傾  
下北進七八丈東折遂昏昧不可詰出洞下累石循崖東數十步又入巨  
峽門亦南向北進五六丈東折入黑暗中忽有光如星在履底  
近索之復不見益東二三丈石板盡處復熒熒微光動就視之  
一外界石如屏中細孔僅寸屈曲透漏不一下亦有斗大穴可  
墜乃懸手抵下層下外亦開門南向門內距石屏僅二丈屏下又橫竅  
內通即前所望履底有光處門外循崖東數丈又得一南向岩

內不深折後壁特石竅玲透岩前崖磴懸絕不能東仍西歷前  
所入洞口下至山麓東百步又一洞南向當北麓穿入之則東  
轉透峽五六丈出門又東豁者也聞古城洞在青烏山前東門渡  
江三里可至石壁對夾中多種蔬者時已暮恐渡舟晚不及濟  
返由故道抵渡龍江抵香山寺街鼓發矣

二十八為多靈山遊西南十五里踰土嶺復與石山過又三里  
南穿其峽西循石峰南麓行二里為黃窰村村西石峰前突曰  
黃窰山西二十里南渡下遷江共七里出土山隘於是塢遂南北豁  
東西兩界皆石山中有溪北流去南湖流三里宿黃村道人茅



二十九黃村南三里峯迴塢夾藤蘿虧蔽山窮水盡處蒙密中不知

水從何出但聞潺潺有聲來自足底耳從此躡級西上踰坳共

一里抵都田隘溪自西南來抵坳窟下穿穴東出即黃村上流

也南八里登大歇嶺始見多靈三峰如筆架高懸西南二十里

外下嶺又三里西由塢中入石山峽漸轉西北行為永順境地

宵絕無人居石峰離立色青白成紋態鬱紆若鏤刻五里路右

一岩駢起啓門皆南向東洞在麓可穿隙東出西洞須扳石始達

門後透腋北入凌竇隙以上轉南出已在洞門上層矣下石板

底平薄通如葉踐之聲逢逢南有穴下俯洞門猶層樓通牖但自

外望不覺上洞中虛也結構絕似會仙百子岩勝當十倍之南

下山西北二里北山麓石崖下覆橫亘如行廊南一里路漸降

北望石峰頂岩穹然東南向內微透明穴乃石梁飛架峰頭者

下至壑足南轉始與溪遇凡兩渡此溪南五里直抵多靈北麓

路在王山自多靈天橋下墜從其南前轉其溪自南來乃多靈以西石山村以東夾成之者抵

西南行一里下土山渡溪至石山村乃飯一老人家望多靈正

當其南問其上有廬無居者遂借鍋於老人老人携火曳杖前

導仍渡溪東南上土山共二里越岡得塢與多靈接阪老人指

予登山道別去始殺土麓東南上轉東北行二里遇去峽最峻坂之峽上抵石崖下崖峭立叢木中得石磴

忽聞犬聲以為絕巘幸有人久之不見但竹相駢置道旁蓋他

村竊竹者聞人至避去耳於是扳磴上磴為墮葉覆積幾不得

級磴旁壽枋大至三人抱者甚眾共上三里得坪庵倚之北向竹



匡木几灑掃具悉給二桶尚存斗米芾苔封古竈人去已久庵  
側斷<sup>積</sup>新竹炊具甚贍而水不可得庵兩旁俱無汲水道惟東北  
路倚草樹伏循崖甚遠予從之半里果得泉蓋山頂皆緣懸崖  
綴石獨此腋衆木合翳水自崖石墜溜不絕昔人鑿痕接竹引  
之以通流供酌乃携水返庵令從人泝米炊予竟入南叢箬中  
覓登頂道初上<sup>乃竊第者所殘</sup>有路痕竹盡上皆巨茅沒髻頂披之不開隙里  
許踰一西走脊脊西又旁起一峯下不能見至是始陟之循脊  
東上又一里踰一南走脊脊南亦旁起一峯此兩峰卽大歇嶺  
所望合中峯爲筆架者於是又循脊北上石崖峻垂扳石隙<sup>乃</sup>  
得移步直北上一里凌絕頂頂孤懸衆石山上南北逾一丈東

西五丈惟南面可躋餘三面皆嵌空不受趾頂之北<sup>有崖</sup>自頂平剖  
直墜至庵前石磴下巨木叢列翳不可窺惟遙望四圍重峰矗  
矗盛列南壑下層坡隔坂時見有水汪洋蓋都泥一曲也土人  
謂此山四時皆春花果佳珍林無素木然芾可採食懷之輒復  
迷道若予所見者引泉覆葉<sup>石</sup>之上有葉如秋海棠大倍之花如  
秋海棠者色獨白不知何種山頂巨木皆薔薇綠枝綴花殷紅  
鮮耀又有酸草莖大逾指正赤作珊瑚色眺望久之仍由故道  
返庵餐所炊粥積薪佛座前爲長明燈乃架匡展簟臥  
三月初一晨至石山村覓勝後山仰見石崖最高處洞門穹懸  
依小徑抵西峽以爲扳崖上躋顧乃穿腋下北踰隘東峯峭立



西崖多懸竅。然蘿蔓沓叢，無可躋。北隨峽出，又通別塢，不能窮。仍轉出村前，東索溪水所由入，則洞伏穴，伏山坳下，門南向。溪流瀉入之，洞高闊各二丈，深四丈。水至後壁，旁分二門入，昏黑莫進。洞前石柱當其右，穿柱入，下有石坡尺許，傍流渡入，不煩涉水。柱內西登隙上，復闢一龕，底平上穹，亦石柱前列，與水洞並向。出洞，還飯老人家，東北抵黃村庵，前道人瀹茶煮笋以待。乃取所摘多靈山頂茶芽，潔釜焙之。當吾鄉陽羨最佳，茗香色都無下意。

初二，別道人北渡，下遷江，東上高山，南阪踰兩土岡，下塢有塘一方，潑水甚清。西北石峰下破澗去，叢木翳之甚遙。又東踰岡，巨塘匯陂，閘北墜，下分爲兩流：一北入山穴，一東循山嘴環流。黃窰村前抵村，詢觀岩道，道須東經草峽，北出峽口，西轉循山之陰，可得岩，從之，遂東南出村，北望崖壁半穹，開洞門，東向，高逾不及板，二里半北入草峽，又東北一里踰石脊，西轉，卽黃窰諸峰石山之陰也。山排列西北去，北盡於獨山，而觀岩在其中。循山東麓西北行，凡三里，西南折，至其下，則危崖上覆，下有深潭，水潑其中，不見所出，惟從崖北隅瀉入，巨門中窅黑，水聲甚沸。蓋水自山南來，溢底出，潑爲此塘，卽黃窰西巨塘分流入山穴者也。乃一出，輒復北入穴，尤異覆岩之上，垂柱懸旌，紛紜歷亂。後壁石腳直逆潭底中，上迴旋龕竇，嵌漏不一，俱隔潭不能



至潭東北崖間神祠倚之祠後卽潭水北入石門處門南向甚  
高中望崆峒疑浮筏可進從神祠東北出平疇有北趨道欲從  
之入郡旣乃愈北始知獨山懷遠道也忽見西山下潭淵然直  
逼石崖崖南開穴則前北向入門水又透此出也計所穿山腹  
中亦不甚遙若溯流入當可抵水聲甚沸處乃東轉半里前潭水  
散爲平溪潏村南東去又東北八里得入郡大道又五里路兩  
旁多背井墜穴與太平一轍於是聞水聲淙淙石壑或斷或連  
水走其底俯瞰底水所墜不一道皆不甚巨東二里踰岡下水  
走石壑底復如前又三里抵香山寺宿焉是後予欲西由南丹  
州入黔日候騎郡中至初九卒不得騎予決爲步行計

初十晨飯香山別慧庵西取南丹道去二十里有山中峙界兩  
石山間曰獨山尖峭孤聳亦獨秀流亞又西北十里泉一泓止  
石室中色澄碧西一岩北向前大石屏峙門洞深五丈後壁皆  
蓮花葉蓋層綴二里爲大峒堡大峒在南山背堡後南入峽尚  
三四里始至洞一曰天門洞云自堡北望之南峰廻環如玦入  
至堡後又類蓮瓣自裂可披隙進也過堡十里江流自南而北  
江闊半慶遠乃懷遠鎮南江也江自荔波縣來至河池州東境  
爲金城江又南合思恩縣東江南抵永順司北境入山中暗  
伏屈曲數里東出又于泰順里東北過此遂北與北江合爲龍江焉渡江  
西岸卽爲懷遠鎮鎮北有北江自思恩縣總州來舟溯南江至



懷遠止北江通小舟可四日直達總州。

十一西北四十五里抵德勝鎮。

十二由鎮北抵北山下半里過觀音庵庵左一洞南向倚山椒高五丈後有巨柱中屏穿東西隙俱可入乃東炬從東隙北進數丈洞遂高拓多擎天柱諸詭勝東折數丈北面光熠熠自上倒影以為從此出洞也及東去尚有道更張<sup>炬</sup>覓之又五丈止仍北出望明光趨之則懸石巉岨光上透如衆月並升予將扳石登企忽平峽繞其左而轉遂透出一北向門又在前所望通明下也出洞板叢崖南躋石萼攢杳正過通明上穴南向凌山頂登玉皇閣稍憩下山折磴石崖間凡數曲下出過前洞南去德

勝又半里抵韋家山從山西麓板級登崖懸峽轉樹倒垂其上類若乘空上有別柯從岩門橫架巨樹杪合爲一橫架處枝體穿漏利空穴竅工窮雕鏤岩門在上下削崖間門西向前對樹杪就隘爲門門旁即觀音閣閣左右皆可入洞不十丈輒止大約以凭虛爲勝無中通奇竇也北返德勝鎮西二里岐而南渡一小溪平原中亂石叢簇分裂不一中瀦水一泓澄無片草石頂各跨樹盤絡如香山寺石片更稠合閉以潭渚尤奇潭西一石峽下與潭通南一石獨高巨僧結茅於上曰蓮花庵門就石隙東西北俱小流環之地較香山幽麗特絕仍出<sup>北</sup>大道又一里入河池所。



十四為北山遊出所城北門行平壑不半里亂石秀立路隅為門為標為屏為梁為芝為笋奇美博出倍巧於蓮花庵香山寺者又北向陟山危磴倚雲崖曲折上一里抵庵庵西凌削崖去上下皆絕壁庵無他奇惟臨深凭遠升眺清曠耳下山至所城東北入壽山寺亂石一區水縱橫匯其中石巔構廬三四處高下散布西渡橋遇側石一隊亦南北列上下有穴如門穿而西一庵北向前匯為塘石所擁成者庵後聳石獨高憩久之返所城十五西南二十三里宿於馬牯塘北村十六西南五里一江自北而南深嵌危崖間所謂東江也西渡江闊數丈深不測再南下數里即與金城江合石穴中云西十五里又

一江自北而南闊十丈深與東江並乃自荔波來者是為金城渡渡北西岸有水懸崖平瀉三丈聲轟如雷東注大江則官村南來者也渡江西十四里宿鬼岩村十七西北三十三里入河池州十八西十六里為南丹境又三十里宿岩田村十九西十里水自東北注西南深不及膝闊五丈是為大江源發西北山壑中南流北轉至永順界合東江下流者也渡江又十里至金村其地西往錫坑止十五里西北去南丹州五十里二十西北三里塢抵小水自南而北大道南隨之錫坑道也從之北二里遂轉為東西塢大溪自西來即南出為大江者於是



西湖大溪二十五里爲大徐村。又溯流四里抵西山。下北轉一里。涉水上西山。望北塢。山環壑盡。瀑流從山腋乘空下。高及千尺。粵西皆石山林立。故懸水最艱。今於夷壤得覩此。亦汗漫中奇邁也。西上一里。瞻顧不能釋。又十三里。稅駕南丹州。逆旅南丹西三日。抵巴鶯。西卽泗城州界。銀錫二敞在南丹東南四十里。其敞有三。曰新州。屬南丹。曰高峯。屬河池州。曰中坑。屬那地州。三地相間。僅一二里。由敞南兩日程。至涯洞。有大江自西而東。爲那地東蘭二州界。其渡處名河水渡。卽都泥江也。上流來自泗城界。下流東歷永順土司北五里。下堰爲羅木渡。二十四。候夫南丹者數日。始行西北四里。石峰復出。溯峽西入。

三里。一石中立山峽。高銳殊絕。兩旁危嶂隘夾。益覺崢嶸。又三里。西出夾山關。數家倚北峰下。後削崖如屏。前接新篁密箐。路行峰竹中。忽北山麓。石崖飛架。小水西來。直漱石崖。隄下北入石洞中。洞南向。在架石東危崖下。又西北二十里。止蠟北村。二十五。北竟村峒。四里有洞。在西小山坑中。門東南向。外甚敞。中壁屏立。又闢內門。沉沉不可測。路由東山上。隔塢行。對望之。藤蘿掩蔽。中有水潺潺出。洞門成澗。南流去。又西北二十七里。抵飄渺村。

二十六。西六里。北轉山開。東西兩界。東界山自東突西。凡五六峰。西面悉平削。下墜排列而北。若五老西向。澗由中北向。去北六里。



東界突山既盡塢大開東望一尖峰迴立中空如合掌懸架衆  
峰閉空明下透合處僅湊徒杠千尺白雲正東映危峰脇可借  
香爐瀑雪不復辨爲山爲雲也自桂林來所見穿山甚衆雖高  
下各奮若此剜空徹雲者得未曾有又北十二里抵銀村  
二十七北五里爲壁<sup>邑</sup>村乃丹州極北哨由此西去兩日程曰  
羅猴爲泗城東北境都泥上流所經也壁<sup>邑</sup>村北五里至山界與  
貴州下司分界處粵西西北境止此予粵西遊亦此止

### 盤江考

南北兩盤江予於粵西已睹其下流其發源俱在雲南東境予  
過貴州亦資孔駟輒窮之駟西十里過火燒鋪又西南五里抵  
小洞嶺嶺北二十里有黑山高峻爲衆山冠此嶺乃其南下脊  
嶺東水卽東向行經火燒鋪亦資孔乃西北入黑山東峽北出  
合於北盤江嶺西水自北峽南流經明明所西塢東南出亦佐  
縣南下南盤江小洞一嶺遂爲南北盤分水脊一統志謂南北  
二盤俱發源霑益州東南二百里北流者爲北盤南流者爲南  
盤皆指此黑山南洞嶺一東出火燒鋪一西出明明所二流也  
後西至交水城東中平開巨塢北自霑益州炎方駟南踰此經



曲靖郡塢互南北不下百里中皆平疇三流縱橫其間匯為海子有舩南通越州州在曲靖東南四十里舟行至州水西南入石峽中懸絕不能上下乃登陸十五里復下舟南達陸涼州越州東一水又自白石崖龍潭來與交水海子合出石峽乃滇東第一巨溪也為南盤上流云予憩足交水聞曲靖東南有石堡溫泉勝遂由海子西而南南下二十里一溪來自西北轉東南去入交海橋跨之為白石江涓細僅數丈名獨著以沐西平破首達里麻於此遂以入滇也渡橋南六里抵曲靖郡出郡南門大霧沐分兵從上流潛濟繞出其後遂破之今觀線大山溪何足險據且白石上流為戎家東南二十五里海子汪洋漲溢至是為東西山所東南下伏峽冲源短流微滌帶不過數里內沐尚靖之捷誇為冒霧涉江自上流夾攻之為不世勳不閒橋橫架交溪上曰上橋橋西開一塢東向即由上橋西折入知乃與均堂無異也

塢半里至溫泉泉可浴泡珠時發自池底北池沸泡尤多對以六角亭曰噴玉東踰坡半里抵橋頭村村西行田疇閒忽一石高懸四面蒼叢樓楹上出即石崖堡也與溫泉北隔一塢徑平疇里許抵堡東麓南向板級上凌絕頂則海子東界山南繞於前西界山自北來中突為此崖又西峙而南為水口山交溪南出上橋前為東界山南遶所扼輒西南匯為海子正當石堡南其東北白石崖龍潭與東南亦佐之水合交溪下流於越州乃西南破峽去而石堡正懸立眾峰中諸水又匯而滌之危崖古松倍見幽勝北下山西一里抵石堡村迴眺石堡兩面西北兩面嵌空奇峭步步不能去由村南下坡東半里踰一石梁南走



梁下者即交溪。溪遂東折南去。又東一里半抵東山麓。東北上山。從石片中行。土傾峽墜。崩嵌紛錯。石骨競露如裂瓣。從之傾曲取道。石多幻質。色正黑如着墨。片片英山絕品。石中上者一里至嶺坳下。見西塢南流之江。下墜嶺南之峽。乃交溪由橋頭南下。橫截此山南麓以東去者也。予已睹南盤源。聞有西源更遠。直西南至石屏州。隨流考之。其水源發自石屏西四十里之關口。流為寶秀山巨塘。又東南下石屏。匯為異龍湖。湖有九曲三島。週一百五十里。島之最西北近城者。曰大水城。頂有海潮寺。稍東島曰小水城。舟經大水城南隅。有芰荷百畝。巨朵錦邊湖中植蓮。此為最盛。水又東經臨安郡南。為瀘江。穿顏洞出。又東至阿彌州。東北入盤江。盤江者。即交水海子。南經越州陸梁路南寧州。至州東六十里。婆兮甸合撫仙湖水。又南至播箕街河甸合曲江。又東至阿彌州。稍東合瀘江。二江合為南盤江。遂東北流。廣西府東山外。予時徵諸廣西土人。竟不知江所向。乃北過師宗州。又東北去羅平州十五里。抵一塢。曰興哆囉。其塢西傍白蠟。東瞻羅莊。南去甚遙。而羅莊山森峭。東界皆石峰。離立分行。競奮復見。粵西面目。蓋此叢巖怪峯。西南始此。東北盡此。道州磅礴數千里。為西南奇勝。此又其西南之極也。已而至羅平。詢土人盤江曲折始知。江自廣西府流入師宗界。即出羅平。東南隅羅莊山外。抵巴旦夷寨。會江底河寨。去羅平東南二



百里江東即廣南府境又東北經巴澤河格巴吉興龍那貢至

霸樓為霸樓江

六地名俱粵西安隆長官司地今遂入泗城境之

八蠟者香於是為右江再下又有廣南富州之水自者格經泗

城之葛閣歷裡來合而下田州云後予至雲南省城過楊林見

北一海子特大古稱嘉稱澤北成大溪出河口溪北有山甚峻

曰堯林山又東北十里出峽經果子園北至尋甸府合郡城西

北水匯為南海子又東北與馬龍合於郡東二十里七星橋為

阿交合溪予因究水所出知其下霑益州為可渡河乃北盤江

上流也按此則南北二盤但名稱之同耳發源非一山之水北

盤自可渡河而東始南合亦資孔火燒舖之水則火燒舖非北

盤之源也南盤自交水發源南渡越州始合明月所之水則明

月所非南盤之源也乃一統志北盤拾楊林南盤拾交水而取

東南枝分者為源則南北源一山之悞宜訂正者一又以南盤

至八蠟者香一水自南東北來合土人指以為北盤江遂謂南北

盤皆出於田州夫北盤過安南已東南下都泥由泗城東北界

經郡地永順出羅木渡下遷江則此東北合南盤之水是自泗

城西北菁山所出謂兩江合於普安州泗城州之誤宜訂正者

二至統志最悞處又謂南北二盤分流千里會於合江鎮蓋惟

南寧府西左右江合流處為合江鎮是直以太平府左江為南

盤田州右江反為北盤矣今以予所身歷綜校之南盤自霑益



州炎方駟南下經交水由靖南過樓頭橋由越州陸涼路南南抵  
阿彌州境北合曲江瀘江始東轉漸北合彌勒巴甸江是為額羅  
江又東北經大柏塢小柏塢又北經廣西府東八十里永安渡  
又東北過師宗州東七十里黑如渡又東北過羅平州東南巴  
旦寨合江底水經巴澤巴吉合黃草壩水東南抵霸樓合者坪  
水始下舊安隆出白隘為右江北盤自楊林海子北出高明州  
果子園東北經熱水塘合馬龍州中和山水抵尋甸城東北去  
夷地為車洪江下可渡橋轉東南經普安州北境合三板橋諸  
水入泗城州東北境又東注那地州永順司經羅木渡出遷江  
來賓為都泥江東入武宣之柳江是南盤出南寧北盤出象州

相去不下千里而南寧合江鎮乃南盤與交趾麗江合非北盤  
與南盤合也其兩盤江相合處直至潯州府黔鬱二江會流時  
始合但此地南北盤已各隱名為鬱江黔江矣則謂南盤北盤  
即為南寧左右江之誤宜訂正者三若夫田州右江源明屬南  
志書又謂源自富州是棄大源而取支水猶之志南盤者源明  
月所志北盤者源火燒舖彼不辨端末巨細悍然秉筆類一丘  
之貉也

### 記遊顏洞

臨安府顏洞凡三為典史顏姓者所開名最著予一至滇省每  
飯未嘗忘鉅鹿也遂由省中南過通海縣遊縣南之秀山上一



里半爲灝穹宮。宮前巨山茶二株，曰紅雲殿。宮建自萬曆初。距今裁六十年。山茶樹遂冠南土。又南抵臨安府城南臨瀘江。此江西自後<sup>石</sup>屏州異龍湖來，東北穿出顏洞，而合郡衆水亦以此洞爲洩水穴也。於是覓一導遊者，於城東接待寺顏洞大道，當循城而南，渡瀘江橋，導者從寺前隔江東北小路行，遂不得渡江。東觀三溪會合處，由寺北循塘岸東行，塘東皆紅蓮覆地，密不見水。東北十五里渡養公橋，水自西北來，東南入瀘。又五里上山爲金雞哨，哨南瀘江會諸水，由此東入峽。峽逼甚，水傾其中，東抵洞口尚里餘，望洞頂石崖雙劈如門對峙，洞正透其下，重岡迴夾之，不可得見。求土人導入，皆曰水漲流急，此非遊時。

若兩月前水涸，可不橋入。時卽有橋亦不能，况無橋耶。橋非一處，每洞中水深處，輒架木以渡。往例按君來遊，架橋且費百金，他費亦百金。土人苦之，乘普酋兵變，託言洞東卽阿彌境，叛人嘗出沒此，遂絕官長遊洞者。予必欲一至洞門，土人曰須渡江南岸，隨峽入，所謂瀘江橋大道也。始悔爲導者誤，乃捨水洞，覓南明萬象二陸洞，從哨東下坡，復上山登頂，東瞰峽江環峽東入，洞門卽在東峽下。予所登山處，正與其上雙崖平對，門猶爲曲掩，但見峭崖西向，湧水東傾，搗穴吞流之勢，已無隱形矣。東北三里逾嶺脊，下山二里，則極東石壁迴聳如環，半城下開洞門北向，予望之有異，從之直下，一里抵峽中，又一里半抵東壁。



下稍南上洞門廓然大書雲津洞蓋水洞中門也遊顏洞以雲津爲奇從前門架橋入出後門約四五里暗中傍水行中忽闕門延景其上又絕壁迴環故自奇絕予不能入其前洞而得之重嶠絕巘閒且但知萬象南明不復知有雲津也誠出予意外遂瞰洞而下洞底水從西南穴中來盤門內而東復入東南穴去予下臨水湄徑之水闊三文洞高五大文而東西當門透明處徑可二十丈但水所出入直逼外壁故非橋莫行出水西穴漸暗不可遠窺東爲水入穴處稍旁拓隔水眺之中垂列乳柱繽紛窈窕復上出洞外上眺東南北三面俱環壁無可上仍西出舊道北上山東一里踰嶺已涉東壁迴環上嶺塢中東向一里其地南北各起層峰石崖時突萬象洞卽在北崖上乃導者妄謂在南崖下直下者一里抵南崖一洞東向高四丈水從中湧出兩崖角起前對爲峽水出洞破峽勢極雄壯蓋水洞後門也又東二里抵老鼠村執途人問之萬象洞在西北嶺上卽前所從下山處洞甚深歷降而下底與水洞通予欲更至洞門晚色已合去宿館尚十里念此三洞慕之數十年趨走萬里乃至而叛夷阻之陽侯隔之太陽促之導人又悞之生平遊屐斯爲最阨矣

記遊太華山

出省城西南二里下舟兩岸平疇夾水十里田盡萑葦滿澤舟



行深綠間不復知爲滇池巨流是爲草海草間舟道甚狹遙望  
西山繞臂東出削崖排空則羅漢寺也又西十五里抵高嶢乃  
舍舟登陸高嶢者西山中遜處也南北山皆環而東出中獨西  
遜水亦西逼之有數百家倚山臨水爲迤西大道北上有傳園  
園西上五里爲碧雞關卽大道達安寧州者由高嶢南上爲楊  
太史祠祠南至華高亭太華盡於羅漢卽碧雞山南突爲重崖者  
蓋碧雞山自西北互東南進耳諸峰由西南互東北兩山相接  
卽西山中遜處故大道從之上置關高嶢實當水埧焉予南一  
里飯太史祠又南過一村乃西南上山共三里山半得華亭寺  
寺東向後倚危峰草海臨其寺前由寺南側門出循寺南西上南

踰支隴入腋共二里東南升嶺嶺界華亭太華兩寺中而東突  
者南踰嶺西折入腋湊間上爲危峰下盤深谷太華則高峙谷  
東與行處平對然路必窮極西腋後乃東轉出腋中懸流兩派  
墜石窟幽峭險仄不行此徑不見也轉峽又東盤山嘴共一里  
俯瞰一寺在下壑乃太平寺也又南一里抵太華寺寺亦東向  
殿前夾墀皆山茶南一枝尤巨異前廊南穿廡入閣東向瞰海  
然此處所望猶止及草海若濛濛浩蕩觀當更在羅漢寺南也  
遂出南側門稍南下循塢西入又東轉一里半南踰嶺嶺自西  
峯最高處東垂下有大道直上爲登頂道截之東南下復南轉  
遇石峯嶙峋南擁輒從其北東向墜土坑下共一里又西行叢



石中一里復上躡崖端盤崖而南見南崖上下如蜂房燕窩累  
累欲墮者皆羅漢寺南北庵也披石隙稍下一里抵北庵已出  
文殊岩上始得正道由此南下為羅漢寺正殿由此南上為朝  
天橋橋架斷岩間上下皆嵌崖此復斬崖中墜橋渡而南即為  
靈官殿殿門北向臨橋由殿東側門下扳危躡峻愈上愈奇而  
樓供純而殿供而閣供而宮名抱皆東向臨海嵌懸崖間  
每上數十丈得斗大平崖輒杙空架隙成之故諸殿俱不巨而  
點雲綴石互為披映至此始曠然全收水海之勝南崖有亭前  
突北崖橫倚樓樓前高栢一株撐空漾翠並樓而坐如坐危檣  
上不復知有崖石下藉也抱宮南削崖上杙木棧穿石穴棧懸

崖樹穴透崖隙皆極險峭度隙有小樓粘石端寢舍龍炊竈皆具  
北庵景至此而極乃下朝天橋謂羅漢正殿殿後崖高百仞崖  
南轉折間泉一方渟崖麓乃朝天橋遊縫而下者曰刁冷泉南  
踰泉即東南折其上崖更崇列中止滌坪一縷若腰帶下悉潰  
阪崩崖直插海脚底坪間梵宇仙宮雷神廟三佛殿壽佛殿次第  
聯綴真武宮之上崖愈傑聳昔梁王避暑於此又名避暑臺為  
南庵盡處上即穴石小樓也更南則庵盡而崖不盡穹壁覆雲

重崖拓而更合南絕壁下有漪瀾閣址還至正殿東向出山門  
凡八折下二里抵山麓有村氓數十家俱罟網為業村南即龍  
王堂前臨水海由其後南循南崖麓村盡波連崖勢愈出上已



過漪瀾舊址南壁愈拓削一去五里黃石痕掛壁下土人名爲  
掛榜山再南則崖迴嘴突巨石壘空嵌水折成壘南復分接屏  
壁雄峭不若前而兀突離奇又開異境三里下瞰海涯舟出沒  
石隙中有結茅南涯側者亟懸仄徑下得金線泉泉自西山透  
腹出外分三門大僅如盎中崆峒悉巨石敲仄不可入水由盎  
門分注海海中細魚溯流入洞是名金線魚魚大不踰四寸中  
中腴脂首尾金一縷如線爲瀕池珍味泉北半里有大石洞洞  
門東瞰大海卽在大道下崖傾莫可墜必迂其南始得逶迤入  
卽前所望石中小舟出沒處也門內石質透玲裂隙森柱俱當明  
處南入數丈輒暗見炬更南洞愈崇拓共一里始轉而分東西

向東上三丈止西入窈窕莫極懼火炬不給乃出上山間抱一  
宮問山頂黑龍池道須北向太華中乃南轉然池實在山南金  
線泉絕頂以此地崖崇石峻非扳援可至耳予輒從危崖歷隙  
上壁雖峭石縫多稜懸躍無不如意壁紋瓊葩瑤莖千容萬變  
皆目所未收素習者惟牡丹枝葉離披布滿石隙爲此地習絕邁  
乃結子垂垂外綠中紅又予地所未見土人以高遠莫知採鑿  
第曰山間野藥不知何物也扳躋里餘遂躡嶺則石萼鱗鱗若  
出水青蓮平散竟地峰端踐側鍔而南惟西南一峰最高行峰  
頂四里凌其上爲碧雞絕頂頂南石萼駢叢南墜又起一兀突  
峰高少遜之乃南盡海口山也絕頂東下二里已臨金線泉之



上乃於聳崖閒觀黑龍池而下。

滇中花木皆奇。而山茶山鵲爲最。山茶花大逾碗。攢合成球。有分心捲邊軟枝者爲第一。省城推重者。城外太華寺。城中張石夫所居。朵紅樓。樓前一株。挺立三丈餘。一株盤垂。幾及半畝。垂者叢枝密幹。下覆及地。所謂柔枝也。又爲分心大紅。皆遂爲滇城冠。山鵲一花。具五色。花大如山茶。聞一路迤西。莫盛於大理永昌境。花紅形與吾地同。但家食時。疑色不稱名。至此則花紅之實。紅艷果不減花也。



黔遊記

第六冊  
貴州



豐寧下司上司獨山州都勻府麻哈州平越衛新添衛龍里

衛貴州府平壩衛普定衛安莊衛查城頂站安南衛普安州

戊寅三月二十七自南丹北鄙呂石村易騎入重山中漸履無

人之境五里踰山界嶺南丹下又北一里踰石隘是為艱坪嶺

其石極嵯峨其樹極蒙密其路極崎嶇黔粵之界以此而分南

北之水亦由此而別然其水亦俱下都泥則石隘之脊乃自東

而西度盡於巴鶩之境而多靈大脊猶在其東也北下一里就

峽西行一里始有田塍又半里峽轉北塢始大開又北一里有

村在西塢中日由夷此中諸塢四面皆高不知水從何出然由



夷村南石壁下有洞東向細流自畦中淙淙入透山西而去固  
知大脊猶在東也至此南丹差騎辭去由夷人始許夫騎久乃  
不至促久之止以二夫負擔去余獨坐其欄從午至暮始得騎  
西北二里至山寨則寨人已送擔亦前去乃由其東上嶺越脊  
北下一里行壑中又越一里再越嶺脊下行峽中壑員而峽長  
南北向皆有脊中互無洩水之隙而北互之脊石齒如鋸橫鋒  
豎鏗莫可投足而時已昏暮躍馬而下此騎真堪託死生也越  
脊直墜峽底踰所上數倍始知前之員壑長峽猶在山半也峽  
底有流從南脊下溢遂滔滔成流隨之西向行共里許有村在  
南山麓擔夫已換去又騎而西半里擔夫又已去蓋村人恐余  
止其家故亟換之行而又無騎換騎夫不肯前余強之暗行西  
北半里有溪自東而西橫堰其中左右淵深由堰上北渡馬蹄  
得得險甚又西轉過一村半里由村西而北向踰嶺始與雙擔  
同行暗中呼聲相屬不辨其為石為影也共二上二下遂行田  
塍間共五里過一寨排門入居人頗盛半里復排一門出又行  
田塍中一里半叩門入舊司門以內茅舍俱閉莫為啓久之守  
一啓戶者無茅無飯而臥

上下一司者即豐寧司也瀕南界者分為下司與南丹接壤二  
司皆楊姓兄弟也而不相睦今上司為楊<sup>袖</sup>勳強而有制道路開  
治盜賊屏息下司為楊國賢地亂不能轄民皆剽掠三里之內



靡非賊窟。其東有七榜之地。地寬而渥。鴛鴦尤甚。其叔楊雨道聚眾其中。為亂首。人莫敢入。舊司者下司。昔日司治也。為上司所破。國賢移居寨上。寨在南山之麓。與舊司南北相對。中隔一塢。然亦無奇險也。

二十八。平明起。雨霏霏下。余令隨夫以鹽易米而炊。余以刺索夫於南寨。國賢避不出。託言與上司不合。不敢發。夫止許護送者。兩三人送出境。余飯而待之。送者亦不至。乃僱夫分肩行李。從舊司北向踰嶺。共三里餘。下至餓鬼橋。有小水自東北注西南。小石梁跨其上。禦人者每每橫行於此。又北二里踰嶺。已為上司界。下嶺二里。有村在西塢。而路東有楓木樹對之。又東北

踰嶺二里。有村在東塢。倚峯其前環山為壑。中窪為田。村倚東峰。有

石厓當村後。路循西嶺。與村隔隴相向。始敢對之。息肩。又西北

踰嶺二里。轉而西向行。於是峽大開。南北相向。南山下村居甚

稠。北山則大路倚之。西行五里。路復南北踰嶺。蓋此地大山在

東北。路俱緣其西南。上雖有升降。然俱上多下少。逶迤以升者

也。又西北二里踰嶺。路北有峰。迴互層疊。儼然天盤龍髻。堦半

有洞門。西向。數十家倚之。路乃北轉。又一里。越其西岡。北向下。

西岡者。大山分支。西突為盤髻峰。其下橫岡。西度者也。西岡之

北。山又東西排闥。北望西界山。一員高插。峰頭轟然。若倚天之柱。

其北石崖迴沓。即上司治所託也。東界土司。即路所循而行者。



共北五里。路與西界直甌柱對。又北二里。忽山雨大至。擔夫停擔。各牽笠蔽雨。余持傘亦蔽一挑。忽四人持鏢負弩。懸劍橐矢。自後奔突而至。兩人趨余傘下。一人趨顧僕傘下。一人趨一夫笠下。皆勇壯兇獍。似避雨。又似夾持。余甚恐。問余何往。余對以都勻。問余求煙。余對以不用。久之雨不止。而勢少殺。余曰可行矣。其人亦曰可去。余以爲將同往而前者。及余行而彼復止。余益知其必非良人。然入其叻而不下咽。其心猶良也。更北半里轉西。又一里餘。有營當兩界夾中。阜上壁壘新整。由其下又西一里。入上司南門。有土垣環繞門內。即宿舖。江西人自下司至此居舍中各半土半欄時雨過街濕。余乘濕屐。遂由街北轉而西。有巨塘。滙其內築堤。

爲堰。甃爲馳道甚整。又北半里直抵固山。東麓北向入一門。有石罅一縷。在東麓下。當其盡處。鑿孔如盂。深尺許。可貯水一斗。固上下人俱以盎候而杓之。蓋其水甘冽。迥異他水。余杓而嘗之。果不虛也。由此循固麓轉入北峽。峽中居人甚多。皆頭目之爲心。贅寄者。又編竹架固於峽中。分行貯粟焉。由此峽西向行。已入固後。有脊自西北連屬於固。乃固之結帶處也。脊東峽中有洞。倚固麓。其門北向。甚隘而深。有二人將上固。余問此固深否。云其洞不深。上至固半。有大洞。頗深而有水。須以炬入。由下仰眺固上。居舍纍纍。惟司官所居三四層。皆以瓦覆。以堊飾。固險而居整。反居南丹上也。余乃隨其人拾級上固。其級甚峻。而



甃鑿開整。踞蹶而上，共半里，折而東，有樓三楹，跨路，閒乃圍半之隘關也。洞在中楹之後，前為樓所蔽，不可見。有男婦各一炊，中楹下，二人指余入，遂登固去。余索炬於炊者，則楹後即猪欄馬棧，踐之下洞，洞門北向，窪墜而下，下皆汙土，上多滴瀝，不堪足，乃復出而下。先是，令一夫隨行，至脊下，不敢登，予獨上，然固上之形，可以外瞭而見，惟此洞為樓掩，非身至不知也。仍由舊路里餘，返宿舍，則已薄暮矣。炊飯亦熟，遂餐而臥。

上司土官楊幼袖由長官而加副總，以水西之役也。其地小而與南丹為仇，互相襲殺，故兩土官各退居固上。南丹州治在固下，而居於上，上司則司治俱在上，而環固而居者皆其頭目也。南丹第三弟走荔波，為莫伋所執，第四弟走

上司至今為外難，日惴惴焉。其固員而大，四面絕壁，惟西北有脊通級而上，路必環旋於下峽，故為天險。峽中水西南下合塘中，及外峽南北諸流俱透西南，腋中墜去。

二十九由上司出南門，仍渡門東小水，溯之東北行一里，躡土山而上，四里，踰土山西度之。其脊西石峰突兀，至此北盡，踰脊西北行一里半，嶺頭石脊復夾成隘門，兩旁石骨嶙峋，由隘西出，轉而東北，下半里，又抵塢中，又北一里，復越土山西下脊，是為上司獨山州界。於是下嶺循東山行，又二里有村在西山塢中，為首查村，其處東西兩界皆土山，中間大塢有水自北來，界於塢中，遠首查之東，乃西向破峽去，循東界山，溯水北向行，又



三里水分二支來一自西北一自東北如了字會於中枝山盡處西北者較大路溯東北行一里半始渡之於是中枝山東麓得罈子窰村乃土官蒙氏之族也村北溪中皆碎石時涸時溢又東渡之東北上岡頭共里許有土環遺址名曰關上而無居舍又東北一里水盡塢窮於是躡嶺其嶺甚峻三里北踰其脊隘中砥石如鋪兩旁有屹立峯是名雞公關其脈自獨山州西北繞州治東南過此又東南度六寨之東而下蠻王峰者也脊西南水下直查而入都泥脊東北水由合江州下荔波而入龍江從脊東北眺則崇山蜿蜒列屏於前與此山遙對成兩界中夾大塢自西北向東南焉下山即轉北行一里抵塢轉東即有小

水東南下又東一里踰岡陟阜忽有溪自西北注東南水於此復出爲龍江上流矣渡溪東上於是升陟坡隴東北行塢中五里有數家之村在東北山下前從其前復轉入西峽北一里過一脊始北向下嶺其下甚深半里抵其麓始知前所行俱在山上也又北行塢中一里半有大溪汪然自西峽層山中出東注而去亦由合江州而下荔波思恩者歷石壑而渡其北又緣西界支隴北行五里爲羊角寨乃蒙氏之砦也又在西山麓又北三里有小水自西坡東注涉之又北二里入獨山州之南隘門其州無城一土知州一明知州土官蒙姓所屬皆土人即苗仲明官多缺以經歷署篆所屬皆客戶余所主者江西南昌人黃南溪也其人忠厚長者家